



澳門特別行政區 立法會會刊

DIÁRIO DA ASSEMBLEIA LEGISLATIVA DA REGIÃO ADMINISTRATIVA ESPECIAL DE MACAU

第四屆立法會 第四立法會期（二零一二—二零一三）
IV LEGISLATURA 4.ª SESSÃO LEGISLATIVA (2012-2013)

第一組 第 IV-91 期
I Série N.º IV-91

日期：二零一二年十一月二十九日
二零一二年十一月三十日

何少金、劉永誠、林香生、麥瑞權、陳偉智、
蕭志偉、何潤生、陳美儀、唐曉晴。

（十一月二十九日開始、結束時間）

（十一月二十九日列席者）

開始時間：下午三時正
結束時間：下午七時二十八分

列席者：社會文化司司長張裕
社會文化司司長辦公室主任張素梅
衛生局局長李展潤
教育暨青年局局長梁勵
文化局局長吳衛鳴
旅遊局局長安棟樑
社會工作局局長容光耀
體育發展局局長黃有力
高等教育輔助辦公室主任蘇朝暉
社會保障基金行政委員會主席葉炳權
旅遊學院院長黃竹君
澳門大學校長趙偉
澳門理工學院院長李向玉
衛生局副局長陳惟蒨
社會文化司司長辦公室顧問丘曼玲
社會文化司司長辦公室顧問何麗鑽
社會文化司司長辦公室顧問吳志強
社會文化司司長辦公室顧問惠程勇

（十一月三十日開始、結束時間）

開始時間：下午三時正
結束時間：下午七時五十九分

地點：澳門南灣湖畔立法會前地立法會大樓全體會議廳

主席：劉焯華

副主席：賀一誠

第一秘書：崔世昌

第二秘書：高開賢

（十一月二十九日、三十日出席議員）

（十一月三十日列席者）

出席議員：劉焯華、賀一誠、崔世昌、高開賢、馮志強、
關翠杏、歐安利、吳國昌、張立群、徐偉坤、
陳澤武、鄭志強、區錦新、黃顯輝、吳在權、
高天賜、崔世平、梁安琪、陳明金、李從正、

列席者：社會文化司司長張裕
社會文化司司長辦公室主任張素梅
衛生局局長李展潤

教育暨青年局局長梁勵
 文化局局長吳衛鳴
 旅遊局局長安棟樑
 社會工作局局長容光耀
 體育發展局局長黃有力
 高等教育輔助辦公室主任蘇朝暉
 社會保障基金行政委員會主席葉炳權
 旅遊學院院長黃竹君
 澳門大學副校長黎日隆
 澳門理工學院院長李向玉
 衛生局副局長陳惟蒨
 社會文化司司長辦公室顧問丘曼玲
 社會文化司司長辦公室顧問何麗鑽
 社會文化司司長辦公室顧問吳志強
 社會文化司司長辦公室顧問惠程勇

社會文化司司長張裕：多謝主席。

尊敬嘅立法會主席、各位議員：

首先，借這個機會感謝各位在過去一年對社文司轄下工作嘅監督、關心同埋支持。

2012 年，社會文化各領域的工作團隊，按照“推動經濟適度多元，提高民生綜合水平”的施政主題，以提升社區活力、提升社會質素和提升市民快樂感作為民生工作的方向，結合現實情況和社會發展的長遠利益，在鞏固過往工作成效的基礎上，通過抓重點、克難點、創亮點，積極落實施政的各項目標。

今天，請允許我先簡介一下在社會文化範疇內本年度與民生有重大關係的各項工作，然後再介紹明年的施政重點，請各位議員審議、指正。

（十一月二十九日、三十日議程）

議程：辯論社會文化領域 2013 年施政方針政策。

簡要：議員就社會文化領域 2013 年施政方針政策與列席者進行了辯論。

會議內容：

（十一月二十九日會議）

主席：張司長、各位官員、各位議員：

午安。

我哋現在開會。

我哋今日嘅議程就係辯論 2013 年度社會文化領域嘅施政方針。

好，請大家安靜落來。

咁我首先請張司長對 2013 年度社會文化領域嘅施政方針作一引介。

請張司長。

關注到 2012 年的通脹仍然高企，特區政府為協助弱勢社群應對生活壓力，推出多項措施保障弱勢社群，包括：

於 1 月及 7 月分別兩次調升最低維生指數，升幅為 12%。

調升三類弱勢家庭（單親、殘疾及長期病患者）特別援助金額。調升後的單親家庭子女學習補貼及殘疾補助金額上調 50%。而護理補助金額則上升了一倍。並繼續向三類弱勢家庭發放特別生活津貼。

短期食物補助的入息上限亦調升至最低維生指數 1.7 倍，令到更多低收入家庭受惠。於 1 月及 9 月對現有援助金家庭發放多一次全數援助金。

為表達對長者的關懷，敬老金亦由每年 5,000 元調升至 6,000 元。

此外，制訂了最低維生指數的調整機制，以有助構建及完善社會援助體系。

為回應社會對托兒服務的需求，有四間托兒所投入服務。

同時，繼續執行並完善《殘疾分類分級的評估、登記及發證制度》。截至 2012 年 10 月中，共收到 9,514 宗“殘疾津

貼”申請，已發放及處理了 7,908 宗。而為智障人士住宿設施盈樂居亦都已經於今年的 7 月投入使用，共提供了 36 個住宿的名額，亦提供了家屬資源的服務。

為確保社會保障基金能夠持續運作及穩健發展，社會保障基金根據精算報告的結果，制訂調升養老金和供款額的方案。在落實雙層式社會保障制度方面，為構建第二層的非強制性中央公積金制度，現時已就相關制度的供款及款項投放規則制訂方案進行討論。社會保障基金首次聯同社會工作局及退休基金會使用自助服務機辦理 2012 年在生證明，並分別在北區政府綜合服務大樓及皇朝區的中土大廈增設辦事處，繼續為市民提供優質服務。

在醫療衛生方面，進一步加強長者醫療和保健服務。新的叻仔老人保健站已於年中啟用，主要為 60 歲或以上長者提供健康檢查、常見疾病和慢性病的預防及診治、化驗和輔助檢查。並定期在社區舉辦各類健康教育講座，促進區內居民健康。

仁伯爵綜合醫院，即是山頂醫院，綜合社區病區已於 7 月份投入服務，現階段設有 24 張床，主要接收經治療後病情穩定的仁伯爵綜合醫院內科、神經內科及骨科，且預計可於兩周內返回社區的病人。

亦都重新劃分急診分流級別，增加中醫、針灸及口腔保健門診的服務時間。

在市民的積極配合及各部門的緊密合作下，2012 年首三季控煙辦督察共巡查超過 19 萬間場所，票控總數逾 6,000 宗。

仁伯爵綜合醫院於 2012 年成為本澳首間通過國際認證的醫院，顯示本澳專科醫療服務獲得國際評鑑機構的肯定和認同。

教育方面，推出“2011/2012 學年大專學生學習用品津貼”，合共有 3.5 萬學生進行了登記。透過上述計劃的實施，除達致支持學生學習，減輕其經濟負擔的目的之外，亦有利於特區政府與大專學生保持長期的連繫，透過定期的資訊發放，讓大專學生，特別是身處外地的澳門大專學生更為了解本澳的社會情況和發展方向，吸引他們在學成後回澳、留澳工作，貢獻社會。

《非高等教育私立學校教學人員制度框架》法律即是“私

框”，終於獲得通過，職級制度和專業發展津貼開始實施，教學人員專業發展津貼得到大幅提升，這是特區政府和全社會重視教育以及關懷和尊重教師的體現，為未來的師資隊伍建設提供了有效的制度保障。

同時，隨著教育經費的加大投入，2012/2013 學年亦大幅調升了“優化班師比或師生比”的資助金額。

成立教學人員專業委員會並展開相關工作；設立新的機制吸引優秀學生修讀教育專業的大專課程，加強師資隊伍的建設；加強學校德育工作隊伍的建設，繼續推動品德與公民教育、性教育、家長教育等各項工作。

為弘揚青年積極向上的風氣，特區政府積極推動“發放正能量”系列工作，舉辦首屆“感動人心·激活正能量——傑出青年嘉許計劃”。通過選舉形式，嘉許社會上勇於面向挑戰、跨越成長障礙以及積極參與社會服務的青年。

亦都推出“陽光新一代推動計劃”，鼓勵青年或學生自發、主動進行不同類型的戶外活動及各類有益身心的親子休閒活動，建立陽光健康的生活模式。相關的手機應用程式 APP 和網頁已全面啟動。

旅遊方面，從多方面著手推進建設澳門成為世界旅遊休閒中心的策略定位。針對各項研究的建議，旅遊部門組成內部工作小組，以推動長期總計劃、中期發展計劃及短期行動計劃的制訂，展開全面的配合和支持。

於 2012 年 9 月，特區政府亦舉行了“第一屆世界旅遊經濟論壇”，吸取各地專家學者對澳門建設世界旅遊休閒中心定位的見解，以推動國際旅遊經濟的交流和合作。

自《禁止非法提供住宿》法律於 2010 年 8 月 13 日生效至今，合共進行了 481 次聯合行動，巡查涉嫌單位 2,592 個次，封印了 276 個懷疑非法提供住宿單位，並對涉及違反法律的人士展開制裁程序。至目前為止，已有 140 個獨立單位獲解除臨時措施。

在旅遊產品開發上，透過跨部門和相關機構的合作，共同發展文化、學習、宗教、節慶、生態旅遊相關活動，持續深化“澳門旅遊產品發展計劃”。此外，還積極推進區域旅遊合作，發掘具潛力的市場，以開拓更多國際客源。

文化方面，今年新增的“媽祖信俗”、“哪吒信俗”、“土生葡人美食文化”及“土生土語話劇”已獲選入澳門《非遺》名錄當中。

而“文化遺產保護法”已送交立法會作最後程序之審議。

另外，多項歷史建築的修復及再使用工程已順利展開。而新的文創空間及圖書館的陸續啟用。其中“哪吒展館”和“同善堂歷史檔案陳列館”已完成並對外開放。已啟用的文創空間則包括“澳門創意館”、“C Shop”及“澳門時尚廊”。此外，新近啟用的紅街市圖書館，改善了社區的文化環境。

為增強市民體質，特區政府近年來大力推動發展體育運動。體育發展部門透過定期舉辦多元化大眾體育活動。今年合共舉辦了超過 19 項大眾康體活動和體育盛事，以及 2,300 多個健身興趣班和暑期班。為市民提供參與和觀賞體育運動的機會，合共吸引了近 43 萬的參與人次。而公共體育設施網絡亦錄得了超過 400 萬的使用人次——這個資料截至 9 月底。

在競技體育方面，政府一直致力培養本地運動員。經過多年的努力，本地運動員在今年參加的賽事中獲得了可喜的成績。在第 9 屆亞洲游泳錦標賽中，本澳運動員獲得了澳門史上首面游泳項目的銀牌，而在第 4 屆世界青少年武術錦標賽中亦獲得了 2 金、4 銀、3 銅的佳績。此外，本年度還繼續發展本地殘疾人的體育運動，包括開展本澳與內地殘疾人體育運動的培訓和合作交流，並派出代表隊參加在倫敦舉行的殘疾人運動會。

立法會主席、各位議員：

保障和改善民生，讓居民過上更好的生活，是政府施政的根本目的。特區政府已明確了於 2013 年的施政重點為“增進民生福祉，立足長遠發展”。因此，未來一年社會文化範疇的工作將會繼續以關注民生，改善民生和提高民生綜合水平為主要目標，把民意訴求作為施政的重要參考。通過完善施政的長效機制，重點關顧弱勢社群，完善醫療衛生體制，提升教育素質，強化社會工作，健全社保制度，提升旅遊素質，推動文化的發展，關心青少年成長及促進市民的身心健康。從社會文化領域的各個方面提供更優質的設施和更完善的服務。另一方面，通過加大資源的投入，加強人才的培養，同時加強青少年的品德和公民意識的教育，弘揚社會的正氣，從而增加社會的凝聚力和居民的歸屬感，努力構建一個和諧、健康的社會。

以下請讓我向大家介紹社會文化司轄下各範疇在 2013 年的施政重點：

一、完善醫療體制建設提高醫療服務水平

2013 年，將繼續貫徹綜合性的健康服務政策，持續改善健康指標，加強公共衛生防控機制，透過建構公共醫療安全網絡，保障全澳居民的身心健康。並繼續加緊《完善醫療系統建設方案》內各項設施的興建。

繼續跟進通過國際認證後的各項後續工作，持續改善服務質量。

進一步優化長者的出院健康管理和藥物管理工作，研究增加老人的便利措施和拓展中醫保健，完善醫療服務。

按輕重緩急的原則，通過分流機制，為病人提供及時、適當的醫療衛生服務。

仁伯爵綜合醫院急診大樓預計於 2013 年下半年投入使用，設有 96 張病床，將有助進一步擴大急診服務能力，現時正籌備各類設備和醫療器械的購置和安裝。

積極培訓全科實習和專科醫生，優化人員配置，配合各項服務的開展。

跟進醫療事故法、實習醫生培訓法律制度的修訂和成立醫務委員會後的各項工作。完善本澳的醫療衛生體制建設，提升整體醫療水平。

明年會繼續加大力度做好控煙的執法與宣傳教育工作，並適當調整預防宣傳策略，嚴格執行新的煙包式樣和娛樂場所設置吸煙區的規定，致力維護市民健康。

繼續推動首階段全澳個人電子病歷的建設。通過“整體設計，分步實施”的策略，首階段的全澳個人電子病歷將計劃整合仁伯爵綜合醫院、衛生中心、鏡湖醫院和科大醫院的病歷資料。預計在明年下半年招標。

進一步加強與非牟利醫療機構和對外的合作機制，促進與非政府醫療系統的並行發展。

考慮到通脹的高企，特區政府計劃於 2013 年起調整醫療補貼計劃的金額，醫療券的金額至六百元。同時，為提升醫療補貼計劃推行的效益，正積極研究將醫療券使用期限延長至兩年。

二、持續提升教育品質激活青年正向能量

主席、各位議員：

特區政府將繼續貫徹“教育興澳”的指導方針，適度加大資源投入，持續加強高等教育的制度建設，跟進《高等教育制度》法律的立法及落實工作，有序推進相關法規的立法進程。

2013 年，將著手研究制訂高等教育中長期發展規劃，籌設“高等教育基金”。調整高教行政部門的組織和運作，開展高教質素保證機制框架的研究，促進高等教育的穩步發展和持續優化。

即將遷入橫琴新校園的澳門大學，將重點做好遷校的工作，以確保搬遷過程的安全穩定，以及遷入後能夠運作順利。

明年，繼續對在本澳及外地就讀大專和研究生課程的本澳學生，發放學習用品津貼，建議金額由 2,000 元調升至 3,000 元，以減輕他們在購買書籍、參考資料和學習用品方面的負擔。

積極構建人才資料庫，並開展不同領域專業人才需求的專項研究。各高等院校將積極跟進有關院校章程的修訂工作，推動院校的持續發展。

非高等教育，按照“優先發展、提高品質、育人為本、促進公平”的方針，努力推動《教育發展十年規劃》的實施。

繼續加大資源投入，研究發揮教育發展基金的財政儲備和政策引導的功能，並考慮調升免費教育津貼、學費津貼、回歸教育津貼、書簿津貼等金額，放寬經濟困難學生申請相關津貼的家庭每月平均收入上限，增加獎學金的名額和金額。

2013/2014 學年，“教育發展基金”將重點資助提升學生的語文能力。培養學生品德與公民素養。促進學生愉快及有效學習。

亦都會進行強化師資隊伍建設，發揮教學人員專業委員會的功能，積極落實《私框》的各項措施。推動學校系統多元和整體發展，優先發展免費教育學校系統。修訂《私立學校通則》法規，推行學校評鑑，促進教育資源的有效運用。加強學生輔導、品德與公民教育、性教育等工作。

設立百分百家長獎勵計劃，積極研究加強家長教育的機制和方法，鼓勵家長持續學習教育子女的正確態度和方法。

繼續開展一系列校外教育營及其他活動，既培育學生正確的人生觀、價值觀、道德觀和愛國愛澳的情懷，又發展他們的獨立思考和批判精神以及創新和建設的能力。

另外，從政府和學校兩個層面深化與內地的教育合作，尤其推動職業技術學校的發展。

將開展對“持續進修發展計劃”實施情況的檢討與評估，採取措施有效優化該計劃的管理和監督工作，確保公務的合法、公正以及有效的運用。

青年事務方面，將有序推動《澳門青年政策（2012-2020）》的實施，完善青年工作的長效機制，並積極落實青年政策提出的各項措施和主要工作。

發揮青年事務委員會的諮詢和溝通平台，深化與青年社團和相關機構的合作夥伴關係。

持續推行“亦師亦友”計劃，同時宣傳青年感動人心的事蹟，激發青年的正能量。推進青年參與義務工作的嘉許和獎勵機制，擴大青年義工的參與面和專業性。完善青年資訊服務機制，強化社會參與，增強青年參與特區建設的使命感和對澳門的歸屬感。並持續推動有助於鼓勵青年人向上流動的各項工作。

與此同時，全力發展各類餘暇活動，為青年提供更廣闊的空間和更有力的政策扶持，提升青年的創意和創新能力。

三、加強支持弱勢社群推動雙層養老保障

特區政府以改善民生為施政主題，因此，社會工作的重點將繼續加強對弱勢社群的支持，並重視長遠的規劃，將開展社會工作領域長者及康復服務的十年發展計劃（2015 年至

2024 年)。

特區政府安老政策的目標，是構建一個老有所養、老有所屬和老有所為的共融社會。

為有效構建最低維生指數調整機制，設立恆常性的最低維生指數調整機制，務求給予弱勢社群得到更大的保障。

此外，亦會制訂一系列靈活兼具針對性的適切措施，以應付經濟環境發生驟變時，可以及時協助弱勢社群應對短期的生活壓力。當中包括放寬每月發放三類弱勢家庭特別補助的援助範圍，將失智症、自閉症及癲癇症也納入有關援助範圍等。

明年將向領取援助金家庭發放多一次全額特別援助金。敬老金將會調升至每年 6,600 元，受惠的人數將達 55,000 人。明年將調整租金津貼的金額，讓有關津貼更能協助弱勢社群應付租屋的開支。殘障津貼金額將會上調 10%，普通殘疾津貼由每年澳門幣 6,000 元升至 6,600 元，特別殘疾津貼每年澳門幣 12,000 元升至 13,200 元，受惠的人數將會是 10,050 人。將會延長短期食物補助計劃領取食物的期限，由每次 6 周延長至 8 周。

2013 年將設置 5 間新的家庭或社區服務中心，進一步擴大服務網絡，增強對個人及家庭的支援功能。未來三年將興建不同種類的社會服務設施共 43 間。預計可以滿足到 2020 年的需求，但是托兒所方面的話，是會滿足到 2015 年的需求。

將增加托兒名額的數量，並開展親子班及籌備社區托兒服務的先導計劃。2013 年將有 5 間托兒所相繼落成，共提供 1,400 多個托兒名額。隨著措施的成效和公共房屋的落成，預期至 2015 年共可提供約 7,000 個托兒名額，較 2010 年增加 75.8%。

將於離島增加日間護理中心和護理安老院舍的服務名額。2013 年將有一間大型的安老院舍落成，可提供 300 個服務名額。未來 3 年新增 1,100 多個院舍宿位及日間護理名額。

特區政府亦十分關注智障人士及其家庭的雙重老化問題。正規劃在未來三年增設四間住宿院舍，會增加 349 個住宿名額，為有需要的智障人士提供院舍照顧服務。

此外，將開展《殘疾分類分級的評估、登記及發證制

度》的整體檢討工作，作出適當的修訂並持續改進。並繼續推廣賭毒防治工作，制訂更有效的預防問題賭博政策。繼續推動《社會工作者註冊制度》的相關工作。

為確保社會保障基金的可持續發展，將透過循序漸進方式調整社保供款金額，逐步平衡勞、資、政府三方權責。特區政府將於 2013 年開始向社保基金進行額外注資，鞏固財政資源。同時，將繼續推動第二層的非強制性中央公積金制度的構建，開展相關供款制度和管理方式專有法規的立法工作。並分階段向市民推廣終身理財的觀念，鼓勵僱主、僱員及個人積極加入中央公積金制度，以建立長效的退休保障制度。

四、深化旅遊休閒體系全面開展文化普及

按照國家“十二·五”規劃賦予澳門成為“世界旅遊休閒中心”的策略定位，特區政府從區域合作、城市發展、文化旅遊、優質旅遊四個方面努力實現這定位的長遠目標，並透過發展主題多樣、特色多元的綜合性旅遊服務，推動經濟適度多元化。為此，將開展旅遊發展總體規劃的工作，配合相關發展定位，從整體上提出中長期旅遊業發展規劃，以制訂一套全面和整體的旅遊業的工作計劃。規劃的研究範圍將包括政府部門、旅遊業界內的不同範疇、人力資源、旅遊培訓、旅遊產品及旅遊質量等，旅遊部門組成內部工作小組，積極開展工作。

在行業管理方面，繼續跟進規範酒店和餐飲場所法規的修訂工作，為行業的多元現代化發展創造條件，亦為優化旅遊環境和促進服務素質制訂有效的監管機制。繼續跟進有關旅行社及導遊行業法例的修訂工作。

大力推展具本地特色的旅遊元素，以及促進旅遊產品多元化，發展文化旅遊。支持旅遊產業與本地社區相結合，繼續支持本地社團組織舉辦文化旅遊活動，推動本地中小企業發展，增加社區的旅遊吸引力，打造魅力舊城區。繼續以旅遊客源多元化作為工作重點，積極拓展國際市場。

為打造澳門成為“盛事之都”，旅遊部門將繼續主辦和協辦多項盛事和節慶活動，尤其是第 25 屆澳門國際煙花比賽匯演。並藉著第 60 屆澳門格蘭披治大賽車舉行的契機，將此項盛事轉化為全年的活動和宣傳，營造全城參與的節慶氛圍。

文化領域的施政重心將緊扣打造“世界旅遊休閒中心”及“文化永續之城”的目標，深耕文物保育，開拓社區文

化格局，並著力藝術普及，改善藝文環境，開展更多文化交流，弘揚本土文化價值。

文化遺產保護宣傳推廣工作將全面在社區和學校展開，並將啟動非遺的普查準備工作，開展全澳建築文物普查。大力推動社區的文化建設，發掘和保護社區文化中的獨特性，增加社區民眾文化參與。

在拓展文創空間方面，2013 年將落成並啟用的有“藝術電影院”、“何族崇義堂”文創複合空間等。並計劃改建“海事工房”成為當代藝術展演及文創空間，增加社區的文化凝聚力。

在人才培養方面，將開展一些有針對性的培訓計劃，如“文化特攻”計劃及“文化藝術管理人才培養計劃”等。同時亦將開設“文化藝術學習資助計劃”，支持年青人前往外地升讀文化藝術及文創產業類大專及碩士課程。

五、發展恆常體育運動促進市民身心健康

2013 年，體育領域將會深化大眾體育與競技體育的各項工作。藉著發展大眾體育，增強市民體質的同時，亦有利於競技體育的發展。

因此，2013 年將會因應全澳市民體質監測的結果，加強大眾體育的宣傳，透過大眾體育與科學健身的有機結合，增強市民認識體育運動的益處，促進市民的積極參與。

大眾體育，將會到各學校巡迴推廣體育運動，推動學生積極進行體育鍛鍊，以改善學生體適能的狀況。此外，將善用各種適合進行體育運動的場地、空間和深具群眾基礎的民間團體的服務網絡，定期舉辦各種不同類型的大眾體育活動，引導市民因地制宜地進行體育鍛鍊。

在競技體育方面，將加大力度推行精英運動員培訓計劃，透過分級資助制度和進修資助計劃，讓更多精英運動員能夠參與。同時，亦會透過聘請專業教練，以提升訓練的水平，以及推行教練和裁判員的培訓，以逐步壯大本地體育技術人員的隊伍。此外，將繼續發展各個專項體育訓練學校，持續培育年青一代的運動員，以及優化體育管理人員。

在優化體育設施管理方面，將推行體育設施的綠色管理和

認證的試點工作，加緊推進各個體育設施的興建工作，以配合本地體育專業化發展所需。

在支援四川災後重建方面，特區政府承諾的 103 個援建項目於 2012 年全部完工。餘下的工作將集中對項目的審計報告進行最後審閱評估，以確保項目按特區政府參與援建的精神及要求建設，並保證質量、安全等方面達到國家規定標準。

最後，我想講一講的是，佔全澳人口半數的婦女始終是推動特區發展的一支不可替代的重要力量，在特區的經濟社會建設和文化建設中發揮了獨特作用，為促進社會的穩定、和諧作出了重要的貢獻。因此，特區政府在婦女諮詢委員會的基礎上設立了婦女事務委員會，並設有一個秘書長全職負責各項工作。

為持續瞭解及關注本澳婦女需求的現況和發展，未來的工作將逐步建立一個具系統性的數據資料庫，為科研人員及政府機構提供具參考價值資料觀念的客觀規律和數據。此外，亦會透過多元方式向社會宣傳及傳遞婦女在事業及家庭方面的信息，通過與相關部門及婦女工作者交流關注家庭友善政策，激活婦女參與能力，倡議和諧家庭及社區。

立法會主席、各位議員：

未來，面對社會和經濟環境複雜多變的嚴峻考驗，我們的工作團隊將始終緊扣“以人為本、科學決策”的施政理念，按照“增進民生福祉，立足長遠發展”的施政主題，努力堅持依法、廉政、勤政、務實和高效的施政原則，將市民的需要時刻放在心中，虛心聆聽，用心思考，真心誠意地謀民生之利、解民生之憂，為澳門市民能樂享幸福的生活和特區可持續的發展，打下一個堅實穩固的基礎。

我的發言完畢。

請各位議員審議，並提出寶貴的意見。

多謝。

主席：好，司長嘅引介完畢，咁現在我哋開始辯論。

請陳明金議員。

陳明金：多謝主席。

司長：

社會文化範疇嘅事務由你管轄嘅係醫療、社保、教育、文體康樂等等，都係涉及民生嘅生、老、病、死，每一項政策落實得好唔好都係同廣大居民生活息息相關嘅。

特區政府明年嘅預算開支係高達 826 億，其中在社會文化範疇係超過 367 億，約佔 44%。但係，這些公帑用在醫療方面，居民能否病有所醫？用在社保方面，能否老有所用？用在教育方面，能否學有所教？用在文體方面，能否文有所值、體有所健？結合廣大居民關心嘅這些問題，今日想借這個機會同司長探討一下。

人害怕有病，但係又唔可能冇病。大病小病都要睇醫生。在正常情況下，人在醫院出世，走嘅時候，大多數都在醫院。可惜，在澳門睇病難，長期等，這些係居民所公認嘅老大難問題。老問題得唔到解決，新問題又不斷產生，覺得越來越複雜，越來越無奈。居民經常問：我哋嘅政府好富有，點解冇辦法解決這個老問題呢？司長在今年嘅方針中指出，對比世界其他國家同埋地區，政府嘅醫療系統，本澳嘅輪候時間已經係相對較短嘅。

另外，當局又曾經表示，普通科室嘅輪候時間係一個月左右。輪候時間較長嘅科室係心臟科、骨科，平均係 3 個月左右；耳、鼻、喉科、眼科超過兩個月。但係，前幾日有好多居民向我本人反映，去照 B 超已經要排到 2014 年；80 幾歲嘅阿婆做白內障嘅手術要排期一年；磁力共振檢查需要等兩年。居民講：等到來唔知仲有冇命去睇。點解居民嘅實際遭遇同醫院嘅自身評估有咁大嘅落差呢？

另外，關於癌症病人嘅睇病情況，當局表示病人初次求診排期超過一個月可以提前睇，並致力提供更加適合嘅服務。但係，根據資料顯示，這幾年本地每年大約有 1,000 名新增嘅癌症病人，至 2010 年復診嘅病人達到 13,717 人。而政府在醫院專屬腫瘤範疇嘅醫生只有 3 個，血液腫瘤科只有 16 張病床，咁樣嘅資源配備，點樣為病人提供更好嘅服務呢？

從資源投入來睇，在 1999 年政府用於醫療開支係 12.3 億，今年嘅預算係 44.6 億，明年嘅預算係 52 億。13 年來總共投入幾百億，但係基本嘅醫療配置，每千人口嘅病床，醫療人

員嘅數目卻未見明顯提高。在 2011 年，澳門每千人口相對嘅病床係 2.2 張，醫生 2.6 人，護士 2.9 人，低過好多發達國家同埋地區嘅同類水平。雖然，治病救人無價，但係只見資源增加，卻未見居民輪候睇病嘅時間縮短，基本嘅病床同埋人力配套冇辦法跟上社會同埋居民嘅需求。幾百億嘅投入，效果未見明顯提升，其中嘅根本問題係唔係應該深刻去反思同埋改革呢？

另外，當局提出要修訂《實習醫生培訓法律制度》，多年來遲遲未能夠推出，導致衛生局 3、4 年未培訓實習嘅醫生。鏡湖醫院又暫停培訓 2 年。300 幾名醫科畢業生苦等幾年冇開考，人力資源出現斷層。面對社會嘅訴求，今年衛生局、鏡湖醫院都再次啟動實習醫生嘅培訓，其中衛生局要培訓 100 名全科實習醫生。到目前為止，培訓情況究竟係點呢？成立醫務委員會由舊年話“規章待批”，到今年 4 月“好快成立”，再以“技術問題”，要推遲到“爭取今年之內成立”。

醫療事故法立法提案工作更加係超過十年，期間進行過兩次公開諮詢。今年嘅方針仍然係“積極推進”。一年推一年，究竟會點樣收場呢？司長，可唔可以喺度清楚向我哋全澳居民作出一個說明呢？

澳門有醫療事故法，但係並唔代表當局可以抹乾淨醫療事故嘅後果。好似遭受不幸嘅黃先生曾經要跳大橋、要跳樓，又曾經在立法會痛哭流淚，當局唔理，我覺得首先輸咗同情心。

澳門已經進入一個老齡化社會。根據香港嘅統計，由於老年人嘅疾病更為複雜，佢哋嘅醫療需求係非老年人嘅 9 倍。每一千名 65 歲以下嘅人只需要 1.3 張病床，而 65 歲以上嘅人就需要 11.8 張。老齡化社會嘅到來，將來加大對醫療項目嘅需求，政府在十年醫療規劃係點樣去面對呢？點樣去應對呢？

人害怕老無所養。一般來講，老有所養就係要滿足老年人衣、食、住、行嘅需要。這些老年人要繼續生存落去嘅物質保障呢？人老了都要退休。老有所養一般係要收入嘅保障，主要矛盾係養老水平唔好降低嘅問題。

內地嘅社保、香港嘅強積金、台灣嘅退休年金，將僱主、僱員嘅供款作為重要來源之一。本澳嘅養老金雖然即將調整為每人每月 3000 蚊，但係主要依賴政府嘅大量投入。如果未來四年政府唔投入 370 億，社保基金就可能破產。缺乏長效機制，經濟好，政府可以大量嘅投入，但係十年又或者係幾十

年之後，如果經濟唔好，這個越來越大嘅包袱，政府是否可以輕鬆繼續預落去呢？比較內地、香港、台灣，長期以來，本地每月每人 45 蚊嘅供款，已經係同社會經濟發展是嚴重脫節，如果繼續落去，就等於政府要繼續預落去，就等於我哋嘅子孫後代要預上大嘅包袱。

但係中央公積金制度卻一波多折：經歷過 07 年嘅公開諮詢，08 年製作《社會保障和養老保障體系改革方案》，09 年通過訂定《開立及管理中央儲蓄制度個人帳戶的一般規則》，2011 年向立法會提交《中央公積金制度框架》法案，今年將法案改名為《公積金個人帳戶》，並獲得通過。其實，這個只係中央儲蓄帳戶嘅重複，同居民嘅期望相差好遠。司長明年嘅方針提到會積極籌備同埋推動有關嘅立法工作。廣大居民對真正嘅第二層社保十分關心，認為唔能夠只顧眼前，過去嘅做法不科學，唔代表唔能夠改革。為咗更多居民嘅將來能夠真正嘅老有所養，政府會唔會下決心建立社保嘅長效機制呢？

另外教育，教育公平係人發展起點嘅公平，教育公平係社會公平嘅基礎。從某種意義上來講，冇教育公平就實現唔到社會嘅平等。啟智教學、學前教學、持續教育學嘅重要性不必多講，特區政府重視教育事業，持續加大投入，明年超過 100 億元。但係，教育係一項系統又長期嘅社會工作，重視投入之外，又應該實事求是。過去一段時間，本地嘅出生率保持在一個較低嘅水平，但係，近年來隨著出生率嘅上升，托兒所一位難求嘅問題開始出現。根據統計局資料，2010 年至 2011 年出生嬰兒分別有 5,114 同埋 5,852，加上今年前三季度 5,206 名，未來幾年有人托需求嘅家庭係數以萬計。司長頭先引介嘅時候表示，在 2013 年將會 5 間托兒所相繼落成，有 1400 幾個托兒名額，預期到 2015 年可以提供約 7000 個托兒名額。但係，相信與實質嘅需求仲係存在一定差距。隨著人口以及出生率嘅增加，未來這種需求相信會持續增加，政府點樣解決這方面嘅問題？點樣全面科學落實學有所教呢？

政府舊年推出持續進修發展計劃，為期三年，明年係最後一年。本來，類似咁嘅計劃應該係一年總結一次，一年要做得比一年好，但係，如果唔係審計署提出嘅一系列問題，在行政當局睇來，是否都係依法施政？

審計、廉署係特區政府嘅監察機構，司長曾經都在廉署主持過工作，應該好理解上級部門即使已經授權給下級部門，適當嘅監察仍然係必要嘅。這次審計署進行審計，指出有關嘅問題，事後，司長在接受訪問嘅時候表示未睇過報告。審計報告

在第五部分寫明審計對象嘅回應，而且整個審計過程並唔係 1、2 日嘅事。請問司長，係教青局同上級溝通不足又或者係審計署嘅調查審計工作未能夠引起司長嘅重視？對於這個事件，司長表示，對有關計劃應該採用比較寬鬆嘅政策。在學有所教嘅前提之下，究竟點樣寬鬆先至能夠適合呢？司長目前是否已經睇過報告，有冇進一步嘅回應呢？

政府重視文化事業，推動文創產業，成立文化產業委員會，籌組文創基金都係好事。但係，本人去年講過，文化事業唔等於都係變成文創產業。在兩者之間點樣取捨，點樣把關，盡量做到文有所值？另外，結合橫琴文創產業園嘅開發，在粵澳合作中醫藥產業園嘅經驗基礎上，點樣幫助本澳嘅有潛力文創產業真正融入區域合作呢？

明年施政在體育康樂方面，投入咗 11 億。發展體育康樂事業，增強居民嘅體質健康係政府嘅責任。但係，這些公帑用在大眾體育、體育社團，其他事務方面，究竟各有幾多呢？是否對居民都有體有所健呢？

最後我想講講經濟型酒店嘅問題。每年幾千萬嘅旅客來澳，並唔係人人都住得起豪華酒店。旅客來澳後留宿比例比較偏低，與這方面影響有關係。一些旅客選擇澳門遊，珠海住，而另一方面，非法旅館也因此而存在。為咗多留住旅客，同時淨化旅客居住嘅環境，政府會否考慮出台一些措施，鼓勵投資者興建經濟型酒店，令更多嘅旅客來澳後能夠住有所居？

多謝。

主席：何少金議員。

何少金：多謝主席。

司長同埋各級官員、各位同事：

我頭先聽咗司長在引介明年施政重點裏面都提到咗好多有關教育嘅立法或者等等方面嘅問題。咁所以，我第一個問題想同你跟進一下，就係高教法嗰個立法嘅進程。

大家都知道，與時俱進嘅法律法規，對於澳門整體嘅發展肯定係起著一個正面嘅促進作用。咁而家我哋回顧返上個世紀澳門嘅高等教育制度，其實係在 91 年嘅時候頒佈嘅，就係嗰個

11/91/M 號法令，咁而家你數返來已經 21 年了。咁其實根本上係唔能夠滿足到而家當前澳門整個社會個個高速發展，尤其是係對高素質人才這一種咁嘅需求，咁亦都大大制約咗我哋高等教育或者院校一個健康嘅發展。咁所以，要修訂這個高教法嘅聲音，我相信大家都經常聽到不絕於耳，尤其是教育界。我哋睇返，其實政府在 04 年嘅時候就已經完成咗這一個法律草案，咁第二年亦都公開諮詢咗，咁但係唔知點解，到而家 8 年了，到而家仲係只聞樓梯響，不見人蹤影。咁這個真係不禁令到教育界都係產生過疑惑或者擔心嘅。咁所以，其實好多教育界嘅朋友一見到面經常都係追我這一個問題。咁我亦都係喺在去年嘅 11 月，在行政長官來嘅施政答辯大會上，我亦都就這個問題都係問過行政長官。咁另外，在今年嘅 2 月，在這個議程前發言，我亦都就這個問題係發表咗意見嘅。咁但係，即係睇返剛才司長在引介嘅時候，明年嘅施政，都係講會跟進高等教育制度法律嘅立法工作。其實睇返，即係往上這幾年都係會睇到這一些咁嘅表述嘅。咁所以，究竟幾時立法呢？有冇一個定案嘅度呢？的而且確，高教法係肩負著教育興澳嘅一個好重要責任。而家目前對於我哋嘅高等院校，不論係公立好私立好，其實陳舊嘅這些法律制度係綁手綁腳嘅。你譬如好似今年廉署對某院校提出嘅勸籲，或者我哋立法議員都經常會收到一些市民嘅一些，最近都收到嘅一些投訴，都係投訴一些院校可能在制度方面等等都係存在一些問題。其實歸根究底，即係睇返，都係因為個法律滯後，配合唔到。所以對於佢哋點樣去發展，譬如尤其是有些院校想進行碩士嘅課程開展，或者甚至進行一些科研工作，都係舉步維艱嘅。咁這個真係大大制約咗我哋澳門高素質人才嘅發展。咁所以，在這裏真係好希望政府能夠加以重視，盡快將高教法嘅立法真係提到議事日程。咁當然，隨著世界潮流，其實高等教育已經係越來越講求嘅就係要給予佢哋更大嘅辦學嘅自由度。咁但係在學術自由嘅情況下，當然亦都唔係代表就話讓佢放任自流或者冇監管。點樣去做好佢嘅高等教育評審制度，亦都係非常之重要嘅。

咁所以，在這裏我就有幾個問題，陣間司長可唔可以就回答一下嘅？就係新嘅高教法究竟幾時出台呢？同埋今次在修訂咗之後究竟有些甚麼亮點呢，又可唔可以在這裏透露一下呢？咁同埋當中有冇訂立一些監督嘅同埋問責嘅制度呢？因為，大眾都係好希望公帑能夠得到善用，點樣增加透明度。咁仲有一個就係高等教育嘅評鑒制度這個法規嘅草擬工作進展又係點樣呢？因為在你嘅明年施政裏面都有談及嘅，咁其實這個亦都談咗好多年了，我哋有好多同事都跟進過嘅。咁仲有就係非高等教育已經定咗一個十年嘅發展藍圖，這個的而且確係有咗一個方向性。而未來，這個高等教育嘅發展藍圖又有些甚麼

設想呢？咁以上就係這三個問題係有關高等教育。

咁跟著我想跟進嘅，亦都係剛才司長你有講過嘅，就係《私立學校教學人員制度框架》訂立，的而且確係政府同埋教育界同埋社會，大家共同努力，經過 21 年終於能夠訂立。咁當然《私框》嘅訂立，我哋最終目的都係要培育好我哋嘅下一代，提升澳門嘅教育質量，這個先係最終嘅目的。今年，《私框》就在 9 月正式實施，而家目前行咗幾個月。但係當然，對於一個新鮮嘅事物來講，對於學校嘅行政好，對於老師好或者甚至對於教育當局來講，我諗都係要大家互相去磨合。譬如好似在《私框》通過嘅時候，我都有提請，就係話教育當局，譬如教青局係唔係要做好這個法律嘅解說，讓老師、讓行政都要清楚呢？咁在這裏，的而且確教青局亦都係做得比較及時嘅，亦都係落到學校去做。咁但係，對於行政來講，始終因為佢裏面牽涉到有一些真係好實質性問題嘅，譬如好似政府推出咗一些比較好嘅優化班師比，想增聘老師，咁但係有些學校甚至係面對就係話我想增加老師，第一，能唔能夠請到一些真係高質素嘅老師呢？咁另外一個就係，究竟學校個個條件能唔能夠可以請到呢？有時唔係單單係錢嘅問題，有些學校甚至講，我想加多張辦公台給老師都有辦法嘅。咁這些都係牽涉到硬件同埋軟件嘅問題。咁當然，這些問題都係有可能有時一下子去解決，但係亦都係要在這兩年裏面。所以我經常都講，《私框》真係要有一些磨合期。而作為老師亦都係要明白《私框》立法嘅原意，大家點樣去同行政方面，大家共同互相來到配合，互相來到將佢真係達致我哋提升育人個個本質，這個先係最終目標來嘅。

咁接著我亦都睇一睇就係話，政府，特首在明年嘅施政裏面都係講出咗，係會繼續營造一個優質嘅人文社會環境，讓澳門嘅優良傳統就係，尊師重道、敬老尊賢、助人為樂嘅社會風尚能夠代代相傳。這個的而且確係嘅，因為其實我哋中國這些優良嘅文化傳統係非常之重要，亦都係應該在社會上面形成一個咁嘅風尚，咁這一個係得到社會好多嘅認同。咁但係，從另外一個側面亦都可以睇返，我想跟進嘅就係，在《私框》裏面，本來係有這一個係對於一些臨近退休，即將退休嘅老教師係有一个人文嘅關懷，咁但係到最後，《私框》通過嘅時候，政府亦都解釋過，因為種種嘅一些問題，所以係將這一條條文抽起咗。咁但係，對於這一個有關嘅，我哋以往嘅這一批老師真係默默耕耘，吃嘅係草，搵嘅係奶。今日我啱啱中午都同一個好有心嘅人士飲茶嘅時候，佢都有講到，佢話：我真係好關注嘅就係，在上世紀 90 年代之前退休嘅這一批老師，我哋嘅老師有陣時真係有好高嘅一個高風亮節，有陣時真係唔到最艱難嘅

時候，佢哋都唔想講出自己點樣困難，點樣去等等嘅。咁而家，其實這一批嘅老師，佢哋嗰陣時係有退休金嘅，亦都有任何嘅公積金嘅。佢哋工作嘅時候，可能有些係得幾十蚊人工，就算退休嘅時候，人工都唔多嘅。咁所以在這裏，即係我哋點樣給予這些老師更大嘅人文關懷呢？咁所以，其實教育團體或者社會都係呼籲政府係唔係在這一方面可以多啲去思考呢？或者係給予佢哋，就算在保障方面能夠給予一些敬師金又好，甚麼形式都好。即係起碼能夠在社會上面形成一個尊師重教，亦都係為未來我哋年輕嘅一代加入教師嘅隊伍係起到一個比較好正面嘅作用。咁所以在這裏，我都知特首在好多嘅場合或者甚至在立法會裏面都係有回應到這個問題嘅。咁所以在這裏，我亦都想問下司長，可唔可以同我哋講一下，對於政府會點樣，譬如對於這一個一次性嘅慰問金嘅研究工作，究竟進展係點樣呢？有冇一些時間表或者會用甚麼支援方法，來到關心這一批老教師呢？咁尤其是就係點樣健全而家我哋教師嘅一個退休保障問題？

咁第三個問題亦都想同司長就係講下澳門教育整體未來發展方向。噏，教育興澳，這一個係特區政府歷年堅持嘅施政理念，這個的而且確係非常之正面嘅。咁自己其實講真一句，我教咗幾十年書，由澳葡政府時代到回歸咗之後特區嘅政府，我嘅感受真係好深嘅。澳門嘅教育由初時回歸前嘅七、八十年代緩慢發展，到回歸之後，接近 13 年了，教育急速嘅發展係充分體現到政府在教育嘅投入或者在教育制度嘅法律法規等方面都係做咗好多嘅工作。咁但係，隨著十年發展規劃嘅制訂、《私框》嘅落實等等，未來，其實我哋嘅教育應該係要向著一個優質嘅方向去走嘅時候，我哋究竟應該點走呢？咁尤其是 15 年免費教育。15 年免費教育的而且確係一個德政來嘅。好多我哋國家政府嘅領導人來到嘅時候，都一再肯定這個做法，的而且確係能夠讓澳門人文素質提升嘅。咁但係，我哋睇返，其實 15 年免費教育佢所走過個道路亦都係由 95 年嘅傾向性免費教育一路至 07 年先實施到嘅。咁而家目前我哋會睇到，譬如加入免費教育網嘅，其實已經佔咗澳門學校五分之四以上了。咁剛才司長亦都有講到話會優先去發展這個免費教育嘅系統。咁所以在這裏，我就想問一下，即係話政府究竟會有些甚麼實質嘅措施呢？咁尤其是明年《私框》要推行嘅就係 1.3 嘅教師套級，即係六級老師同埋一級教師個個套級，所面臨嘅這一些問題都係一些比較嚴峻嘅問題。咁所以在這裏就想聽下政府在這一方面究竟有些甚麼機制係會支持這個加入免費教育網絡嘅學校？

多謝。

主席：陳偉智議員。

陳偉智：多謝主席。

各位同事、各位官員：

社文司屬下有關嘅部門眾多，要講 15 分鐘，我認講一個部門都未必足夠。在咁短嘅時間內要將咁大堆嘅問題反映，就只能夠重點咁樣提出，或者用一個敘事嘅形式同張司長在這裏討論一下。

咁我打算從一個婚禮開始。因為今朝早參加咗一個朋友嘅婚禮，好溫馨嘅，見到佢哋簽紙，互相認許雙方嘅盟約。但係在簽嘅過程當中我就認，點解嗰個見證人唔給多份嘢佢簽？就係給多份家庭暴力防治法叫佢哋簽埋，等佢哋兩公婆就唔好打架。這份所謂家庭暴力防治法就未有嘅，之前嘅名就叫做打擊家庭暴力犯罪，主要係集中在家暴嘅問題上面。對於有關法律草案公開諮詢出來嘅結果，有好多市民，特別係女性，向我反映就係，原先有關嘅法案諮詢，家庭暴力方面係強調佢係屬於公罪，而家在嗰個草案諮詢報告裏面嘅寫法就提及到，需要強調嘅係，雖然《家庭暴力防治法》並無特別強調家庭暴力屬公罪，但不意味著家庭暴力行為一律屬半公罪。有少少模糊咗，有少少含混咗。咁樣這個同原本法案本身嘅立法原意或者立法意向係出現咗一些差異。我個人就好唔贊成不平等條約嘅，但係如果對於要丈夫簽署唔打老婆嘅條約，我覺得這些不平等條約就每個男士都應該簽。但係同時我亦都會埋怨，點解我哋澳門社會咁多對婦女受虐嘅庇護場所，但係對於這些弱勢男士嘅照顧又好似疏忽咗？男女要平權的！其實打擊家庭暴力也好，家庭暴力防治也好，其實都係對家庭成員一個保障。

咁我有些建議給司長嘅，這些建議都係我研究收集返來。我覺得家庭暴力應該有五個原則：第一個係要堅持零容忍嘅原則；第二個係要堅持受害人本位嘅原則；第三個係預防為主，早期干預嘅原則；第四個係政府主導，多機構合作嘅原則；最後一個就係教育、矯治同埋懲罰雙結合嘅原則。用這些咁嘅方式來到去預防同埋嚴懲家庭暴力嘅發生。

在完整嘅家庭裏面成長，對一個人未來發展好有幫助嘅。一個人成長除咗先天嘅遺傳之外，後天嘅環境都相當之重要。咁我都想要求特區政府，特別係在社、教、文、體各方面為我哋青少年未來下一代係要提供一個給佢哋能夠有希望去建造一個黃金屋嘅環境，賦予佢哋一個構建佢哋未來一間黃金屋

嘅能力，一間夢想家園嘅能力，而唔係令到佢哋入住政府，好似李局長所講嘅過千蚊一日那些咁嘅貴價公立旅店。在這個過程當中，頭先我哋有同事講過，我哋特區在崔特首或者之前嘅崔司長嘅領導底下，我哋完成咗 15 年免費教育。但係好清楚，教育係目標，15 年免費係政策，係助長這個目標能夠達成嘅一個政策。係唔係免費一定教育做得好呢？係唔係 15 年嘅提供一定保證我哋教育嘅質素能夠提升呢？答案當然唔一定嘅。而家嘅問題，《私框》出咗來，狀況係點呢？教師嘅節數係下調咗，教師嘅工作量有冇減少到？係有嘅。相反，行政嘅工作，各方面嘅工作都係增加咗。學生方面又點呀？我問過教青局方面，點樣對學生進行這一個評鑒嘅工作，開展一個多元評核方式，令到學生嘅學習唔係受限於應試教育？咁教青局話會繼續努力，透過師資培訓、學校評鑒、學生輔導等等嘅途徑。但係我哋又要知道，學生在學校裏面嘅成長，除咗老師嘅教導之外，仲有好多嘅努力，共同嘅合作先能夠達成，當中包括學校嘅社工，教青局稱之為學生輔導員。有關這一些默默耕耘嘅教育嘅童工，佢哋個狀況不在《私框》裏面得到保障。雖然教青局表示在 2010 年至 2011，3 個學年裏面，對學生輔導服務嘅資助升幅已經超過咗 35%。但係我相信，或者希望梁局長能夠提供同樣嘅資料給我哋去知道，就係在學生輔導員也好、學校社工也好，佢哋本身嘅工資調升係唔係同樣去到 35% 啊？在這個咁大嘅差距比時候，我哋唔可以再對這一些不斷只有付出而唔得到相應收益嘅人再有太多嘅苛求，再去責難佢哋點解隨便跳槽，點解政府一開口全部走晒。

另一點就係關於頭先我哋何少金議員所講過嘅，有關《私框》裏面，在條例裏面未傾到或者未列明關於已經離職老師或即將離職老師嘅問題。咁我在這裏都想補述少少，咁樣一陣間張司長應該會有詳細嘅答覆。點解呢？因為有同事問：喂，咁特首來嘅時候，點解你捉住特首呀？咁我就話給佢聽，我話：我執著特首之手就想問下佢，關於這個一次性撥款在施政報告裏面點？特首話：有的了，不過嗰個法規做緊。咁跟著亦都問埋張裕司長：情況點呀？佢話：這個法規就好快會草擬到。這裏，政府公報裏面講咗，為咗已離休嘅教師，佢係有一個設想。但係為咗即將離休嘅教師，我這裏再強調一次，在公積金制度未能夠完全建立對佢哋保障嘅時候，政府係唔係都要同樣做一啲嘢？而這個承諾係特首坐在立法會裏面當面應承我同埋所有對於一個有期待嘅教師嘅。咁我稍後會將一個詳細嘅，我再將有關嘅內容向政府反映。因為，我知道，其實對於教師方面應該係多些鼓勵、多些支援，積極咁建立一個優質嘅教師隊伍，這個先至能夠令到我哋 15 年免費教育達到有關最終嘅目標，就係提升整體嘅教育素質。一個有責任感嘅教師，佢

備課嘅時間永遠都比授課嘅時間長，更加唔好計佢批改作業同埋考試、考卷嘅時間。好了，咁如果學校裏面得到良好嘅教育，咁課餘去邊呢？我成日都鼓勵人去運動場就好過去賭場，因為起碼身體會健康啲，咁去賭場勝負參半而已。

在大眾康體上，我哋嘅體發局都推出咗這個“運動易”，我都有擺到嘅，不過這輪開會多冇去到，真係，所以身體差少少。大眾嘅運動其實都推行得幾好的了，不過，仲有少少可唔可以做好些呢？就係第一，運動員嘅培訓中心最近亦都公佈咗年內招標，在 2015 年落成，咁這個為澳門嘅運動員係一個佳音來的。澳門地方雖小，但係我哋運動員潛質唔低嘅。我國第一個全世界嘅乒乓球單打冠軍容國團先生就係澳門人。在這個過程，近年亦都有唔少嘅運動員，在佢哋嘅項目裏面擺到優異嘅成績，但係佢哋係在業餘或者半職業嘅培訓底下達致嘅，這個係一個可喜嘅現象。如果這個運動員培訓中心能夠做得好一些，定向嘅目標能夠清晰一些嘅時候，我相信澳門運動員將來在國際體壇裏面應該能夠發熱、發光。

但係大眾運動、大眾康體做得好，咁仲有冇其他嘅嘢要兼顧一下呢？有一晚在立法會，離開立法會嘅時候都黃昏了，就去立法會隔離嘅草地嗰度等巴士，見到一個老師帶著班學生在玩欖球，有甚麼裝備，有甚麼設備，但係這班年青人玩得好投入，老師打得好積極。我問這班學生：你哋平時去邊度練？就在這裏，得幾隊人喺度。少眾、冇場地。我亦都睇咗仔運動場那些平地或者梯級裏面，見到一些玩滑板嘅極限運動嘅年青人，好勇敢，佢哋在這裏，在咁嘅環境底下仲飛來飛去，身手不凡。但係我問下佢哋：你哋有冇場地？佢話：何賢公園拆咗之後就有正式嘅場地。我都問過政府的，黎祖義，嗰陣時嘅代局長佢答我啦，戴祖義是吧？佢就話：有關這一個項目，民署已經著手研究，在離島區合適地點興建符合標準場地嘅可行性，以讓滾軸滑板活動愛好者將來可以在正規嘅場地進行活動，減少受傷機會。官員都知嘅，2012 年 1 月 16 號答我嘅，今年都 10 個月了，我在氹仔都未見到有好似政府有甚麼合適嘅場所試探計劃，但係我希望在未來新填嘅 5 幅土地裏面，在我哋城市規劃裏面，除咗大眾體育之外，這些少眾嘅體育可唔可以都設置一下、考量一下呢，使我哋嘅年青人或者有各種唔同體育運動潛質嘅人員，佢哋有發揮嘅機會呢？

剛才同事講咗了，醫院輪候期，但係睇返我哋嘅報告就話唔短喎！咁即係我哋嘅輪候期就好短而已，同其他地方比就唔長嘅，咁就兩個數據。咁可以咁講，而家有醫療券就可以去一般嘅私人診所裏面睇病，小病啫。但係你嘅專科嘅疾病一定去

醫院。如果排期排咁長，等得來都唔使復診，尤其是腫瘤科，這樣嘢唔等得嘅！我問過有關當局：腫瘤科醫生嘅短缺，招募嘅人情況點？局長都有答過我。我希望一陣間能夠有具體嘅資料證明政府係有做到嘢嘅，在腫瘤科裏面，尤其是腫瘤科嘅醫生，當佢離職之後，即時有所填補嘅。

最後講一講個優質嘅旅遊，啱啱旅遊車方面，睇下能夠唔夠著重個時段嘅安排。因為牌坊塞晒車，我見啲交通警朝頭早 11 點幾嗰度指揮交通都指到有辦法控制。

另外最後一點就係出年 60 屆格蘭披治大賽，希望搞得熱鬧、精彩，但係唔好擾民，唔好令到全澳大塞車，咁嘅時候就係市民之福了。

咁剩返 10 秒，咁我諗都係希望其他議員補充一下。

唔該晒。

主席：何潤生議員。

何潤生：多謝主席。

司長、各位官員、各位同事：

今日社文司嘅範疇真係內容非常之豐富。啱啱昨日就睇到報紙，咁衛生局就一個好大概篇幅，就介紹咗我哋離島醫院將會在 2017 年同埋 19 年就會落成。咁個模型都好靚。給我哋一個感覺就係話硬件嗰方面，咁我相信就係話，因為而家我哋特區政府有錢，咁我相信硬件應該唔成問題。咁但係又睇返衛生局裏面所講到就係話：我哋要提高優質嘅服務。咁優質服務我有就一個疑問了，因為點解呢？我就擺咗啲數據，甚麼數據呢？就包括我哋每千居住嘅人口同我哋醫生數的比就係 2.6，每千居民嘅人口嘅護士數嘅比就係 2.9，每千居民人口病床嘅數就 2.2。咁這幾個數我點解要計出來呢？因為這幾個數其實都係低於鄰近地區嘅一些比例嘅。

咁另外一方面亦都睇返，因為我哋作為一個……司長個施政都講咗，要有啲長效嘅機制。咁亦都睇返，十年嘅一個嘅……當時司長裏面亦都做咗個叫做完善醫療系統嘅建設方案，有個十年規劃。咁十年規劃剛才睇咗了，我哋啲離島，我哋嘅綜合大樓等等非常之靚，咁但係內裏，我就發覺司長比較少講些甚麼呢？就係關於一些嘅核心問題，我哋一些嘅人力資

源嘅問題。因為點解呢？到時啲硬件嘅晒度，如果有人嘅話，而這些病床分分鐘空嗰度，啲醫療設備又冇人去使用，手術又冇人去，我擔心這一樣嘢。咁剛才我所講嘅，如果按照十年，我就計一計條數，我哋未來在 2021 年，我哋係需要增加嘅醫生係要增加到 517 名；護士，如果按返 2.9 去計就需要大概有 600 名，如果按照你所計嘅，要去到 4 這個標準，要增加到 1,200 名嘅護士；咁病床要 400 幾張。咁病床就有問題喇，睇起上來你個綜合醫院都有成 400 張綜合病床。咁這個就給我睇返，醫生在未來十年，我哋要培訓、要增加 500 幾名嘅！咁我睇返你一些嘅工作、一些嘅舉措，淨係有在過去兩年係準備進行一個計劃，係甚麼呢？就係一次去招募大概 100 名嘅實習醫生，分兩間醫院去進行有關嘅培訓。咁我唔知而家這個情況係點樣？如果這 100 名，夠唔夠我剛才所計這條數，500 名嘅醫生嘅數量呢？如果唔夠，司長點樣去培訓這些人才？點樣去，即係話使到我哋將來能夠滿足到我哋人口嘅增長？

另外一方面，護士亦都非常之缺。咁護士，司長唔好忘記，唔係淨係我哋醫院去使用護士，而家我哋包括好多甚麼呢？安老，一些復康嘅機構，幼兒、學童、學校都需要。其實而家這個護士嗰方面，按照而家兩間嘅護理學院，我粗略計過，一年大概係培訓 100 人左右。咁我唔知 10 年後夠唔夠這一個數，係唔係呀？咁這方面，我亦都希望司長一陣間就住這一個核心嘅問題，我哋點樣在醫療方面去提供一個更好嘅服務呢？在醫生嘅配置、護士嘅配置等等嗰方面給一個介紹。

另外一方面，在裏面我亦都睇到司長嘅一個介紹，關於社會工作方面。咁社會工作方面，睇裏面就非常之豐富，因為點解呢？在未來包括一些托兒所、安老設施，一些復康設施等等，都有講到。咁但係我又睇返社會工作嘅方面，我相信司長，點講呢？要改變一些思維。因為有關嘅社會工作，我相信司長都知道嘅，單憑一個政府去做晒所有嘅社會工作，我相信係有可能。就算係有可能，我相信成本係比起而家一些非牟利社會服務機構去做，我相信係肯定政府做會貴好多。咁但係我又睇返喇，而家政府對於一些社會服務機構，佢個種合作嘅資助，我相信一定要改變思維。因為點解呢？好似舉一個例子：一個中心或者一個院舍，佢編制係 10 個人，但係而家政府，即係有關社工局局長都嗰度喇，可能佢嘅資助得 5 到 6 個人。並且這 5 到 6 個人唔係給足 100% 嘅工資，再打個折。即係意思話，佢同一個職級，在這些院舍裏面、這些中心裏面做，係同市場係少咗一截嘅。咁所以因而我就睇返喇，嘩！如果用咁嘅合作方式，將來你在未來 3 年來講又話有 40 幾個社會

服務設施嗎，一個，我擔心甚麼呢？人嘅問題、人資嘅問題。而家都知道喇，我哋澳門而家嘅就業率非常之高，有冇咁多人將來在這 40 幾個社會服務機構裏面去工作？如果有嘅話，你哋機構亦都係一個硬件，擺咗一個中心喺度，但係冇人去服務。這個我相信司長要考慮。咁另外一方面喇，如果按照而家這一種嘅資助方式，咁我相信民間這些社會服務機構做咗一段時間之後，我諗就搵返出來政府喇。因為點解呀？剛才冇講喇，資助嘅你又唔夠，又打折頭，做下做下邊個去掏錢出來呢？你唔係呀？咁但係這方面，我覺得在以往嘅合作裏面，這些咁樣嘅社會服務機構，係能夠幫到政府去做好這一個服務嘅。因為，大家都知道，未來這些嘅社會發展，我相信對這些社會服務已經係需求越來越大，更加多元化、更加需要專業化。而這方面，我哋已經同以往這種叫做救濟形式已經係改變晒喇。而這些社會服務，我相信政府係知嘅，如果唔知嘅話，亦都唔會睇返你嘅施政，在未來裏面要設幾多嘅托兒所、設幾多嘅安老院舍、設幾多嘅復康院社等等。我相信政府係知嘅，因為澳門已經係踏入一個老齡化嘅社會，我哋有關嘅這個需求係越來越大嘅。咁我想在這方面，亦都係希望司長關注而家這些社會服務機構佢哋嘅處境。亦都希望就這一個嘅社會工作，我相信要有新嘅思維去配合而家這個社會嘅發展，先至能夠做好這個服務。咁在社會工作方面，同司長作這個嘅探討，希望司長一陣間亦都作一個回應。

另外一方面，站在司長來講，亦都在旅遊方面，旅遊方面我亦都同司長探討一下。我哋而家城市嘅一個嘅，我哋叫接待能力。咁點解會提這個問題呢？我哋一年來，啱啱我哋過去咗嘅有 2,800 幾萬嘅遊客。但係按照剛才司長嘅一個介紹，都係表揚多啲嘅，都係做得好多啲嘅。但係我又希望司長知道一些實際嘅情況，點樣去改善，包括我哋而家出現一個接待能力一些不足，不如人意嘅有哪些呢？包括有通關能力不足。當然，通關能力，早兩日我哋同保安司已經講咗喇。服務質素嘅參差，酒店類型嘅選擇唔多，交通嘅配套欠佳，旅遊資源局限在一些博彩娛樂場，世遺同埋其他特色嘅旅遊景點被忽視。咁我相信，這個亦都係正正我哋而家澳門嘅一個實際情況。咁作為司下面嘅一個旅遊局，我相信係一個牽頭嘅部門。咁我好希望聽一聽，站在旅遊局，在這方面點樣去為我哋長遠嘅旅遊政策，點樣去推動我哋澳門嘅優質旅遊呢？點樣去落實世界旅遊休閒中心？希望聽司長講多啲。因為，我發覺我哋嘅旅遊部門出到去外地宣傳，宣傳甚麼呢？給人哋印象一個係賭，一個就係色情。另外一個係甚麼呢？一係就介紹我哋大賽車，一係就介紹甚麼呢？我哋有關嘅一個煙花匯演，但係少有介紹我哋澳門作為一個世遺城市，一個文化歷史城區，這一個嘅介

紹。咁我相信這方面係唔夠全面。所以我亦都好希望聽聽司長，在未來推廣我哋澳門嘅旅遊形象方面有些甚麼新嘅思維？因為，我哋好希望唔好固冇原來嘅一些想法，希望有些更加新嘅思維，咁先至能夠改善而家在外界對我哋澳門這一個刻板嘅印象：都係來賭，來睇一睇煙花咁樣，係唔係呀？我覺得這個要有一些思維嘅改變，希望司長這裏亦都作一個回應。

亦都想講一講司長轄下一個嘅文化保育。文化保育嘅方面，文化遺產，我相信已經成為我哋而家澳門社會一個重要嘅組成部分。我哋在 05 年申遺至到而家，其實我哋澳門嘅經濟係起飛，社會亦都得到空前嘅發展。咁但係我哋文化遺產嘅方面卻係面對著好大嘅危機。點解？甚麼危機呢？舉返例：幾年前，我哋發生咗東望洋山嘅景觀事件，咁而家……仲有其他我唔舉例喇，一些眾多嘅保育事件。唔單止係使到聯合國教科文中心發出一個“渦輪”，一個警告。仲加係有甚麼呢？要求我哋特區政府要在明年嘅 2 月 1 號前，唔該你哋要提出一些改善嘅措施同埋政策。咁在這方面，我覺得如果我哋有一些改善嘅措施，相信我哋澳門歷史城區，從一個嘅世界文化遺產嘅名錄裏面分分鐘有機會會除名。咁因此，我覺得司長真係迫在眉睫喇。在這方面，我想聽聽司長，對於有關工作嘅進度係點樣？因為裏面我知道係涉及於一些嘅法律，包括我哋嘅《城市規劃法》，包括《文化遺產保護法》等等這些，我想聽聽司長。否則嘅話，我哋嘅歷史城區如果除名嘅話，我相信這個責任誰都擔唔起。

另外一方面，我又睇返 2012 年施政報告裏面亦都提到要做一個叫全澳文物普查，咁但係跳咗票，冇做到。更加將變成甚麼呢？在 2013 年嘅工作計劃裏面，即係意思話已經係推咗一年了。咁我想睇睇，張司長、吳局長都喺度，對於我哋實現澳門一個叫做文化永續之城嘅前進方向，我希望唔好輕視這一方面，希望能夠在及後裏面，趕快去做好這方面嘅工作。

另外一方面亦都睇返，我哋而家澳門，我唔知司長放假、節假日有冇去一去我哋大三巴、媽閣廟去睇一睇？我唔知司長認為而家這些世遺景點嘅承载力，有冇超乎承载力？因為這個係好緊要嘅，因為我哋係奉行一個叫做甚麼呢？世界旅遊休閒中心。我哋希望遊客來到之後係講求一個享受、一個質量，唔係企喺大三巴牌坊嗰度影張相就走人，根本甚麼都唔知，咁我係唔係要這個質量呢？咁我好希望司長對於這一些嘅世遺景點嘅承载力，有冇一些評估：我哋係承擔到邊一個程度？咁這個亦都希望司長作一些回應。

另外一方面亦都想，最後了，司長，亦都想聽聽你嘅意見。因為對於控煙嘅方面，之前司長都非常之頭赤，尤其係對於博企方面嘅壓力。咁但係，最近亦都聽到我哋有嘢博企話：喂，不如盡快全面禁煙。原來我哋係有一個年期嘅。咁我想聽聽司長對於這一個消息，你認為下面嘅衛生局能唔能夠在這方面嘅工作，能夠，喂，既然都有嘢博企咁樣講，我哋亦都支持嘅，因為我哋好希望，一方面保護我哋從事博彩業這幾萬員工嘅健康，另外一方面，作為一個無煙嘅城市亦都係我哋一個方向。

另外一方面亦都想追一追司長嘅，關於嗰個大眾有關嘅行政法規，09 年到而家都未曾立法，咁我想聽聽大眾體育嘅有關法律法規現階段係去到甚麼程度？因為好多從事大眾體育嘅人都問我：喂，你又話舊年搞掂，今年而家都仲未掂。咁我想聽聽這一方面。

咁另外，對於一些活動嘅場所，而家好多居民話俾我聽都係唔夠嘅。咁希望司長從一些活動嘅場所、休憩嘅地方，能夠盡量去提供多嘢，使到我哋居民能夠享受一個好嘅，我哋一個和諧嘅社會。

多謝。

主席：崔世平議員。

崔世平：多謝主席。

司長、各位官員、各位同事：

有幾個問題想同司長係瞭解多少少。

首先就係關於社會工作嘅問題。第一條係關於家庭和諧方面。近年來，我留意到離婚率同埋家暴嘅數字都係有所上升，咁亦都間接產生咗更加多嘅單親家庭。咁實在這個係對我哋嘅社會長遠發展係一個比較負面嘅影響。咁這些家庭問題嘅成因亦都係好複雜。相信好嘅開始係成功嘅一半，但係好多時候，我哋發覺新婚夫婦多數在組織家庭嘅時候都未必有好好嘅準備或者考量。而我哋時下更加聽到好多年青人講，就係話佢唔敢結婚，因為佢未有屋，咁好似解決咗屋這個問題，家庭就一定溫暖。咁我想睇下司長在這方面，唔知有冇研究一下，究竟係唔係有咗屋，我哋家庭嘅問題就得到解決？咁這個可以係一個科學數字，希望能夠進行有關研究。如果答案唔係嘅，咁

我點可以能夠重視返其他一些對於健康家庭重要嘅關係元素，使到佢成為我哋一個長遠嘅社會工作目標，亦都係一個政策？因為，新婚嘅夫婦佢哋而家諗緊嘅東西同實際面對嘅東西可能係兩樣。咁在這方面司長可唔可以提供一些更適切嘅社會服務，特別係這些新婚或者婚前嘅輔導，使到佢哋可以更加正確認識到組織一個家庭唔係淨係一間屋？當然有間屋係好緊要，但係唔係只係一間屋。而這個問題係可以，相信對我哋家庭嘅和諧係會起到好重要嘅作用嘅。

第二個問題係老齡化嘅問題。澳門人口老化，其實並唔係澳門嘅問題，全世界都面對。特區政府一直都係用咗比較有力嘅，用唔同嘅津助方法或者基金發放嘅方式來到輔助我哋老一代嘅人在財力上嘅一個紓緩。咁另外，亦都係增建公共房屋，係為佢哋提供一個美好嘅家園。咁點樣可以更加周詳咁樣為一些高齡嘅人士制訂長遠嘅政策，其實，我相信可以更加係值得去研究。咁鄰近好多地方已經係積極在近年來推廣好多係前瞻性嘅一些老齡嘅政策，好似係鼓勵長者去持續進修或者做更多嘅工作，令到佢可以能夠係適應到社會發展嘅同時，亦都有再就業嘅機會或者學習嘅機會。甚至可能係同企業嘅合作，令到長者可以更適切，有利爭取到佢嘅工作崗位。因為成熟嘅一個社會應該係對各個階層嘅生活都有所關顧，而唔係只係保證佢一個生活嘅空間、生存嘅空間。

咁為咗增進我哋長期對於高齡人士嘅發展，長線嘅可持續發展研究，在這方面，我希望政府可以多考慮，點樣能夠令佢老有所為。譬如可以令佢點樣再發揮佢嘅人生嘅經驗同埋佢嘅餘熱，對社會繼續做出貢獻。對於老人來講，再就業這個研究，係唔係值得我哋去考慮？因為，澳門而家大家都知道，人力資源非常緊缺，但係好多係政府部門好或者有些企業好，確實佢有一個比較指定嘅退休年齡。咁但係好多退休嘅人士，其實我發覺都非常之健康，身體可能比我哋一些未退休嘅人士仲要健康。咁但係，在這方面來講，我哋輔助老人再就業嘅政策其實可唔可以結合輔助中小型企業嘅政策，同埋係佢哋嘅再就業，亦都係相信可以輔助到，我哋澳門唔需要輸入咁多外勞？咁係點可以研究出一個有系統、有制度嘅方式，令到老人可以在這方面發揮到佢嘅作用，希望司長能夠係有所研究。

關於關顧老弱方面。一些身體比較弱嘅老人，其實亦都分佈咗好多在新區、舊區裏面。咁我哋首選其實都係希望嚟返自己嘅家居做個照顧嘅。咁在這方面，其實我哋對於人手嘅培訓同埋佢哋嘅服務內容是否能夠可以與時俱進咁樣有所提升呢，亦都希望關照一下。

另一個問題，睇到司長嘅報告裏面提出有一個計劃就叫做女性參與博彩活動及心理健康狀況嘅研究。咁當然，男女有別，男女平等，咁這個我都係認同嘅。咁在這個研究裏面，想多瞭解一下，我哋係對整體市民，即係包括男、女，這方面嘅研究報告是否已經完成咗呢？可唔可以同我哋分享一下有關嘅資料呢？作為男士，咁我都對男士參與博彩活動同埋心理健康研究都比較關注，咁希望在這方面，唔知可唔可以提供一些資料？定係首先係女士優先，然後先至輪到我哋男士呢？病態賭徒，其實男女都一樣嚴重嘅。目前來講，在這方面嘅研究，我哋睇見多數進行都係從一個社會角度方面。咁係從醫學角度方面，尤其是病態心理這方面，唔知道有甚麼進展？同埋有冇一些相關課題已經係兩者能夠結合咗？希望司長能夠介紹一下這方面嘅工作。

至於係濫藥方面，我就覺得青少年嘅濫藥問題日趨嚴重，而且係屬於慢慢開始向更低嘅年齡發展。咁個案亦都係有好多係有隱性，咁所以從簡單統計，不一定我哋能夠得到正確嘅數字，但係無論如何都好，係值得我哋正視嘅。家居濫藥或者吸食冰毒方面其實都有上升嘅趨勢。從一些資料顯示，其實吸食冰毒會使我哋有幻覺、幻聽，更加容易因為咁來到亂性，發生一些其實好嚴重嘅行為。咁反觀，其實在網上亦都有唔少材料可以介紹到，人在屋企都睇著電腦、網上，都知道大約點做這個違法嘅東西，原來這個冰毒係可以家居做得到嘅。咁發現在這個禁毒工作方面，如果我哋要從源頭做起，其實都係一些禁止生產這些新型嘅毒品化學劑入口。咁但係，亦都睇到這個現象在我哋嘅禁毒法裏面有相關嘅附件係列明一些唔能夠進口嘅材料。咁但係因為佢係屬於一個法律嘅文件，所以我哋再去修改，其實都必須要經過立法嘅程序，咁時間比較長嘅。咁但係好多化學材料其實日新月異，眨下眼又一些新嘅東西可以代替一些舊嘅東西做返這些冰毒。咁在這方面，想睇下司長會唔會研究一下，具體，對於這個禁毒嘅毒品進口清單裏面，係有所用一個更好嘅方式或者係用一些行政法規嘅方式，從而去簡化同埋更及時將這些害人嘅毒品原材料可以有機控制？咁希望都聽聽司長嘅介紹。

第二方面係關於教育方面，人文質素。在近十幾年來，我哋都係發覺漸漸電腦開始越來越流行，鍵盤代替咗毛筆好、鉛筆好或者原子筆，咁硬盤亦都代替咗我哋嘅記憶力。咁時至今日，其實網絡亦都取代咗我哋社會生活上好多嘅聚會同埋見面。咁人其實大家之間嘅對話、寫字等等，都開始越來越唔注重。咁不知不覺之間，其實對於我哋嘅生活習慣同埋人文質素都起咗變化。咁科技固然我係相當支持啦，咁我覺得係對社會

嘅發展進步非常之有利。咁但係點同時亦都係傳承返我哋嘅文化，其實都值得大家關注，否則就好容易培訓咗一批批嘅“機械人”出來。

因此，我亦都想關注下在教育方面，對於我哋人文質素嘅培養，尤其是一個傳統嘅文化、傳統嘅智慧、傳統嘅美德。這幾方面，究竟在長遠發展裏面，我哋在教育方面係有些甚麼部署？點樣先可以更適時令到青年人既在佢嘅生活技能上面、在科技方面係能夠有所培訓、有所發展，但係亦都能夠確保佢對於我哋文化嘅傳承亦都有所關顧？咁在這裏希望聽聽司長嘅高見。

閱讀嘅素質同埋思維，其實在這方面，亦都係同我哋上面所講嘅文化思維有相當嘅關係。近年來睇到學生能力國際評估嘅計劃，即係俗稱 PISA，就係突出咗我哋本澳嘅學生其實在其它方面都唔錯，但係閱讀嘅質素係偏低嘅。主要反映咗在閱讀嘅材料同埋反思同埋評估嘅能力係不足，判斷訊息嘅真偽以及歸納總結嘅能力都比較偏弱。除咗增加我哋學習用品嘅津貼之外，請問司長對這個情況有甚麼對策呢？

在旅遊方面，咁我哋都年年都聽到就係格蘭披治大賽車嘅盛事，亦都係城中嘅人唔會唔知。明年就係 60 周年，所以大肆慶祝其實係合情合理嘅。咁但係隨著城市嘅發展，其實馬路交通嘅問題都日趨嚴峻。過去，我哋細個嘅時候，細路仔可以在街上面玩，車都係個個都可以泊在自己屋企門口，所以養成咗我哋仲有一個“優良傳統”，就係希望車能夠泊在門口。咁所以，舉行大賽車亦都係一種重要招徠吸引遊客來澳門消費嘅一個手段。但係，時至今日這個盛事已經不一定係咁樣嘅發展。當然唔應該放棄我哋這個品牌嘅項目，因為事實上，全世界對於澳門嘅大賽車都係相當之關注，而家培訓咗一批批一級方程式嘅未來車手都在這裏出現嘅一個搖籃。咁但係，對於慶祝這個活動同埋處理這個活動方面，唔知司長有冇甚麼新嘅思維？頭先講到係希望成為一個全年嘅盛事，咁我唔知道係從長遠嘅角度有冇一些一系列嘅計劃，可以令到我哋係能夠眼前一亮嘅？聽講就仲加可能係我哋舉行一個兩個禮拜嘅大賽車，想瞭解一下當局有冇做一個事先嘅可行性研究？結論係甚麼呢？因為隆重其事係正常嘅，但係而家我哋大家都講創意，咁唔知會唔會考慮一下將這個兩個禮拜嘅賽車可能係濃縮成為一個係整個禮拜都相當多事情可以發生，好多活動嘅？譬如好似將星期二練車練到星期四，星期四往後連續賽四、五日，而係濃縮基本上都係一個禮拜，但係就唔需要跨越兩個禮拜，從而使我哋個塞車嘅程度可以能夠舒緩到，這些臨時措施對於

正常交通運作嘅影響。除此之外，更加可以係唔係研究我哋增加多啲嘅獎金能夠吸引更好嘅車手，令到澳門嘅市民或者遊客可以見得更多好嘅車手在我哋周圍出現呢？咁對於市民方面，其實好多時市民都覺得這個大賽車同佢都未必有關，如果佢唔去睇，唔知可唔可以就係增加啲由車手或者退休車手，特別接受我哋澳基會資助嘅車手係開佢嘅座駕，等市民有機會坐在隔離真係兜一兜風，享受一下我哋東望洋大賽嘅車道，令到大家對於這個 60 周年大慶都可以係津津樂道一下？

文化創意方面，其實文化產業都係知道大家對於佢寄予厚望，咁我哋都希望成為世界旅遊休閒中心同埋多元化發展嘅核心內容，更加係橫琴同澳門合作這個業務裏面嘅一個重要內容。咁想瞭解一下，在時裝設計、動畫創作、電影製作、文化特工等，對於人才培訓同埋將佢由事業型轉向產業型嘅轉化之中，有冇甚麼具體嘅發展規劃、進度同埋部署？同埋有甚麼預期嘅效果呢？在利用橫琴土地發展這個文創產業嘅事項上面，我都想聽聽有冇啲新嘅消息？

最後講講衛生範疇。在近年來，社會上有唔少嘅企業同埋各個政府部門都積極鼓勵佢嘅員工係參與義務工作。因為義工係能夠助人自助，亦都在冇利益嘅關係之下可以能夠作出奉獻，對佢自身同埋對社會其實都係可以產生正能量嘅，特別對年青一代培養佢哋關顧嘅愛心係尤其明顯。

另一方面，聽到政府在施政報告裏面係組織緊一個叫做仁伯爵綜合醫院嘅義務工作隊。咁想瞭解下，計劃在明年上半年開始嘅時候，會有一些甚麼計劃嘅部署，這個計劃嘅由來，人手嘅規模，培訓內容同埋工作範圍。

在人力資源方面，澳門人口嘅規模就不斷增長，對醫療同埋相關設施需求亦都同步上升。其實，醫療界同澳門都係同樣面對人力資源嘅問題。早有醫護人員表示佢哋嘅工作壓力已經好繁重，求助嘅病人亦都好多，咁結果就係好多人對醫生等候得不滿或者係醫生診斷嘅時候覺得都係唔夠嘅，長此落去其實對我哋嘅醫療質素影響相信都比較嚴峻。在這方面想瞭解下，司長有冇一些能夠配合人資需求嘅一些正式手段或者計劃去部署，令到我哋嘅醫療服務，特別在人資方面嘅發展能夠係同硬件同步配合？

最後一個就係電子嘅病歷。施政報告亦都提出咗構建全澳個人嘅電子病歷。計劃先係整合咗政府嘅醫療機構，鏡湖醫院同埋科大的病歷。相信醫院嘅資源共享可以創先河。想瞭解一

下，嚟緊嘅電子病歷工作上面，在資源共享方面同埋保護私隱方面有甚麼正式嘅手段同埋措施？咁亦都由誰來到去負責運作？

主席：高天賜議員。

高天賜：多謝主席。

司長閣下、各位官員、各位同事：

在入題之前，即是澳人澳事，唔係澳人澳地，澳人澳事，司長，你管轄嘅範疇係好有直接關係嘅。民生方面，頭先都見到好多同事都有講到有關民生嘅，尤其是長者、殘疾人士、智障、單身家庭。我希望唔好令到佢哋唔開心，好多時都係好長時間先至得到一些佢哋應得嘅措施。

在入題之前，我哋大家都知道司長係來自邊呢？十年在廉政公署。我相信廉政公署同埋審計署都係根據《基本法》第 59 條，大家都知道，佢哋係獨立嘅部門，直屬行政長官嘅，應該受到尊重嘅。但係，我哋見到，亦都啱啱陳明金議員所講到有關審計報告指出教育局一些批評，我覺得係應該面對一個正面嘅態度。佢哋唔係話真係得閒無事就去工作，搵啲政府部門去做嘢，佢哋嘅職責就係要監察政府部門，係唔係有空間可以改善呢？應該可以嘅，應該個態度唔係咁嘅。除咗審計署之外，來自廉政公署嘅意見書，司長，你屬下嘅衛生局，長久以來，啲護士、啲醫生、啲助理、啲公共行政做得好辛苦，但係得到甚麼對待呢？佢哋唔係人嘅對待嘅！啱啱我在這裏做緊、聽緊，我都收緊訊息，希望反映給司長：你係要用人嘅方式來去對待下屬嘅。

司長屬下嘅衛生局，佢哋有途徑、有辦法，結果去到廉政公署。廉政公署出咗個報告給衛生局，指出要以雙倍嘅計算來去計算超時工作。由 2012 年 6 月，點解唔執行廉政公署個意見書呢？點解呢？係唔係當佢冇到呀？咁不如直接話俾佢聽我哋會遵守啦！一係你就話返俾佢聽，話俾廉政公署聽：你哋唔啱。其次就係投訴者算唔話得嘅，現時來講，公務人員可以企得出來去廉政公署唔係容易嘅事！面對幾大嘅壓力？隨時唔續約，好似柯寶蓮咁樣，10 個墓地，咁樣點呢？你哋點樣對待佢呢？石沉大海，至今都未去計算！司長，你收到一個行政公職局嘅通知書，通知所有你屬下嘅部門不能夠外出啲訊息，你點處理呢？將來有冇人夠膽去廉政公署投訴？這份嘢我希望交給司長。這份嘢司長你點樣處理先？這個係你嘅責任來嘅，這個

係你嘅責任來嘅！連簡單講句說話都唔得。普通嘅文件、返工打卡嘅文件都唔可以給廉政公署，將來邊個去投訴？邊個呢？我希望司長回應。

過去幾個司長我都感覺到一個叫做甚麼？催眠術。即是我哋有我哋講，你哋有你哋嘅做法，一年一度咁就算數。我希望司長真係回應我所講嘅問題。方方面面，好多樣嘢都係來自而家我哋社會上遇到所有咁多嘅怨氣，就係咁樣得出來，返翻轉頭都係一樣嘅。你司長屬下有幾個部門，幾個部門嘅投訴機制好差，投訴機制好差！例如，司長，你屬下有嘅教育局，教育局裏面有甚麼？有老師。在場有澳大、有理工學院、有旅遊學院、教育局，全部都係文化界嘅人士。但係少年感化院竟然有一批老師係教育局嘅，教育局容許佢哋去教書，竟然用包工合約。秋後算賬，10 個老師而家剩返 4 個。我投訴過教育局，冇辦法，冇辦法解決，至點呢？問埋門，放狗出去囉，咬人囉！情況就係咁喇，而家少年感化院，邊個幫到我呢？我揸住個熱煎堆，咁點處理呀？這些係教育局要處理的，一係你就唔俾佢哋，唔認可嘅學生。而家有啲學生係唔使上堂嘅，在少年感化院，將來出來點呢？佢哋自己都擔心。好多投訴呀，少年感化院，嗰個老師來的，點解冇人理呢？我哋講緊老師，講緊《私梘》又好、公共又好，但點解這一批人，10 個 8 個係唔係人來嘅？這些都係人來嘅，所以要人道嗰方面去處理囉。

好了，講到我哋新嘅醫院，我哋嘅醫院去咗邊呢？係唔係因為既得利益嘅作為，造成今時今日？你而家，衛生局局長，我又要講喇，唉，真係慘！年年都係你個個範疇。我哋嘅醫院去咗邊呢，而家？嚟，陳明金議員俾咗嗰條數我就係咁樣嘅：99 年 12 億，2012 年 44 億，2013 年 52 億。我這裏條數少咗，但係將近 5 倍，5 倍呀！5 倍嘅錢，這些錢去晒邊？這些錢去晒邊呀？點解仍然咁多人要投訴？我哋嘅山頂嗰個門口好似街市；急症室呢？難民營！喂，啲公務員有給錢的，點解下降晒嗰個質素呢？我哋唔係乞。好了，我諗司長你感染咗陳司長嗰個問題。2012 年，你有咁多方案係應承咗，我用紅色嘅，紅色寫給你嘅，2013 年冇晒，我哋身為議員點樣跟進呢？你會做些甚麼呢？好多樣嘢唔見咗，2013 年唔見咗！我費事數，因為我時間無多。我這個送給司長。

仲有幾多？六分鐘？

好了，我哋講下壟斷。司長，你屬下有些部門係人為壟斷又好、法例造成來壟斷又好、或者法律嘅空間又好，不過未講這樣嘢之前，亦都警惕司長，隨傳隨到係法例 18/2009 年立法

會頒佈嘅，第 24 條講明嘅，要立法！點解而家剝削啲護士權益同埋權利？點解呢？佢哋唔係人來的？點解唔可以立法？你哋知的！同樣，醫療事故唔使講，頭先都有同事講，十幾年，將個波踢來立法會，就話給澳門市民聽嗰個醫療事故法就在立法會。我出街嘅時候：喂，你哋而家快啲頒佈啦，這個法例而家在你哋嗰度。原來唔係來嘅。好聰明呀，李展潤真係好聰明，好彩我哋鄭志強議員又聰明，俾返個波佢。

我講返壟斷，有啲嘢頭先我開場白都講咗，個投訴機制要做得好。我有些不愉快事件係同旅遊局發生嘅，點解呢？我哋陳司長經常都講我哋嗰個一站式服務。一站式服務即是為咗去解決人民行政手續各方面，方便市民，原來唔係，調返轉頭。我有一個例子想同司長分享：旅遊局發牌，一些叫做桑拿牌。我上次幫一個朋友就去瞭解，我從來都有這個經驗，問下、問下、問下，就有人同我講，有一個朋友同我講：不如咁啦，有一個朋友就用 50 萬就可以一站式即刻幫你搞掂，全部政府部門佢會同你穿梭遊說，咁就搞掂，唔使你逐個逐個去。咁這些又係甚麼態度呢？其次就係我親身經歷，就在 AIA Building 裏面一些夜場，亦都係棘手。問來問去旅遊局有辦法，係唔係要用嗰個旁門左道嘅方式來去解決先得嘅呢？所以返翻轉頭都係投訴機制。而家我哋特區失敗就係因為你嘅投訴機制，投訴機制差，好差！你人員不斷膨脹，但係解決唔到問題。所以司長唔好樣樣嘢都 amigo, amigo amigo, 咁解決唔到問題。我哋需要問責嘅。出年陳司長又講喇，佢話要問責啲局級嘅領導。我相信司長你有能力嘅，因為你在廉政公署做咗 10 幾年，應該係可以問責到你啲下屬。我唔希望一年一度，可唔可以來多幾次這裏，我哋交換意見最好喇。因為行政長官來三次，咁你又來三次都好，啲司級官員，係唔係？

講到這裏，我又要講第樣嘢喇。我哋租科大醫院裏面一些床位，亦都每年特區政府經過衛生局嘅預算同埋其他都係資助好多醫療機構、醫療社團，但係嗰個效應有冇做過評估？究竟嗰個得益，澳門市民有冇好處呢？舊年，我記得科大醫院裏面嘅急症室，我係講過係急門診嘅，因為有專科醫生嘅。本身山頂醫院同我講：你千祈唔好車一個有心臟病嘅人去科大，因為死硬的，半個鐘頭，你唔返轉頭過橋就有條命仔喇。咁你心臟，半個鐘頭，係心臟醫生講的，咁而家去到有啲人，我唔知司長有冇去過啦，嗰個所謂科大概急症室裏面有專科醫生的，係急門診來的，有冇改善呢？調轉頭就門咗氹仔衛生中心。氹仔衛生中心服務以前係 24 小時嘅，而家呢？有冇開返呀？居民要嘅嘢你就唔去做，變咗遇到一個好大概問題囉。

最後我仲有兩分鐘，兩分鐘同你講，司長，你要照顧多啲衛生局同埋屬下其他一些部門嘅員工。有好多條輪緊班，輪班嘅津貼係 20 年前嘅，20 年前嘅報酬來嘅。唔使做嘢架咩？點解有建議給陳司長呢？你覺得咁樣係可以做得咩？急症室嘅護士大部分都病的，點解病呢？大部分 9 成以上就係做到病，個個都係冇停手嘅，返工就有停手嘅。這些係唔係可以改善呢？係唔係時間方面、報酬方面，根據法例去遵守的嘛？所以我好希望隨傳隨到同埋 20% 嘅個 20 幾年嘅津貼係有待改善囉。好唔好呀，司長？

唔該你。

主席：好，我哋現在休息半個小時之後就繼續會議。休息半個小時。

(休會)

主席：好，我哋繼續開會。

我先再讓四位議員發言之後，然後將時間交給司長作一回應。

請麥瑞權議員。

麥瑞權：多謝主席。

司長、各位官員、各位同事：

司長，好多人話你好好人，又經常同市民一齊打波，咁又有乜架子，因為打波好易給人鬆你一踉的，咁你都可以同佢一齊打波，即係你人緣好好嘅。因為我都跟過你去東澳足旅行，都見識過你做領隊嘅管理才能。所以好多市民話好信任你嘅。大家都認為司長所管轄嘅社會文化範疇整體來講都係做得唔錯嘅，但係都有啲做得唔夠嘅地方。

下面我就要講下醫療、文化產業、教育、老師薪酬、托兒所等等，不過唔知夠唔夠時間，唔夠時間我書面給司長。剛才就阿金哥講得好精彩，咁不如我講文化先啦。

文化產業點樣可以形成呢？因為頭先司長嘅引介係講文化永續之城嘅，原來澳門要做，即係我哋真係要講下文化喇，如果唔係，這個世界旅遊休閒中心點搞呀。實實在在，如果澳門

缺乏這個文化元素來講，咁就係不折不扣嘅賭城。賭城唔係好聽，係負面嘅。但係澳門嘅社會現實，就係話，要改變呢，咁首先就係睇下政府點樣去諗，同埋點樣落實去做，同埋搵甚麼人去做係好緊要嘅。咁在這裏我想問司長，文化局點樣理解文化產業嘅定義呢？專家學者話給我聽，在產業經濟學裏面指出，唔係，在嗰個文化嘅定義裏面，先講文化先啦，廣義就係指，文化就係人類創造一切物質產品同埋精神產品嘅總和；狹義來講，文化就係話，在意識形態所創造嘅精神財富。自從局長上任以來，搞咗好多國際性嘅文化活動，同埋文化中心裏面好多大型嘅世界有名嘅音樂會，逐漸都包裝成澳門好似都好有文化。但係唔知係唔係曲高和寡定抑或係澳門人口少定缺乏藝術細胞，往往水準越高嘅表演就越似乎冇甚麼人知道有這個活動存在，去聽、去睇，究竟係宣傳問題，定因為我哋澳門人嘅文化水平未達標呢？在這個現實必須要改變嘅，如果唔係，澳門真係名符其實嘅賭城。所以，吳局長所辦嘅活動，我好支持嘅，亦都好認同。但係一陣間都想聽下司長，想還想，點樣培養到澳門嘅藝術細胞、文化素質呢？點解決這個現實問題呢？舉個例：在台灣嘅書店可以 24 小時嘅，營業都有人睇書嘅，咁澳門有冇市場呢？文化，專家學者話，係需要時間去沉澱、累積，仲有環境嘅薰陶去形成，唔可以夾硬來嘅。唔係話政府想有文化就有文化嘅，更加唔能夠由政府包辦嘅，更加遑論文化創意產業。所以對於早前推出嘅文化創意產業基金，我諗都係時候要作出個績效評估了。因為點解？頭先我講文化已經咁複雜喇。講下產業，老實講澳門有冇條件成為一個文化產業出來呢？如果唔係真係拉牛上樹喇。在經濟投資方面，更加擔心係擔沙塞海。咁專家學者就在這方面就提出，佢就話，司長，產業，唔知你哋嘅定義係點，咁但係在經濟學嘅定義來講，就係指一個經濟體系中，有效運用這個資金同埋勞動力去從事生產經濟物品嘅各種嘅行業，咁就叫做產業。佢應該係屬於經濟部門嘅範疇，咁點會落到去你哋嗰度做嘅呢？名正言順，咁咁人話：你哋咁樣會燒銀紙嗎！因為咁樣，無論你幾多人力物力都好，都好似係錯配。所以大家都懷疑點樣先有效咁樣成為一個文化產業呢？成為澳門嘅一個新嘅發展方向呢？

好了，咁唔好講產業這樣嘢，就講而家其他，我哋譬如去建築行業嘅，已經一年都過百億嘅營業額，咁係唔係算係一種產業呢？咁但係而家文化產業甚麼都有，咁就話講兩句說話就會變咗做“文化之都”同埋係成為一種產業，會唔會真係有啲癡人說夢呢？所以專家學者建議，係唔係從源頭開始、編輯好教材開始，配合教育，身教言傳，強化德育之外，仲要從小培養學生嘅讀書文化氣質。起碼我哋都要有書店 24 小時至得嘍，有人幫襯，創造一個學習嘅環境。咁順便一提嘅就係

話，點解而家有咗葡文辯論比賽嘅呢？在文本裏面就話有英語嘅遊學，咁舊年都有英語辯論比賽，今年亦都有提及英語辯論比賽。前年就有葡文辯論比賽，咁今年兩個語文比賽都有，咁咁文化去咗邊呢？咁所以，文化係要時間沉澱，唔可以鍾意就做下，唔鍾意又做下，你讀書咁都係唔掂㗎！咁係唔係，即係就強調澳門就係與別不同呢？所以在這裏想同司長講下，其實《基本法》裏面給咗我哋好大嘅空間去思考嘅，點為之一國兩制，澳人治澳。司長，如果有機會都想跟你一齊再去學堂度再進修下。

好了，講返頭先我哋講到產業這樣嘢，唔能夠勉強嘅，尤其是文化方面。有專家學者叫我問，佢真係諗極都諗唔明，點解，即係政府成日講文化，但係澳門大學嘅研究，好少研究甚至可能有研究澳門本土嘅文化，啲論文，尤其是國際性個個，都係研究外面嘅嘢，唔係研究澳門嘅。咁點解連澳門嘅大學都唔研究澳門嘅文化，這樣嘢值得大家深思。因為，在外地嘅大學都係注重研究自己嘅本土文化，咁當然亦都係研究外地嘅文化啦，咁這樣嘢我哋輪蝕咗俾人了。咁又唔創造文化條件給個環境，給本地嘅教授去發揮，即話連本地嘅種子都有埋，咁點形成文化？點形成產業呀？咁個理由聽講就係話因為外國學術權威機構唔認識澳門，權威嘅機構，咁所以你發表研究澳門本地文化嘅論文係冇市場嘅，咁所以個個都唔寫。這個係唔係澳門發展嘅方向呢？澳門大學係唔係我哋澳門人嘅大學來嘅呢？

好了，咁講到嗰度，又有啲專家學者給咗啲意見，要改變這個現實同這個惡劣嘅環境就要必須從三方面著手：一、必須要強調澳門大學（所有嘅大學都係）嘅研究以本地化為第一；第二就係民族化，民族化嘅意思即係以中國嘅文化為基礎；第三先係國際化。仲有要培養本地社會發展服務我哋，咁先至係我哋大學。如果你話連自己本地都唔承認本土文化嘅存在價值，即係強調學術，專門發表符合外國人市場嘅文章，咁澳門仲邊有自己嘅文化呀？係唔係本末倒置先？如果澳門嘅大學都輕視自己嘅本土文化，唔去研究，邊個幫我哋研究呀？點樣按《基本法》咁搞好這個“一國兩制，澳人治澳”呀？老實講，在大學如果唔為澳門人服務，又唔重視民族化個個研究嘅價值，咁我哋澳門仲有甚麼文化呢？澳門嘅大學唔研究澳門，咁仲有甚麼傳承嘅價值呢？最搞笑嘅就係澳門更加有重點咁重視培養本地嘅老師。咁啲本地嘅老師話佢哋個入職嘅條件都係同外地老師一樣，但係個薪酬同待遇，外地老師高過佢哋好多。所以，本地嘅教師又話佢哋都有可能做到這個文化嘅種子，因為政府都唔培育佢哋。教育機制又有缺失。司長，市

民叫我問下你哋政府，咁係搞文化定抑或喺度搞“搞笑文化”呢？

既然講到你哋都話要培養老師，咁我順便一提，而家嘅老師，即係大學老師嘅薪酬，在你哋個施政報告裏面，就係話：建構一個長遠教育體制係好緊要嘅。而家現行嘅高等教育體制裏面，其實你哋知唔知出現咗有兩大問題呢？第一，大學嘅老師薪酬唔平衡，叫佢哋點樣安樂去教呢？我聽這些教授反映，你哋只係在乎名校出來嘅老師聘請，待遇就高啲，以個人名義交申請表去學校、大學度申請做老師嘅待遇有明顯嘅差異。根據澳門大學、旅遊學院同理工三間學校嘅資料統計，教授、副教授個個人工就係有差異嘅。差異係幾多呢？好似澳門大學來講，教授就係有最低嘅起薪點，有 975 點；而理工嘅……旅遊學院就 770 點；理工嘅起薪點係 770 點。老實講，係澳門大學高過佢哋好多嘅。仲有一個問題嗎，因為這些資料係政府給我嘅。咁就以旅遊學院為例，佢教授得 770 點，咁澳門大學有最低起薪點同最高點，但係旅遊學院得一個 770 點。咁如果理工又一個特別嘅現象，770 點，永久居民，就至到 980 點，咁香港就 980 點，咁係唔係香港一入職就 980 點？咁點解澳門永久居民仲要得一個，價錢仲係最低點，香港人來最高點？即係等等這個又有晒數據，因為數據係政府給我，都想你哋解釋一下，係唔係即係同工唔同酬？定抑或有甚麼特別因素？在這裏順便又提一提嘅，在教師薪金嘅唔同裏面，其實我地好著重在老師裏面個個人職起薪點，究竟本地嘅老師同外地嘅老師係唔係唔同？

好了，再講了，講返文化方面嘅嘢啦。文化產業，大家覺得梗係有啲問題嘅。但係亦都講，吳局長你個個範疇其實推廣文化裏面真係做咗好多嘢。但係，要提嘅就係話，在文物嘅保護方面，北京同台灣嘅學者去睇過益隆炮竹廠嘅維修，有些建議給你，修舊如舊，這裏唔多講了，因為我一陣間給啲相你睇，因為最近修葺個個就同隔離舊個個係唔同嘅。咁但係，你哋係好關注於文化嘅專業方面，但係在管理上唔單係你嘅部門，好幾個部門都發現，廉政公署係發現你哋有些違規嘅現象，即係算唔算貪污腐敗定係行政違規呢啲咁呢？在這方面來講，其實之前就好多市民都提出過，你哋過去這個招標模式係有問題嘅，亦都提出過警告。因為按照你而家嘅結構同埋招標嘅程序，好容易造成一個貪污腐敗嘅景象。但係，因為大家對司長都有信心，因為司長以前係廉政公署出來嘅，咁我覺得在你部門裏面應該係有條件、有能力做得更好，作為其他部門嘅一個示範。咁所以在方面來講，我好希望這些只係一個偶然嘅事件，以後都唔好去發生。

再講，在醫療方面，我覺得而家普遍個醫療就好好了。但係當要去驗、檢查嘅時候，時間太長，真係唔死都等到死。咁係唔係可以外判給其他嘅單位去幫你哋去照 CT 或者核磁共振，做呢啲？咁可以之前要先審核佢個資格合唔合資格，同埋訂定一個資助嘅上限，咁又得唔得呢？同埋醫生都要考核，這個係最基本嘅。

唔該。

主席：吳國昌議員。

吳國昌：在正式開始之前就花少少時間通下水先。

頭先就在 Cantine 嗰度，我哋有男有女嘅議員就已經有個共識，對於司長範疇個家庭暴力法，突然之間……初期嘅諮詢好清楚，對長期服務團體都各指出必須用公訴罪來到處置，但係後期突然間轉軸，都懷疑你係違反理諮詢程序規範。但無論如何，有共識就係話：喂，吳國昌，一陣你一定要搵佢呀！咁我話：即係理性啲，大家理性啲。有議員做證嘍，真係咁講嘍，我話：大家理性啲，要聽埋政府嘅解釋，然後先至係睇下點樣判斷。咁但係，因為我哋主席唱咗又安排咗，我有機會聽司長嘅解釋就直接要提問了。所以在這裏係通水給司長，就是說要明確解釋家庭暴力法，公訴罪處理有甚麼問題？如果你提唔出，或者你嘅下屬提唔出必然唔應該以公訴罪來處理嘅清晰理據嘅話，男子漢大丈夫，就係用公訴罪，在公訴罪範圍裏面點樣分情況來到分階段去處理係更為適當，就唔好係咁堅持啲錯誤嘅意見就亂咁給人搵。

OK，通水完了，正式開始。

我今日提主要一個就係都有其他議員提及到嘅，就係中央公積金。中央公積金而家就廣大市民都由政府安排參與咗，咁但係，就一路係隨著貨幣貶值，一路縮緊水。咁到到將來，老人家要攞個陣時，剩返幾多，冇人知。所以我一直提，有冇利息呀？點樣保值呀？咁結果就係兩次嘅書面答覆，就係話：將來會有嘍，將來就用存款，或者給你選擇用買股票或者買基金等等方式來到保值等等。咁結果係搞到今年都落實唔到。咁再問嘅時候就話：喺暫時未能夠轉制正式成為一個正式嘅中央公積金之前，我哋將佢擺落銀行存款嗰度，用定期存款方式擺住啲錢。咁有冇利息派嘍？講唔講得清楚？我唔係話幫市民搵著數嘅問題，唔係搵著數呀而家，而家嘅問題係甚麼？係點樣能夠令我哋所謂雙層嘅社會保障這個中央公積

金能夠真係持續可行，係這個問題。

因為第一步，你建立得這個中央儲蓄嘅制度變成一個中央公積金，有兩樣嘢一定要發展嘅，一樣當然就係話要搵更多嘅機構一齊落水，一齊去供，供下供下變成差唔多全部所有機構都願意去做嘍。一個係搵多啲機構去。另外一方面，你個投資管理嘅保值一定要給人有信心。這個係好基本嘅，投資管理保值唔能夠給人有信心嘅時候，你如何能夠吸納廣大大嘅社會參與真係一個持續可行嘅中央公積金呢？在這方面來講缺乏一個交代，我會覺得係好唔穩陣、好 Hea 呀，真係！這方面一定要有個清晰嘅交代，而家就算未複雜化之前，你點樣投資保值，點樣讓大家知道令人安心，這個緊要。

第二就係亦都希望司長真係有些事要親自出馬，可唔可以真係親自出馬搵搵？譬如一些係好有可能嘅機構，例如六大博企啦，搵埋出來：你哋已經各自有員工公積金制度啦，係唔係？咁我哋澳門特區有個中央公積金，介紹情況係咁樣，有點樣嘅具體轉移合作嘅可能，令到佢包括入中央公積金系統裏面，首先有一筆擴大咗佢先呢？跟著仲有嘍，我哋水電、電訊等等巴士這些特許經營機構，已經係分別，甚至巴士都已經開始分別建立佢哋員工嘅公積制度了。在咁嘅基礎上邊，司長係唔係都可以出馬又搵埋特許經營機構，初步研究可行性：你哋仲憂慮些甚麼？有些甚麼憂慮嘅，我哋搞清楚佢，咁來到又將佢吸納埋來呢？

最後，譬如你下邊嘅教育局、社會工作局，咁你資助緊同埋支援緊好多嘅這些係教育機構，甚至到將來進一步嘅完善嘅時候搵埋社會服務機構，咁佢哋能唔能夠建立返相應員工嘅一些公積制度入埋中央公積金系統裏面？咁做下做下、擴大擴大嘅情況之下，將來就可以做到佢係走向全民化，都加入埋一個大家有份，用各種唔同形式參與供款嘅一種中央公積金。咁將來佢會唔會再同上面嗰層社會保障合併，另計這個，好長遠嘅事。但係起碼中央公積金要做這些工作，先至會有實際上變成一個可行嘅、持續嘅架構。如果唔係，一年一年咁 Hea 落去，我就擔心將來就唔見咗。因為將來澳門經濟一下逆轉嘅時候，大家：唔好提住囉。咁就泡湯嘍喇。而家在經濟上升期，真係希望司長幫下下面部門手啦，係出馬搵埋這些特別機構同埋這些專業人士層面，譬如教師、社工等等，或者醫護人員能唔能夠係以專業人士身份 account 都能夠用各種可攜嘅方式建立返中央公積金帳戶，在裏面唔係單純靠政府每年擲少少落去。這個我會覺得，而家提出我會覺得係好需要嘅時候，到將來經濟有調整嘅時候再提出，爭議性就好大。

第二，就有一樣嘢，司長亦都係唔係可以出馬嘅，就係搵搵搵博企，亦都傾埋，除咗中央公積金之外，就係博企嘅全面禁煙問題。咁邊間願意制嘅，首先全力支援。同時係搵埋譚司長一齊，就搵埋六大博企，甚至你唔係幾制個都好：喂，我哋特區政府真係想推行嘅！一係咁啦，你哋六大博企自己做一个簡單嘅公約，在最大程度底下去禁煙或者全面禁煙。在咁嘅情況之下，既然已經事實上有博企嘅負責人亦都公開講咗，根據而家佢哋營業嘅經驗來睇，就似乎係全面禁煙好啲。因為你而家唔係全面禁煙，係咁意建立些吸煙區、非吸煙區，間下、間下、間下，唔湯唔水嘅，就算間得佢好好都好，但係覺得將來唔可行嘅時候，又變咗都係全面禁煙啦！咁而家投資就全部泡湯囉？冇意思㗎，咁倒不如而家下定決心睇清楚這個營業環境，真係全面禁煙唔會影響到這個龍頭產業嘅競爭嘅話，咁而家去做。但係，這些當然就未必係局級就可以一下做得到，司長係唔係都可以出馬？甚至搵埋譚司長一齊係推動一下博企嘅全面禁煙，在明年能夠做到成績出來？因為，而家睇來係具備可行性，就希望政府唔好錯過這個機會。

仲有，亦都要提一提就係社會工作人員嘅註冊制度。咁搞咗今年，我記得年中嘅時候，搞到係興恰恰嘅，跟著落來唔知點解進入咗冷靜期。政府話：聽咗民意之後，要調整文本修改再諮詢。到而家就有咗件事。睇出年嘅施政方針都只係話跟進，唔夠膽拍心口話出年社工嘅註冊制度可以落實。但係實際上已經籌備咗好耐，同業界其實已經係溝通咗咁耐。我在這裏就想睇下進一步現在的進展情況。因為據我所知，我亦都提過口頭質詢，以我口頭質詢咁陣時嘅回應，其中一個主要嘅問題就在於政府一直都係希望建立到一個係公職同埋民間嘅社工共同嘅一個社工專業，一個註冊認證嘅制度，一直都係咁樣做。咁做好晒整套功課之後，咁突然之間向後退，公職嘅社工就唔包括在內，只係管民間社工，惹來好大嘅反彈。其中一個問清楚嘅原因就係話行政暨公職局方面認為公職嘅人就唔可以係同時具備專業身份，於是出現咗這個困難。經過一輪研究之後，最後，政府給我嘅，無論口頭質詢或者書面質詢，答覆都話會同行政暨公職局部門嗰度進行協商，處理好這個問題，做到真係業界能夠接受嘅，真係公職同埋民間社工一齊去註冊嘅這個後果。現在進展情況點呢？咁我約過法務局嗰度傾，但係研究話係有問題嘅，但係跟著佢哋話給我聽：我哋唔單只研究社工，研究埋一系列嘅專業人士，都係可以，即係有個係可以共同咁樣做嘅方式。冇問題，但只不過就係解決，最低限度首先解決咗社工可以係公職嘅社工同民間社工一齊遵守一個同世界接軌嘅專業倫理守則。在咁嘅基礎上邊，有一個認證嘅委員會，有一個認證委員會裏面，係亦都在法定到專業社

工資嘅人士佔多數等等這些條件，以及係隨之去制定社工嘅職程同埋民間社工津助嘅制度。一系列嘅條件，我會覺得就唔應該一步步行嘅，而係話已經討論得，上個階段甚麼問題都攤晒出來嘅時候，係唔係在 2013 年嘅時候，政府亦都係男子漢有信心，真係徹底解決一系列嘅問題？包括政府社工嘅職程、民間社工嘅津助以及民間社會服務機構，在政府嘅支持底下嘅民間社會服務機構係視乎佢性質係唔係要遵守一些基本上嘅條件、質素嘅評定呢？以及管理這些在民間社會服務機構嘅管理層，佢哋係唔係需要亦都有若干嘅社工管理能力嘅認證呢？這些我會覺得，而家我哋應該係著手去處理。原因就係我從經濟學考慮，就是澳門，如果你話發展產業嘅多元化，老實講，我哋係有可能考慮另外一種，培育一種產業，就係社會服務產業。原因就係話，以我哋本地嘅人口來計算，我哋 Market share 會越來越大嘅，原因就係老齡化人口係會急速膨脹。咁當然，殘疾嘅人口會有一定嘅比例等等。在咁嘅情況之下，社會服務嘅市場對象肯定係增加 100% 或 150%。在咁嘅情況之下，我哋亦都不斷訓練緊一些有潛質成為專業又好，或者從業人員嘅人才，我哋大專機構一路係訓練緊出來。

另外，我哋有萬九公屋之後，有後公屋計劃、有新城填海計劃，這些計劃都會導致到大量嘅社會服務設施以及醫療設施嘅出現，咁用我哋嘅人、用我哋嘅地、用我哋嘅資源、用我哋嘅官民合作去建立一個咁樣嘅社會服務工作，將來就可以變成一個產業。點解可以變成一個產業呢？原因就係人口嘅老齡化，我哋珠江三角洲，整個廣東省都在下個階段都會出現。如果，我哋澳門真係自己做得好，服侍得好我哋澳門嘅長者同埋復康者嘅話，將來進一步可以盡擴展到服務埋其他珠江三角洲地方。或者唔一定要佢哋來澳門，咁我哋可以在同粵澳合作底下，我哋走出去少少服務都仲得，如果我哋嘅質素有保證嘅話。所以這個係一個產業嘅機會。所以，政府去資助這些社會服務機構就唔應該再親疏有別，邊個親嘅就話之你點管，就給錢你。而係話我都有個要求，就係你嘅服務質素要提高嘅，你嘅管理者將來來講係需要冇社工專業管理認證嘅人員去參與。以及我哋學校裏面係唔係需要配備一些社工、醫護人員或者治療人員呢？社會服務機構係唔係除咗社工之外，仲有些護理人員、治療人員這類嘅人員？如果這類嘅人員佢哋都能夠按部就班咁慢慢建立一個民間專業嘅津助制度，津助專業嘅社工，唔係一筆過撥款給社團，而係話這筆錢裏面，有一部分劃定是對社工專業嘅或者治療師專業嘅或者護理者專業嘅，如果你有這些人員，就有這個資助給佢。用這種方式嘅話係可以促成我哋產業慢慢嘅成長，到最後可能……淨係講經濟效益那些產業之外，這一個產業對澳門可能都好有幫助。現在社工嘅專

業認證，我希望 2013 年唔好再 Hea 落去，係一定要做出成績。

到最後我都要最後提一提，就係希望亦都係盡快，在明年係唔係可以做到嗰個高等教育機構質素嘅評核。高等教育機構質素評核在 3 年之前已經提出，甚至當時已經聯繫咗香港一些專業機構，話：佢這些機構可以做的了！但係，後來唔知點解，可能有些大專學院有意見都唔定，我唔知，總之就係停咗落來。跟著就要先制訂咗這個高等教育新法律先，然後在一個新嘅高等教育法律之下再制訂個評審法，然後先再做。蚊都瞓啦！高等教育嗰個新法而家都未有。我會覺得應該係開始實行初步一個評審嘅機制，願意參加評審就願意囉，你唔願意，OK，就話你唔願意算數，唔監你。評審咗，評審至到初步公開，在咁嘅基礎上起一個刺激效應，刺激本地嘅大專學院真係努力去改進自己嘅質素。一次唔得，唔等於永遠唔得。刺激咗佢一次之後，佢嘅質素改善，對我哋廣大澳門嘅年青一代一定有幫助。希望係果斷一些，唔好等兩個法律制訂之後先再做。

多謝。

主席：唐曉晴議員。

唐曉晴：多謝主席。

司長、各位官員、各位同事：

澳門係一個多元嘅社會，我哋整個澳門嘅人口係由好多唔同地方來嘅人，包括有澳門本地出生，祖籍都係澳門，亦都有內地來，亦都有葡萄牙或者係其他地方來嘅人。來源唔同，但係都為著一個共同嘅生活方式，有著相同嘅期盼同埋理念來到這個地方居住，都係澳門嘅人來嘅，澳門人。

我諗即使在議會大廳裏面，有唔少人，包括我自己都曾經做過新移民。新移民來到一個新嘅地方係需要有一段時間去適應個環境嘅變化，會面對好多困難嘅，有陣時難免會覺得有些彷徨。但係經過一段時間之後，佢哋都會慢慢融入這個社會。如果我哋政府對對待合法地加入我哋社會嘅那些新成員嘅時候，提供多一些嘅幫助的話，我諗佢哋在融入我哋嘅社會，去認受我哋這個社會嘅文化，應該會有一個更好嘅體驗、更好嘅感覺。所以，我想問下司長閣下，每一年我哋澳門都有一定數量嘅新移民來到嘅，我哋政府有冇一些特別嘅政策或者措施去幫助一下這些唔係好熟習而家我哋澳門新嘅生活環

境，但係將來會融入我哋這個社會嘅人？

我第二個想問嘅問題係關於醫療方面嘅。這些係一些專業人士同我傾偈反映出來嘅一個情況，我向司長同埋有關部門報告一下。我諗從側面亦都可以反映到一些問題出來。

其實我哋這一個社會而家發展得好快嘅，工作，社會生活嘅節奏，家庭，種種生活嘅壓力其實好大嘅，唔少人都要面對心理上面好大嘅負擔。在近年嘅醫學研究發現，精神病或者係心理方面較輕嘅疾病，例如抑鬱症，其實係在我哋社會係好常見嘅。有一些人佢得咗病都唔敢講，又或者怕人哋話佢。這一種尤其是個心理上有問題嘅時候，佢更加收埋自己。久而久之，這一些病就會去到好嚴重嘅程度。其實我哋公立醫院好忙嘅，我哋都知道，我哋要處理好多唔同類型嘅病人，有唔同嘅分科，但係醫院係有可能無限擴大資源嘅。

我提起這個問題係點解呢？因為有一個專業嘅醫生，佢應該在一個醫療機構嗰度，就希望請佢來，係一個精神心理科嘅專家，佢唔係澳門本地人，但係那個醫療機構想帶佢來這裏去提供這一個咁樣嘅診科嘅服務。好可惜，佢最終就話澳門唔缺乏這一個專業。這一個我係希望司長或者局長等一陣間可以給我一些數據，係唔係我哋澳門真係關於精神心理門類嘅門診或者係綜合醫院裏面關於這一個科室真係人滿為患？而且出邊亦都係好多咁樣嘅人才，所以我哋唔需要去引進這一些咁樣嘅人呢？這樣嘢其實係人命關天嘅，點解呢？睇起上來好簡單嘅抑鬱症，其實佢係會攞命嘅。我仲記得我自己非常痛心，我諗同我這一代人嘅人都應該會有相同感受嘅就係。可能有十年了，香港有一個天皇巨星，有一日，在愚人節，就在好高個度跳咗落來，據說佢係因為抑鬱症。咁樣忍受抑鬱症嘅痛苦唔係你嘅意志問題，係一個病來嘅。如果佢唔係及時得到治療，佢可能一下就會做咗傻事。昨日我睇到報紙都睇到有另外係有一單，有一位女士又係因為抑鬱症又係跳樓死咗，自殺唔死嘅，後尾救番，佢喺樓度又跳咗落去。這裏顯示出甚麼？這一些可能在精神病嘅範疇，佢甚至未界定為精神病，佢只係一些輕微嘅，我哋叫做感冒式嘅精神病，唔知我講得唔唔唔，但係佢嘅後果係好嚴重。如果及時有人去處理佢，處理嘅意思即係幫助佢，藥物方面又好，甚至係其他方面嘅輔導都好，令佢過咗這個難關，佢就唔會死。可能會係一個好有用嘅人來嘅，即使唔係一個好有用嘅人，都係一個人來嘅，人命關天。我覺得，係個人嘅感受啫，冇科學數據，所以，我需要問司長同埋局長。澳門其實係需要有多一些這一類嘅醫療服務。我哋澳門係唔係真係有好足夠嘅人才？定係如果冇嘅話，我哋需唔需要

人一些這些人才？唔會好多，這裏唔會，肯定我認關姐你都未必會反對，因為這個可能唔會搶我哋澳門人就業機會嘅。如果有嘅話，咁當然希望先聘用我哋澳門有專業能力嘅人先，然後再去考慮啦。但係如果有，這一個對病人來講係好緊要嘅。我希望司長可以給到一些數據給我，我唔係一個質問或者甚麼。我想首先知道個數據嘅情況，然後希望這一件範疇裏面嘅事得到注意。這個係我第二個想關注嘅事。

第三個，結合我先前在其他司嘅範疇的發現，就係甚麼呢？我哋澳門嘅經濟命脈係由旅遊業，旅遊業去支撐嘅。我哋好多議員都提出，政府亦都講過嘅，我哋唔希望我哋變成一個國際博彩中心。譚司長都好清楚咁講過這一個概念：我哋希望係一個國際旅遊休閒度假中心。如果這一個係我哋目標嘅話，咁樣係要求我哋有這一個甚麼呢？有這一個綜合性嘅旅遊項目、有綜合接待能力。我哋在旅遊嘅範疇，我哋究竟應該點樣去提升這一個能力呢？有甚麼具體嘅措施可以做到，或者司長已經諗咗，好快就會做出來呢，這個亦都想知道一下。

最後一個就輕鬆點嘅話題。我同司長都有共通點，點解呢？我好鍾意球嘅，無論係足球、籃球咁樣。雖然我有時間睇，但係我都鍾意睇啲消息嘅，譬如話 NBA，我都未必有時間睇，CBA 呀，其實都好好睇嘅。體育運動對於整個社會精神面貌嘅提升係一個非常重要嘅元素來嘅，所以我哋社會文化司咁緊要就係咁，體育好緊要嘅。

我覺得，頭先有同事提到，我哋澳門都出過容國團打乒乓球，即係話，而家這個社會除咗乒乓球，都仲有一些運動，我哋好多人鍾意嘅，足球、籃球、網球咁樣。在過去嘅辯論裏面我都曾經提過話可唔可以在澳門多辦一些賽事。其實澳門都有辦，後尾我睇下，其實都唔少知名嘅球星，包括打高爾夫、打網球都來過。但係，我覺得澳門仲有一個地方可以發揮嘅，就係我哋有唔少嘅葡語人才，我哋都知道葡語國家裏面有好多足球，尤其是足球，有巴西，跟著葡萄牙自己都係一個足球強國。我哋可唔可以亦都在體育方面發揮下我哋這方面嘅特長，同多啲同體育界，例如足球界，同葡語國有一些聯繫？咁你知道我哋中國足球，其實我唔係話想講國家唔好，只不過係足球唔好，足球真係嘛嘛嘅。我哋亦都可以貢獻一下，為佢哋搭一搭橋樑，可唔可能？想問下局長嘅。

好，就係咁多。

主席：劉永誠議員。

劉永誠：多謝主席。

司長閣下、各位官員、各位同事：

司長負責嘅範疇相當多，剛才亦都有好多我哋嘅同事就唔同嘅範疇方面亦都作出一個提問。咁我今日亦都藉著這個咁好嘅機會，亦都想同司長同埋佢哋團隊交流一下。

第一個我想同司長就作出提問嘅就係同文化，在文化領域方面，就係有關藝術同埋文創產業發展嘅情況。咁我睇得到就在施政報告入面，亦都提及咗好多有關近年來將會係積極發展本澳嘅藝術同埋文創產業，包括咗係開辦各類人才嘅培訓課程，拓展本澳文創產業嘅空間，以及給予本地文創成果到外地交流推廣等等嘅活動，亦都好關心本澳文化嘅傳承。本人亦認同施政中所講嘅文創藝術係需要深耕嘅。

而關於要發展本澳嘅文創產業，我相信當局亦都應該明白到文創產業嘅核心應該係先建基於文化、創意，而並非產業。意思就係話：一個城市需要先培養出成熟嘅文化、創意，甚至或者藝術嘅氛圍，而產業化嘅概念先係有條件應運而生嘅。而文化係需要醞釀，創意亦都係需要去培養。文化同埋創意加起來，就更加不能係趕急咁樣催生出來嘅，更唔可能要求有即時嘅回報，包括在經濟上面嘅回報。在發展文創產業嘅時候，亦應該有一個基於為咗幫助文創得以永續發展同埋傳承，因而希望佢能夠產生產業化思維嘅方向。

因此，要探討本澳文創同埋藝術產業應該點樣去發展呢，其實更重要嘅，亦係最基本嘅就係要先從點樣去培養整體文化藝術氛圍嘅理念著手嘅。在當中亦都應該包括增加居民對文創藝術活動嘅整體投入度，更重要嘅就係要增加居民參與活動時候所具備嘅鑒賞同埋吸收能力嘅訓練。舉個例來講：睇得到當局亦都經常邀請各地著名嘅藝術表演團隊來澳門演出，使到我哋居民都好好彩，亦都有好多接觸高質素表演嘅機會。希望亦都藉著這些咁嘅機會，亦都可以擴闊到我哋居民在文創藝術上面嘅眼界同埋思維。事實上，近年亦都係吸引咗越來越多嘅本澳居民入場觀賞嘅。而除咗在藝術嘅節目觀賞上面，我亦都覺得，如果係能夠加入更多嘅環節，就係有關這個，如果能夠安排更多嘅表演者同一些有興趣參與這個表演，即係這個表演活動嘅觀眾能夠一些互動對交流嘅環節，從而可以令到參與者能夠更加深入理解到這個表演嘅文化內涵。咁我對於這個吸收方面，即係話令我哋質素嘅提升方面，欣賞質素嘅提升方面，係有好好嘅作用嘅。

另外，在開展相關培訓課程亦都應該係給予機會，多啲去到外地交流。當局應該更加著重考慮點樣讓參與者從參與過程中瞭解同埋吸收當中嘅精髓，而唔只係話一個好似過咗就算咗，過眼雲煙咁，在參與過後並冇對提升文化水平係起到作用嘅。咁這方面係非常重要嘅！亦係以上所講嘅培養文藝藝術氛圍嘅第一步。唔知道當局在這方面嘅想法係點樣？點樣去推動呢？點樣去改善以上嘅情況以提升有關計劃嘅成效呢？

另外一樣嘢就係關於本澳未來文創同埋藝術發展方面，當局有甚麼長遠嘅推動同埋扶持嘅計劃呢？這些就希望司長能夠係作出一些介紹。

另外我亦都睇得到就在施政報告入邊提及到會通過多種嘅渠道、以多種嘅形式深化《文遺》嘅保護工作。而在文物再利用方面，當局將會點樣去透過文物嘅再利用，盤活舊區，為舊區帶來新嘅活力呢？咁亦都睇得到在這個報告入邊亦都提及到大三巴一帶將會有一些項目去推動，亦都係有一些古跡發掘工程等等，希望亦都係可能就著這些項目嘅啟動或者介紹，令到這個整個個舊區係可以盤活嘅。在這方面，我覺得應該係大力推行，咁亦都希望如果有機會嘅話亦都想聽聽，即係話文化局或者係相關部門點樣去因應這些項目嘅啟動而帶動整個舊區嘅。

另外亦都指出咗，會積極培訓各類嘅人才，我指嘅係有關文創產業或者係另外一方面就可能係牽涉到，因為，不久將來，我哋個文化遺產保護法亦都係不久將來會通過，亦都可能有一些不動產，文化遺產嘅不動產，或者甚至乎係一些非文遺其他嘅文物係需要作出適時嘅維護、修復。當中包括當然係需要一些文物修復同埋《非遺》項目技術嘅專業人才嘅培養。咁大家都知道，如果係從事建築業或者裝修行業嘅就知道，現時入行嘅人就比較少。但係以我所知道，這類型嘅人士就應該要具備有一定嘅專才，包括譬如話佢係唔係有書畫嘅根基、有耐性等等，即係給我感覺來講，去招納這些人將會都係困難嘅。我亦都想知道下，我哋點樣去吸納這些人，去儲備佢，從而可以推動到文物維護，令到我哋嘅文化遺產得以好好保存落來，有關嘅消息希望能夠知道更多。

另外一個提問方面係同衛生領域有關嘅。剛才亦都聽得到好多嘅同事提及到醫療服務嘅水平，譬如話我哋嘅居民去到醫院入面輪候時間都係比較長等等。但係，我想在這裏亦都係就醫療事故法嘅推動方面，希望能夠係知道多一些。因為我知道大家都知，每項醫療手術都會存在一定程度嘅風險，當中當然

包括咗，大家都知，在手術過程中各個治療嘅環節同埋處理嘅方式，甚至病人本身嘅疾病都可能發生手術失敗以及醫療事故嘅。所以，醫療事故亦都可能因為整個組織過程嘅過錯，亦都會引起嘅。咁我哋亦都知道啦，我哋澳門暫時係有一個醫學院，醫科畢業生亦都係來自國內外嘅各間院校，水平亦都可能因而出現咗參差不齊嘅現象。而保險界通常對於去提供一個醫療失誤嘅保險亦都係比較難去承擔嘅。咁所以，另外係對於受害人來講，一般受害人要對受害人嘅過錯去舉證，證明因果關係亦都十分之困難嘅。所以，我哋其中遲遲未能夠落實嘅原因，我相信亦都係因為社會上對採取有過失民事責任嘅賠償制度，抑或有過失嘅民事賠償制度方面係出現一些分歧。加上一些特殊嘅條件、種種嘅原因，亦都所以可能係令到我哋醫療事故嘅立法過程係趨於比較複雜嘅。亦都知道有關當局就有關本澳醫療事故法亦都作咗一些框架同埋內容嘅一個準備，亦都希望能夠係早日推出。所以，我在這裏亦都藉著這個機會問一問，即係整個社會關心嘅問題，就係有關醫療事故法嘅推進情況係點呢？是否有相關嘅工作已經開展咗？在法案入面又有冇甚麼內容可以保障到醫患雙方嘅權益呢？

其實我覺得醫療事故法嘅立法係表現咗當局係希望從法例上邊加強對醫患雙方嘅保障同埋權益嘅。但係我記憶就係當我哋早前審議醫務人員職程嘅時候，其實有好多社會上邊更加關心就係醫療服務水平嘅問題。咁我哋在這個，既然我哋要花費大量嘅時間在立法嘅同時，我相信最重要嘅係需要積極避免同埋積極減少醫療事故發生。大家都知道，更多嘅賠償始終係彌補唔到一個生命嘅。所以，我哋覺得應該係就這方面對醫務人員水平上面嘅把關，去進行增加佢嘅培訓，提高同埋統一澳門醫務人員專業水準嘅醫療水平係十分之重要。考慮到我亦都聽到剛才冇啲同事都問及，點樣去培訓，開展我們的，落實去對本澳醫務人員進行專業認證嘅制度呢？關於這方面，我亦都希望能夠有機會聽得到司長或者相關官員嘅介紹。

另外，對於不久將來落成嘅醫療服務中心方面同埋其他擴建嘅醫療嘅中心方面，就有關醫療人員儲備人才嘅培訓，可唔可以介紹一下相關前瞻性嘅工作？

另外一樣嘢我就想講一講就係有關社會事務方面嘅，就係有關支援弱勢社群方面。咁我哋亦都聽得到社會近期嘅聲音，尤其是覺得我哋對於點樣能夠更好咁關顧好我哋嘅弱勢社群，尤其係弱智人士呢？我哋知道，根據數字顯示，我哋澳門大約有 2,000 多名智障人士，但係我哋嘅宿位只有 400 多個，所以，院舍嘅需求方面係有個迫切性在這裏。而在今年嘅

施政報告入面係提及將會重點加強對弱勢社群嘅支持，並推出咗一系列嘅措施，例如將會興建院舍、復康中心同埋增設暫托服務等。這方面，我覺得係做得令我感覺到政府真係面向我哋有需要嘅社群作出咗回應。但係有關安排現時嘅進度係點呢？除此之外，亦有甚麼其他嘅政策可以扶助本澳嘅弱勢社群呢？

另外一方面，由於大部分嘅智障人士都需要家人長期嘅照顧。而隨著本澳人口老化嘅問題，弱智人士嘅家長亦都會因為年老，逐漸失去咗照顧智障子女嘅能力。睇到佢年紀漸漸長大，憂慮自己，亦都照顧唔到自己，更加冇能力去照顧好佢嘅智障子女，難以承擔佢照顧子女嘅責任。面對智障人士家庭所面對雙老化嘅問題，佢哋更需要全面嘅社區支援系統。我想問一問當局有甚麼措施去應對呢？點樣先能夠讓佢哋係釋除佢哋嘅憂慮，從而過著一個比較安穩嘅生活呢？

另外，隨著社會服務需求日漸增大，人手方面更加要跟得上。但知易行難，面對人手嘅匱乏，當局又點樣如何去招納人手以應付這個需要呢？除咗以上嘅救助計劃之外，我相信最重要嘅亦都係要點樣扶助這些智障人士融入這個社會，協助佢哋能夠發揮到潛能，認知到佢自己在社會上面嘅價值，建立起佢哋嘅自信心，能夠讓佢哋獨立生活，咁先能夠有利於佢哋身心嘅健康發展。在這方面，有關當局又有甚麼相應嘅計劃去推動這個工作呢？在這裏希望亦都聽到相關部門嘅介紹。

多謝。

主席：好，餘下落來嘅時間我交給張司長同埋其他官員作一個回應。

請張司長。

社會文化司司長張裕：多謝主席同埋多謝各位議員嘅意見同埋提出嘅問題。

對於各位提出嘅意見，我哋都聽到，都寫低。提出嘅批評如果係確實有值得我哋參考加以改進的話，一定係誠懇接受，加以思考、改善。提出一些情況，我相信有些都需要我同我嘅同事係讓有些嘅情況向大家介紹，讓大家有更多嘅了解。當然有兩個層面：一個就係政策上面辯論嘅層面，而另外一個就係資料嘅介紹同埋情況提供嘅層面。

主席閣下：

因為議員們提到嘅意見嘅範圍非常之廣泛，差唔多係我哋社文司轄下嘅八大範疇都有涵蓋到。我會考慮個別暫時未係提得咁多、咁急切嘅旅遊、文化、體育、文化產業或者係大賽車這些，如果夠時間嘅，我哋會再補充一下，如果唔係會留返下一節嘅時間，我哋發言再同大家介紹同埋交流。

在這裏有議員係關心到一個醫務委員會立法嘅情況。都知道社會比較關注成立醫務委員會嘅這個事情。在經過咗一系列嘅程序之後，由於收到咗法務部門對醫務委員會草案嘅分析報告，衛生局就著醫務委員會嘅性質同埋權限，亦都提出咗一些技術性嘅意見。在詳細分析過法務部門提出嘅意見之後，為咗釐清醫務委員會嘅性質、宗旨同埋職權，因此係對有關嘅草案進行咗修訂。由於醫務委員會嘅組成同埋職權嘅範圍受到醫療界廣泛嘅關注，故此，在草案修訂嘅工作期間係有需要從各方面進行考量同埋評估以及諮詢業界嘅意見，使到修訂內容係能夠得到醫療界嘅支持同埋認同。

衛生局在經過分析同埋研究聽取咗籌組醫務委員會工作小組嘅意見同埋建議，以及在 2012 年 6 月 29 日收集咗業界嘅意見之後，為咗釐清醫務委員會嘅性質、宗旨同埋職權，以及充分調配衛生局嘅資源，對醫務委員會行政法規草案第一文本進行咗修訂，當中包括委員會嘅性質、組織架構同埋職權嘅調整。而為咗建立專業資格考試制度同埋紀律處分嘅機制，衛生局將會係訂定相應嘅配套法律草案。目前嘅情況係衛生局已經完成咗修訂嘅文本，相關嘅草案已經進入咗立法嘅程序。醫務委員會行政法規草案第二文本已經在今年嘅 10 月完成咗修訂嘅工作，係提交法務部門作最後嘅研究，然後就會進行立法嘅討論同埋通過。這個係有委員關注到醫務委員會立法嘅現況同埋延誤嘅原因向各位係介紹這個情形。

議員們亦都關心到醫療事故法嘅立法現況同埋延遲嘅原因。醫療事故法係特區政府一項重大嘅法律文件，佢嘅目的係為致力提升同埋保障醫患雙方嘅合理權益，以及設立更有效率嘅機制處理糾紛。衛生局非常重視醫療事故法立法工作嘅細致同埋周全，在公開諮詢各方意見嘅基礎上面，確立咗以有過錯嘅醫療責任作為立法嘅方向。

參照鄰近地區嘅經驗同埋做法，衛生局不斷修訂同埋完善法案嘅內容，並且參考法律專家、法律部門同埋立法會、委員會提出嘅意見，研究加入調解同埋仲裁，值日醫療糾紛解決機

制同埋條文，並且進一步釐清同埋補充草案裏面有關醫療事故嘅定義同埋範圍，設立獨立同埋具有權限嘅鑒定機構，以及保存病歷機制等等法案內容。

醫療事故法嘅立法係推動醫療改革嘅重要一環。除咗積極回應社會同埋市民嘅訴求，更加清晰同埋保障醫患雙方嘅合理權益之外，亦都將結合其他醫療改革系列嘅工作，包括：實習醫生培訓制度、私人醫務活動規範以及成立醫務委員會，系統咁樣推動同埋完善本澳嘅醫療衛生體制建設。有關建立專業資格評審制度同埋醫療活動規範等，已經完成咗前期嘅意見收集同埋討論。而現在嘅情況係，衛生局已經基本完成咗醫療事故法草案嘅修訂同埋補充，並且將於 2012 之內係提交立法會審議。

下面係講一講高教法立法嘅進度同埋相關出現嘅一些延誤。這裏借這個機會都講一講，實際上，社文司嘅範圍這兩、三年嘅工作係同立法會有比較多嘅合作，尤其是在立法方面，因為比較多嘅文本，所以都增添咗各個議員嘅工作，高教法、家暴法。

關於高教法嘅話，而家嘅狀況係在個過程裏面，透過借鑒世界高教發展比較成熟嘅國家同埋地區嘅經驗，結合本澳高教嘅實際情況，同時聽取咗各個大專院校嘅意見，已經初步同各院校就各項主要嘅修訂取得咗共識，並且已經基本確定咗相關法案文本嘅內容。現在特區政府相關嘅部門正在共同就法案嘅內容進行最後嘅審視同埋磋商，力求最大程度完善法案嘅條文。同時亦都積極為法案裏面各項主要嘅修訂提供補充說明同埋參考嘅資料，為日後在立法過程裏面參與法案討論嘅各個方面創設更佳嘅討論基礎。

在高等教育制度法律通過之後，隨即會展開一系列配套法規嘅立法工作。當中包括高等教育評鑒制度行政法規，以進度方面，我哋嘅思考係希望在短期盡快嘅時間係可以完成相關嘅文本，以進行立法過程嘅討論。現在已經開展咗前期嘅準備，參考鄰近地區及高教發展比較成熟國家嘅經驗，結合本澳嘅實際情況，並且通過同本澳嘅院校進行初步溝通，構思評鑒制度嘅框架。頭先有議員都係提及到，想瞭解關於這個高等院校評鑒制度嘅構思。構思裏面，高等教育評鑒框架將會分為院校評鑒同埋課程評審兩個層次。院校評鑒包括認證評鑒同埋質素評鑒兩類，課程評審包括對院校已經開辦嘅課程進行檢視以及對有意開辦嘅課程進行評審。其實相關嘅工作係冇停止到，一個方面，係進行法案文本最後嘅完善。同一時間，為咗

未來順利開展有關嘅工作，已經係委託咗專業嘅評審機構，為本澳日後嘅評審工作制訂評審嘅範圍、內容清單及有關嘅指引，工作係在進行之中。

兩位議員都關心到敬師金嘅安排，這個正正係去年我哋討論《私框》嘅時候，幾位議員都係提及到關注嘅地方。作出一個敬師金嘅安排考慮，是優良教師隊伍係提升教育質素嘅重要保障。為咗配合《私框》嘅實施，肯定長期為本澳教育事業服務嘅教育人員嘅貢獻，我哋將會為教學人員舉辦專門嘅尊師活動，以體現對教學人員嘅關愛以及宏揚尊師重道嘅美德。其中係包括對於已經離開教育行業嘅資深私立學校人員發放一次性嘅金錢給付。相關嘅工作由於要睇在法律上面嘅處理或者係其他嘅方式上面處理嘅一個更妥當安排嘅考慮，所以未能夠有一個具體嘅方案係即時向社會、向各位介紹到。但係可以向各位介紹嘅係，相關這個工作進展係順利嘅，方向可能會向著係由民間專業團體協助來實施。方案確定係會盡快公佈。思考裏面嘅給付方法，將會係金額嘅計算會考慮到服務時間嘅差別。離開教育行業前最少需要在澳門服務滿 20 年，這個都係參考咗大家嘅意見嘅，同埋需要達到 55 歲嘅這個年歲嘅。而 55 歲嘅計算個考慮係截至到 2013 年 8 月 31 日止。咁有議員可能話，咁我過咗這個時間唔能夠享受到嘅話，尤其是要教多一年，會失咗咁個資格，唔係好大損失？但係，我哋都知道在《私框》通過之後，根據《私框》嘅規定，這個教學人員專業嘅職程嘅制訂係有咗一個係更加合理嘅級數嘅劃分，由六級至到一級嘅。而根據兩步走嘅考慮，尤其是係政府先行第一步對於這個不同嘅級數，係會有不同嘅津貼，專業津貼嘅撥款嘅。而專業津貼如果佢已經具備 20 年左右工齡嘅時候，估計佢嘅津貼每月係達到約 7,000 或者係 8,000 元嘅。如果佢再工作多一年嘅話，佢為此收到嘅政府方面給予佢嘅津貼，已經係 7 萬幾或者係 8 萬幾喇，如果佢工作多一年嘅話，比起佢可能會收到嘅這個敬師金嘅數目係更加之高嘅。主要係根據一個咁樣嘅考量，方方面面都希望能夠兼顧得到。但係，我都想講一句，而家個社會希望大家都係以互相將就一下。因為，作為一些津貼，有時如果出現到一個係覺得高或者低，就可能令到一番好意，社會上面、議會裏面嘅一番好意都會影響咗個心情。但係，我相信教師隊伍都係有高智慧係會識大體嘅。

在這裏係向各位醫院介紹一下敬師金安排嘅情況，相信在稍後一段日子就會有一個比較詳細，根據頭先嘅思路，詳細嘅公佈或者係介紹。

有委員提及到持續進修計劃上面，對於我個人有一些言論嘅意見或者係批評，我虛心接受。不過亦都借這個機會澄清一下，作為我本人工作嘅宗旨，當然以前一直在廉政公署工作嘅話，任何事情一定係依法辦事嘅。依法這個情況唔存在著一個走盞或者係鬆動。但係問題有時記者嘅訪問亦都交流一些經驗，本來都唔想發表意見，但係記者朋友亦都係好希望講啲啦、講啲啦，就可能係這一個係大家都係工作嘅，有得完成嘅工作。實際上，這個意思嘅話講出來一個方面，係確定返政府推行這個計劃嘅目的，完全考慮係可以促進到持續終身嘅學習，而提升這個質素同理技能。因此，佢嘅科目上面寬鬆嘅意思就係有社會嘅意見，話學電單車、學汽車啲啲唔應該加落去。但有一些又覺得資助埋又有好處，學咗個技能。社會係有唔同嘅意見，而亦都有一些意見講到一些素養上面嘅，真係插花、廚藝，學電腦或者學書法、學畫畫這些都唔係技能，又唔係專業，係唔係都要涵蓋埋落去呢？係唔係應該要嚴謹啲，淨係學歷上面嘅提升，或者係嚴謹啲咁樣來到要求好啲呢？這個係有分歧嘅。所以，我嘅睇法或者係意見，如果係從一個課程方面嘅開辦，個面係可以闊些嘅話，冇違反法律，係可以闊些嘅話係讓更多市民可以參與到、可以受惠到，提升咗技能、豐富咗涵養這一個讓生活更加快樂一些，更加充實、更加有寄託，我相信議員都會同意這個方面嘅寬鬆，哪怕係有爭論嘅話，現階段政府係採用咗一個咁嘅思路，用來界定在課程嘅涵蓋面上面考慮嘅寬鬆。並不是話對辦學機構嘅申請程序或者係相關嘅管理，在檢查、在監管上嘅寬鬆絕對不是歧視。相信大家唔同意，我本人也絕不是這個意思。而這一個教青局嘅同事都明白嘅意思，喺這方面嘅監管係絕對嚴格、無得寬鬆、無得手鬆。我表一個態度，我總結經驗，以後如果同傳媒就講，係講多幾句都好講清楚啲啦，唔好引起大家嘅誤會。

至於議員問我，你話有睇過報告書，唉，真係真人真君子！咁你有睇過就係冇睇過，咁唔通佢屈自己？係唔係呀？任何一個人咁有睇過嘅話，唔係話邊個做錯與咁嘅問題。而事實上面，第一天接受訪問，我都覺得自己有啲勇氣的了，接受訪問了。同埋我係肯定返要根據審計報告提出嘅要求，即刻進行檢視、進行完善嘅，完全冇話要同佢對著幹，話抗拒佢嘅監管，完全冇咁嘅意思！事實上面，審計署同埋廉政公署，係大家都期望佢嘅職能發揮得越來越好嘅話，對於整個社會都有好大嘅好處。我仍然都係會認同，係會支持嘅。但係，我都自己會檢討、會總結。這個係持續進修計劃裏面有議員提到一些意見或者係批評，我自己檢討一下。

有議員提及到一個津助民辦社會服務嘅一些意見。這些意見係非常好嘅意見，事實上面真係值得我哋好好思考。事實上面這個係我哋澳門社會進步嘅地方。社會上面有好多熱心嘅人士，團體好，或者係社會服務機構，都願意在這些服務市民嘅崗位上面，雖然工作好辛苦、辛勞，同埋有些都係有厭惡性嘅，人工也不是話好優惠嘅人工，但係都在這些崗位上面默默耕耘去服務我哋社會上面需要服務嘅一群，特別好多係弱勢社群。好多謝佢哋嘅貢獻。當然，在這個合作嘅過程裏面亦都可以達到一個效果。因為我粗略統計過差唔多有 200 個社團或者係社會服務機構。效果係甚麼呢？就會服務嘅範圍比較寬廣，各方面都會照顧到，同埋亦都有可能分佈到我哋社區唔同嘅角落，讓受惠服務嘅對象係更加方便嘅。舉個例，老人中心嘅話有幾十個嘅，幾十個當中有唔少在團體嘅時候，分佈在社會唔同嘅角落。早前我去探訪亦都落區探訪過一個老人中心嘅時候，啲老人家，事實上面就係日日朝頭早就返到老人中心嗰度睇下報紙、傾下偈、做下早操、讀下時事等等。係老有所養、老有所為。當時佢哋仲加唱咗一首歌，讀咗一首詩，我帶咗來亦都同大家分享一下。這位老人家佢話，佢覺得自己在老人中心，佢自己嘅感受係點樣呢？佢話：開開心、笑笑口——當然我朗誦得冇佢咁好聽——老如松柏好休悠；三五知己好朋友，共聚談心勿記仇；清早起床茶樓走，嘆杯香茗好享受，食飽點心就中心走——即係去中心——跟做運動身體好，病魔自然會流走；聽講新聞味落後——佢哋都有跟進，與時並進——社會事情知通透；做個精明快樂人，騙徒不易會埋手。多謝各位聽我獻醜，謝謝。咁，我問下佢幾多歲呀？86 歲了，86 歲，佢係其中一個，當天係有 40 至 50 個都在個中心活動。後來我再瞭解到這位老人家——因為麥議員你話落區，我都成日落區嘅——我去益隆炮竹廠嘅時候，去到對面原來佢仍然兼職，在一個廟宇度做 Part time 鐘點工，都有所寄託。這個我哋嘅長者唔簡單，既係參與群體，亦都係娛人娛己，亦都係參與工作去推進澳門嘅旅遊業。所以，借這個機會係同大家分享一下，所以未來嘅時間，如果在津助方面人數，多與少，或者係津助嘅金額嘅多與少嘅話，我表個態，這個容局長係我哋嘅同事，都樂意同相關嘅合作夥伴去溝通，溝通而家實事求是嘅跟上通脹物價嘅調整嘅話，這個係透過溝通希望大家合作係更有所進步。我哋願意溝通又願意聽取意見。多謝你提醒我哋這個事情，何議員。

陳偉智議員係要求索取啲資料，我哋稍後會給你的學校裏面嘅社工。高校嘅評鑒有議員提及到，頭先係介紹咗。

或者我借這個機會同大家係介紹一下澳門公立醫療系統，係關於提高佢嘅服務安排情況。大家都係好關心澳門醫療服務嘅改善同埋係提升。事實上，我哋同大家一樣都希望越做越好，因為睇病嘅話希望會更加舒暢，舒暢啲，病都快啲好得翻，係唔係呀？冇甚麼人會願意係專登惡形惡相或者係專登去拖延嘅，但係這個要透過溝通多啲。

主席閣下：

或者我會就著兩、三方面嘅情況。如果政府在完善醫療系統嘅服務方面，一個方面從硬件上面嘅話，我哋有一個醫院，這一個係十年發展嘅規劃。包括興建離島嘅醫院以及……呢度！係，原來咁樣係睇得真啲嘍？李展潤局長甚至講我聽，佢有一條片好靚嘅，佢話拎上來給議員睇就會覺得：咦，我哋嘅醫院原來唔錯。點樣唔錯呢？一個方面空間比較寬闊，綠化比較講究，採光亦都係頗為不錯，交通四周嘅道路係四通八達；前面係對著個湖，路環嘅一個儲水塘，後面一幅預留嘅土地，基本上前後左右都有甚麼遮擋。如果以進度上面嘅現在係進行探討，爭取在 13 年進行圖則設計，14 年完成圖則設計同埋建築嘅設計就開工。而係爭取在 2017 年第一期完工，到時有新急診大樓，96 張病床；有綜合服務大樓，有專科大樓，亦都有醫務人員嘅——搞錯咗喇我，搞錯咗——到時係會有 100 張病床嘅離島急救中心，有 466 張病床嘅綜合醫院，亦都有司法羈留病房 45 張，亦都有緊急應變指揮中心，護理醫院等等。而第二期嘅工程預計在 2019 年完成，詳細我在這裏唔重複了。稍後如果有需要嘅話我哋可以來小組會去介紹下，讓各位議員有更多嘅知悉。同一時間明年嘅工作嘅話，山頂醫院亦都有一系列嘅改善，一個就係新急診大樓、綜合服務大樓、專科大樓等等。這個就係我哋到時新急診大樓，山頂醫院新急診大樓會設有 96 張病床，如果有記錯天台嗰度當停車場未落成，係會有幾十個車位方便市民嘅。

各位議員：

這個就係一個硬件上面，大家關心嘅離島醫院嘅進度以及明年山頂醫院急救大樓會完工，而稍後專科大樓亦都會動工。有一個十年規劃，係將會在唔同嘅社區增設這一個社區嘅衛生中心，包括氹仔湖畔大廈有一個全澳門最大面積嘅衛生中心，路環、石排灣嘅新居屋亦都係有規劃。而其他嘅青洲坊新嘅衛生中心、下環街嘅衛生中心大樓等等，都係在規劃之中。

各位議員：

這些係一個硬件嘅。在其他方面嘅話，為咗做好對市民嘅服務嘅話，政府亦都係開展咗同社團嘅合作。係透過同 10 多個民間嘅非牟利醫療機構展開合作，在 2011 年嘅時候係為我哋嘅市民提供咗 52 萬個購買服務嘅名額。這些嘅好處就係無形中多咗好多衛生站咁樣，在社區唔同嘅地方。聽有些市民講去幫襯這些非牟利嘅醫療機構——可能我聽到一些好嘅意見啦，當然有不足嘅地方都唔定——佢哋話嗰個態度唔錯㗎。因為，嗰個病人唔係咁多，所以係可以同醫生傾耐啲時間，關心多啲，問佢多些問題，可以給多些意見有利於病情嘅快速康復嘅。

另外一個醫療券嘅發放問題。總結咗幾年嘅經驗嘅話，在今年來講，施政建議明年係加到 600 蚊。政府亦都會考慮，係爭取如果能夠將佢嘅期限延長到兩年嘅話，都係大家嘅期望。而家係盡緊努力，有消息，係一個好消息嘅時候係再向大家公佈。

而另外一個，議員當然提及到醫院工作有種種不完善不足嘅地方值得我哋檢討去提升，但係，醫院嘅同事都努力在今年來講，係透過一個國際認證，獲得咗澳洲醫療服務標準委員會嘅一個認證嘅認可，宣佈山頂醫院係通過 45 項嘅評審，而當中嘅 3 項取得咗優異。這個就唔係話我哋係咁樣就驕傲自滿呢？有時透過人哋嘅評審，讓人家來說話，就係比較公正啲、客觀啲。但係，我都要求衛生局嘅同事唔好自滿，因為，畢竟澳門我哋嘅人口結構比較細，50 多萬人嘅時候，如果講醫療上面病例或者係個經驗，係唔一定咁全面、咁豐富嘅。亦都要透過不斷嘅進修，未能夠涵蓋到嘅時候，可能要靠一些專家嘅帶教或者透過培訓或者係送外就醫，用來去完善返我哋醫療系統係可以有更好嘅服務，同埋更好嘅醫療水準同埋效果嘅。

主席：

或者我想請我一些同事，就議員提出一些嘅問題作一些介紹同埋補充，好唔好呀？

請李展潤局長。

衛生局局長李展潤：多謝司長。

主席、各位議員：

就關於這個輪候嘅問題，我作一個簡單嘅介紹。

輪候長嘅問題，其實即係年年都提問嘅這個。我哋衛生局其實就不斷咁去努力去想方設法縮短輪候時間。但係，在介紹這個輪候嘅問題之前，我想同大家分享下一個真實嘅現象。我哋在年前就係在科技大學設立咗一個離島急症站。當時設立嘅目的就係想分流返一部分山頂醫院嘅急診病人。離島急症站就係已經服務咗將近一年，嗰個數字，我哋係總結返，山頂醫院急症室嘅數字就冇降低到，冇話因為離島急症站設立咗就降低咗山頂急症嘅數字。但係，整個急診嘅數字，即係離島急症站同埋山頂夾埋，今年係增加咗 3 成，增加咗 3 成。咁即係話這 3 成嘅病人其實以前冇離島急症站係唔需要睇急症嘅。我哋都有一些數字係分析過離島急症站嗰個濫用，或者我唔可以叫濫用，叫不合理使用急症個數字係達到 7 成，在山頂醫院嗰個不合理使用係 3 成。這個說明一個免費醫療嘅服務加大咗嗰個服務供應，係會好大機會增加咗這個濫用嘅。咁即係話服務越快越方便越好，就仲容易產生一些不合理嘅使用。

或者我哋可以在這裏又講一講一個數字，就係 2011 年我哋統計，由我哋衛生局直接提供嘅服務，又或者我哋係以購買服務嘅方式去資助市民到一些非政府嘅醫療機構去睇病嘅，包括這個門診、急診、住院總共嘅數字係 160 萬，160 萬！即係我哋嘅人口係 56 萬喎。咁就行政長官其實都好多次提及，縮減輪候時間係我哋政府努力嘅方向，但係，到底要縮減到甚麼程度先至合理呢？咁即係話係我哋嗰個醫療安全網要擴展到甚麼水平？這個係長官一路都講緊係值得我哋社會深入去討論。係唔係需要等，即係話一個病人來到醫院就即刻有得睇？要考慮一下這個咁樣嘅服務嘅公共開支係會去到甚麼水平？其實講真，澳門嘅醫療服務網覆蓋嘅範圍同埋覆蓋水平已經係好大嘅。譬如，全部嘅衛生中心對澳門居民，非永久、永久居民都係免費嘅。另外，醫院嘅服務，8 成嘅病人係免費嘅。這個相比起鄰近嘅香港，我哋都計過，香港嘅居民自己要拎出來嘅醫療開支係多過澳門居民好多嘅。咁即係反映我哋澳門政府，即係承擔嗰個醫療費用係承擔好大部分。

究竟這個醫療安全網係要點樣擴大，除咗考慮這個我哋嘅財政之外，其實仲要考慮就係一個惡性循環。當政府擴大醫療安全網，即係更加令到市民容易得到服務，得到一些免費嘅服務，這個使用嘅數字係會不斷咁去增大嘅，不合理嘅使用又會增大嘅。可能到時就係政府又要加大這個人數，加大這個人力物力去支持，如果唔係，嗰個輪候數字又不斷咁樣增加。輪候數字、輪候時間不斷增加，嗰個服務質量就會相繼會得唔到保障。其實我哋睇返全世界各個地區嘅公立醫療都係以一個同樣嘅做法，就係優先診治一些緊急嘅病人或者係一個分流，一些

唔係好緊急嘅真係需要輪候嘅，輪候時間嘅長短唔同而已。我哋真係對比過，澳門好多科目嘅輪候時間係比其他地區真係短嘅。但係，我哋都係努力盡量去縮短這個輪候時間，但係，最緊要最緊要一樣就係我哋要按這個輕重緩急去做好分流，要保證真係真係需要緊急救援或者係高危嘅病人係得到最快嘅治療。但係，一些唔係好緊急嘅或者一些不合理使用嘅，我哋真係需要佢哋進行等候。剛才都講咗，社區衛生中心係對全澳嘅居民係免費嘅。咁醫院，譬如醫院嘅服務，兒童、孕婦、產婦、長者同埋一些弱勢社群，即係包括一些腫瘤嘅病人、傳染病嘅病人同埋精神病嘅病人都係完全免費嘅。已經佔咗我哋公立醫院 8 成嘅病人。我哋衛生局會繼續係加強去完善各項嘅服務同埋基礎措施。另外就會加大人力資源嘅配置。但係，係唔係真係不斷咁去擴大醫療安全網呢，這個係要慎重去考慮。

我哋係有幾個方面去縮短這個輪候，譬如剛才講嘅分流，另外一個就係我哋衛生局外面嘅分流，即係話分流給以購買服務嘅形式，係向這個一些非政府組織嘅醫療機構做一些購買服務。有議員都關心過我哋有一些輪候時間比較長嘅科目，其實我哋一路都有同鏡湖醫院購買服務嘅。我講一講，有病理解剖、血液透析（即係洗腎）、放射治療、心臟介入，一些化療同埋一個 CT 同埋 CT 檢查同埋核磁共振檢查，高壓氧嘅治療，這些都係會以購買服務嘅形式向鏡湖醫院購買嘅。

另外一個，我又介紹一下醫護人員培訓規劃。我哋已經制訂咗個完善醫療系統建設方案十年規劃。因為，這個興建嘅進度，我哋衛生局都高度重視同埋加緊進行這個醫護人員增聘同埋培訓嘅工作。我可以講返一個數字，統計局嘅數字就係澳門居民同護士嗰個比例係 1 比 2.9，但係，如果係照實際，因為有些護士在醫院做就有登記嘅，其實我哋澳門總共嘅護士係 1,842 人，咁即係話每 1,000 人口應該係有 3.3 個護士。這個係比起一些國家係唔夠嘅，不過這個我哋係一路不斷咁去增聘這個護士，一路係增加這個護士嘅培訓。但係，另一個就係我哋澳門絕大部分嘅私家醫生都唔需要護士去幫手嘅，所以，澳門大部分嘅護士都係集中在醫院度工作嘅。咁即係話澳門係缺乏一些社區嘅護士。我哋衛生局喺這幾年都加大咗招聘護士嘅人數。譬如 2011 年係招聘咗這個，增聘咗 130，今年係增聘咗 79 個護士。而家我哋衛生局嘅護士總數係 958 人，咁下一年我哋都會再繼續增聘 112 個護士同埋 47 個護理助理員。其實護理助理員都係其他國家而家都係有一個趨向，就係訓練一些助理員去做一些護士嘅工作。咁我哋近期就係已經培訓咗近 300 個護理助理員同埋係即係提升佢哋做這個護理助理員，咁就可以解決咗一部分護士嘅工作。但係，其實講真，護士短缺就係淨

係澳門，全世界嘅護士都係短缺嘅。所以，唔係淨係單單增加招生、增加招聘就可以解決。其實護士個數目，係譬如係受到有幾多中學生報讀護士這個課程，又或者係護士學校個個老師夠唔夠。同埋仲有一個好緊要嘅就係我哋護士個個實習場地，在澳門係唔足夠嘅。所以，即係這些係會影響到這個護士個個培訓嘅工作。咁我哋係會積極在各個方面加強這個招生，加強這幾個方面嘅。

另外，社工局在今年就已經開始協助一些社區嘅老人，老人同埋康復機構在內地聘請一些護士來澳門工作。這個又可以解決到，因為社區護士唔夠。在醫生方面，澳門整體嘅醫生數字係唔會低過其他國家或者地區，只不過係一些專科醫生我哋係比較短缺嘅。但係，我哋在制訂咗這些建設嘅時候，我哋都會制訂這個醫生培訓嘅規劃。而家淨係同這個鏡湖醫院同埋科大醫院合力，就以一個新嘅模式去培訓醫生。因為，醫生培訓制度在之前我哋係，司長頭先都介紹過，係之前我哋以為用這個行政法規可以通過嘅。但係，法務部門建議係需要以這個法律嘅形式通過。所以，我哋而家係加緊去修訂這個醫生培訓制度。在這個醫生培訓制度未通過之前，我哋都在上個月已經開始咗一個新模式嘅全科醫生實習。已經而家係有 79 個剛剛畢業嘅醫生進行這個臨床培訓，下一年我哋係會再增加到 100 個。希望這個新嘅醫生培訓法律可以盡快通過，咁就可以這個專科醫生都可以一齊加緊這個培訓，可以回應到我哋未來個發展嘅需要。

就這兩個問題我介紹到這裏。

主席：好，請張司長。

社會文化司司長張裕：主席，或者我想請澳門大學趙偉校長，就頭先議員提到嘅幾點係作一介紹好唔好呀？

主席：好，請趙校長。

澳門大學校長趙偉：好，謝謝。

對不起，我講普通話。我的廣東話少少，還不是很好，請各位議員包涵。

首先，我還是想利用這個機會感謝各位議員，感謝澳門社區長期以來對澳門大學的關懷和關愛。大學現在應該說我們努

力的向前進，但是，這都是在這社區，特別是在座各位社區的領導的關懷下支持的，所以，我想借這機會表示一下。

剛才麥議員提出就是關於澳門大學就本土化研究希望能夠加強，這點我覺得非常認同，因此，希望象這個用幾分鐘機會給大家介紹一下。

其實，澳門大學，我們認為，首先，我想講一下就是搞科學研究究竟是為甚麼？大學是教書的，我們搞科學研究目的是為了教學生。只有老師掌握了這個活的知識，因為，現在是知識社會，這個知識一天到晚都在變化，所以，我們希望老師做科學研究去發掘知識，只有他掌握了這個活的知識，那他教出的學生才可能不斷的有高的質量。但同時，科學研究又是創新不能重複，人家已經研究出來的東西，我們不能再重複，我們要搞得比別人更好，這跟體育運動類似，要不斷的去破紀錄。但是，關於這個本土化和這個國際化研究，其實，澳門大學我們在兩個方面都是支持的。因為，關心的點主要是在本土化方面，所以，我想利用這個機會介紹一下，我們在本地和本土就和澳門社會有關這些研究方面。

大家當然知道像我們的土木工程，我們的機電的研究，這些都是根植本土而且已經為本地社區一直做服務的。那麼最近幾年，其實我們澳門大學在不斷的擴展中的，其實我們也注意到，我們在國際化的同時也要本地化、民族化。比如說，我們正在大力推動一門，我們澳門獨特的學科叫“澳門學”。因為，我們澳門在歷史上有其非常豐富的歷史，中西文化交融，我們無論在文化上、社會上和經濟上都有其獨特之處。這一點不但是澳門本土問題，其實引起國際上非常重視。我們三年前就在澳門開了第一次澳門學研究研討會，受到了非常好的影響；去年，我們就到里斯本開；今年 10 月份，我們剛剛在北京開。可見我們把本土的研究搞好，不但能夠服務澳門社會也能把澳門社會、澳門文化發展中的經驗推向世界。又比如說，澳門大學剛剛在碩士這個階段開展研究就關於做度假中心。好幾位議員也提到澳門產業要多元化，成為這個世界旅遊中心是我們一個目標，但在這成為這過程中，這個度假中心作為一種新的這個旅館的運作模式，它裏面有多少問題應該怎麼管理、怎麼培養人才，這方面我們也專門設立了學科來做。還有比如說，我們剛剛出版了一套很完整的這個澳門地理地圖集，那很大的，那是好幾年的研究成果。我們發佈這個書的時候，其實澳門很多領導都到了。如果哪位議員有興趣的話，我們也願意給你明天送來。最近，比如說我們又發佈了這個葡漢的一套字典，有這麼厚。因為，我本人葡文基本上不懂，但據

我被告知，這是現在應該是最完整的葡漢字典。同時，我們比如說研究這個葡語和漢語的機器翻譯問題，這些軟件實際上現在在澳門的一些機關都在用著。那麼澳門大學現在也正在新校區，新校區後我們有更大的空間，我們將設置一些新的學院。比如說，我們將有健康學院和設計學院，這兩個學院其實設置本身，其實從今天討論來看我就認為，那我們幾年前做的規劃當時也是徵求過各位意見，那是對的。大家剛剛就提到我們在健康方面這個人才很缺。那我們在健康學院希望這方面能夠就澳門本土最需要的人才能夠加以培養，那設計學院這就直接跟所謂文創等等直接相關的。剛剛有些議員聽到像電影的後期製作等等，這都屬於設計學院的範疇。那麼在澳門大學的橫琴新學區，我們將開闢這學院，它就包括在工程上。其實我剛才說到，我們有做些研究到國際上需要去研究，其實到那邊去研究的目的，很大一部分也是為了服務澳門。比如說，大家知道今年早期，我們澳門曾經這個網絡出現嚴重問題，大家可能看過報導。出了網絡問題以後說來是很慚愧，這是澳門大學的慚愧，澳門這個服務商它找不到人修，要派人從香港坐了輪船過來修。整個澳門 Internet 癱瘓好幾個小時。但是，我感到幸運的是，那麼出了事情以後在調查工程中，這個電訊局找到我們澳門大學，我們澳門大學的譚老師就和電訊局一起很快的就找出了這個原因，就說為甚麼這個原因出的這個供應商應該負多少責任。最近我看報導也看到，就說這個電訊局已經要這個罰款，甚麼都出來了。所以，這方面我們也做很努力的。所以，我想很感謝議員對我們的提醒，我們對國際和本土化的研究都是非常重視的。無論我們怎麼做研究，主要的目的還是為澳門培養好的人才。

還有一個問題，就是問到就是關於這個薪酬問題。我想講一下，第一，其實，我們在政策上絕對不會對本土人歧視，這個也不可能歧視。所以說，我們不會說因為你是澳門生的會有澳門身份證，我要把你們薪酬降低一點。我們這個一般評定薪酬等等，都有很多委員會，這是基本上不可能做到的事。但是，現在這個人才確實是流動的，我們澳門每年不要說高級人才，我們澳門每年光是中學畢業生都有很多人到海外留學。那麼因此，我們也很注意要積極的培養我們自己澳門本土有用的人才。澳門大學比如說現在我們有很特殊政策，我們學校每年保留有若干個名額，我們就想吸引澳門人到了海外以後，經過學習已經有成就想回到澳門來工作的，比如說前年培正中學校長就告訴我，他說：我們培正中學有一個學生出去到美國康內爾大學，學量子計算學得很好，他想回到澳門來，你能不能考慮？我說我們就有這個特殊政策。因此，所謂的特殊政策甚麼意思呢？平常我們有一些名額都分給各個系招人的，但是，我

在校長手裏面把握若干個保留名額。我就告訴各個院長，這些保留名額只用於澳門人在海外學成願意回來，我們就用這個名額去招。所以，那個教授我們已經很成功的招回來了，當然，他要達到我們的教學研究的標準。明年比如說我們在路易斯安那斯大學，有一名很好的講座教授姓彭的，他在美國已經工作了好幾十年，他現在願意回來，那我明年 8 月份他就會回來。所以，這個政策我們將繼續堅持下去，我們也很願意聽我們各位社團的領導、社區的領導，看在這方面我們可以再進一步改進，做得更好一些。

謝謝司長，謝謝大家。

主席：司長。

社會文化司司長張裕：主席：

剛才趙校長嘅介紹，其實澳門大學現在正處於歷史上面發展最重要嘅時刻。因為橫琴大學嘅工程進行當中，亦都係向各位議員報告一下，計劃在 3 月底完成這個工程，隧道亦都係能夠通車，而在 4 月嘅時候係會進行搬校。搬校係一個好大概工程。整間學校搬過去，又要購置，又要安排一系列，又要適應，對大學來講都係一個好大概工程。我哋到時政府方面會給予一個最大力嘅協助各有關嘅部門，希望中央送給我哋這個厚禮，可以順利搬遷，到時嘅辦學順順利利為澳門有更好嘅條件，培養我哋更好嘅人才。當然這個方面理工學院、旅遊學院，都喺不同嘅地方係做緊同樣嘅貢獻。

主席，或者我就頭先議員提一些問題再去補充一些材料，然後再由容局長、葉局長，如果有時間嘅話介紹一下，好唔好呀？

主席：好。請容局長。

社會文化司司長張裕：頭先有議員提及到投訴機制嘅問題，非常之同意嘅。這個投訴機制嘅話，渠道係開通嘅，我相信不論係公務員本身嘅投訴或者係議員轉介嘅投訴，我哋都會係認真咁樣處理。而唔少嘅投訴都係得到一個比較妥當嘅處理。譬如頭先局長同我講返嘅時候，有議員提及到一些事情啱唔有幾耐之前已經解決咗。這個就係投訴機制發生咗效果，部門亦都係重視係糾正返一些嘅情況。

不過我在這裏想借個機會都講一講，政府部門嘅工作，而家嘅工作量係越來越大。頭先大家都關心山頂醫院醫療系統嘅人手緊張嘅問題。據我瞭解局長同我報告，佢而家話進行緊 50 幾項招聘嘅程序。係唔係 50 幾項？考試，即係招考人員。哇，嗰個即係工作量係可想而知嘅。但雖然係咁樣，同事都努力去把它完成好。所以，我借這個機會亦都係公開嘅要嘉許下，我哋好多部門嘅同事，當然尤其是如果係衛生系統嘅話，個工作量、工作壓力係越來越大嘅。但係，佢哋亦都堅守崗位完成好對市民嘅服務。未來來講，當我哋有新嘅設施落成，新嘅急診大樓可能人手又緊張。這個湖畔大廈嘅衛生中心要投入服務，咁大嘅面積，所以，我都叫局長：你呀，快啲請多啲人先呀！如果唔係做到啲夥計嘅晒氣仲加難搞。預先請咗、調配好、安排好，方方面面都有好處。

主席閣下：

或者我就頭先議員再提到一些問題，有議員提及到澳門嘅抑鬱症係這個心理病嘅問題。一個最新嘅資料就係衛生局最新嘅招聘咗兩位心理醫生嘅，最新係招聘咗兩位。……係唔係呀？好。

而亦都係建議能唔能夠多辦一些國際嘅足球賽呢？尤其是同葡語系嘅國家，這個係一個好意見嘅，我哋會嘗試睇下點樣適當地去接洽。不過有一個困難，就係如果係請賓菲加，士砵庭，就係幾貴下嘅，貴到都可能好難預得起。但係，如果請巴西，巴西未試過嘞，巴西！但係，而另外非洲嘅國家來嘅時候，我哋又唔係話睇低人哋嘅水平咩嘢，有時又睇到一個叫座性嘅問題。但係，這個好嘅意見嘅，有些佢嘅水準唔錯，都有吸引力，我哋會作出考慮。

有議員問及到一個家暴法即打擊家庭暴力犯罪法案嘅立法進度，有些情況向各位議員介紹一下。這個立法嘅進度，舊年嘅時候社工局就這個法案進行咗公眾嘅諮詢。社會對家庭暴力事件嘅關注點，唔係單單在於告同埋唔告，而係在於這一次嘅立法能唔能夠確保受害人得到即時嘅、適切嘅同埋有效嘅保護。根據諮詢收集到嘅意見，立法嘅重點將會放在加強對受害人保護同埋支援嘅機制上面。而法案嘅名稱亦都暫定轉換成為家庭暴力防治法。按照時間表，有關法案將會於 2013 年上半年送交行政會，稍後在立法會進行討論同埋審議嘅。關於其他啲資料，稍後或者容局長可以介紹一下。

有議員問及到一個社工註冊嘅問題，進度如何呢？立法嘅進度而家處於甚麼狀況呢？當時註冊嘅思路，佢嘅對象，原意係包括任職於公職同埋民間機構嘅社工。但係，由於公職人員需要遵循專職性嘅規定，因此，係唔適宜將公職人員納入埋社工註冊制度裏面。而這一個法案嘅公眾諮詢工作，係在 5 月 8 號到 6 月 22 號進行咗為期 45 天嘅諮詢。期間在澳門鏡湖護理學院舉行咗三場嘅公開諮詢會，大約有 500 多人出席，60 多人次發言，收到二千多份嘅意見同埋建議。到本年 10 月 26 日社工局同行政公職局再次舉行會議，就考慮設立社工特別職程嘅可行方案交換咗意見。認為這個方案可以有效咁樣處理公職同埋民間社工在相同專業職業生涯，不同崗位領域上面嘅職份要求標準。有關嘅意見尚需要作出深入嘅探討。而社工局目前就收集返來嘅相關意見已經完成咗研究分析工作，有關嘅中文版諮詢總結報告亦都啱啱整理好，編寫完成，稍後會進行印刷，同時間亦都進行葡文版嘅翻譯工作。預計今次諮詢總結報告會按照著第 224/2011 號行政長官批示，《公共政策諮詢規範性指引》嘅法定要求下面，將意見彙集，而於本年 12 月 19 日之前完成諮詢總結報告同埋對外公佈嘅工作。向各位介紹這兩方面工作嘅情形。

主席，有委員亦都係問及到一個關於社會保障嘅長效機制以及老齡化嘅長效機制。或者我會講咗社會保障嘅長效機制一些構想，而關於老齡化嘅這個部份係留待明天再同各位係介紹嘅。

要落實社會保障範疇長效機制嘅思路，係特區政府想構建一個同社會經濟情況相適應嘅退休養老保障嘅制度，以確保居民，澳門嘅市民得到基本嘅生活同埋養老保障。參考嘅依據係根據世界銀行 5 個支柱式嘅老年經濟保障嘅模式，包括政府嘅援助、強制性嘅供款、私人嘅退休金、個人嘅儲蓄、家庭成員互相嘅支持。這些工作如果在澳門嘅社會保障體系裏面，係分別由三個部分組成，係社會援助、社會保險同埋社會福利。係分別由唔同嘅實體，如果以經濟援助，即係非繳費式社會救助嘅制度，係由社會工作局去負責嘅第一層。第二層嘅話，養老金係供款式嘅社會保險制度，係有社會保障基金負責。第三層中央公積金，即係話職業性嘅退休制度係由社會保障基金負責。而第四層嘅就係私人退休金嘅計劃同埋儲蓄。第五層就係家庭成員之間供養嘅制度。

在澳門來講，如果我哋會進行落實措施嘅思路會係點樣呢？如果係以第一層來講嘅話，係需要建立短、中、長期相互配合嘅這一個經濟生活同埋教育援助嘅制度——即係唔係單單

係經濟，生活同埋教育都係會包含在內——為有需要嘅人士提供嘅基本的生活保障。一如而家我哋現行制度裏面，係會設立最低維生指數跟蹤嘅觀察，定期調整機制。而家澳門嘅最低維生指數最新嘅金額已經調升至 3,360 元。另外，亦都係對殘疾人士進行評估同埋發放津貼。立法會通過咗之後，第一、二級嘅係澳門幣 6,000 元，明年將會建議調整為 6,600 元。再加上免費衛生護理同埋乘車優惠。至於嚴重嘅級別第三、四級，喺 2013 年將會調升為 13,200 元，加上免費衛生護理同埋乘車優惠。

另外一個，第一層裏面可以有自行管理或者係同社團合作提供各種社會服務設施或者服務，係讓有需要嘅人士可以為佢服務到。一如頭先介紹到大約有 100 多個社會服務機構同埋有啲團體嘅話，大約總共 200 個嘅這個單位係提供各樣嘅家庭服務、臨時收容中心啦，包括，社區服務、頤青服務、托兒所、頤青院舍、長者服務、安老院舍、日間中心、耆康中心、平安呼喚嘅服務、獨居長者服務、復康嘅服務。有復康嘅院舍、日間嘅工場、庇護工場、職業訓練中心、復康綜合服務、教育中心、復康巴士服務等等。亦都有防治藥物依賴嘅服務，即係戒毒。戒毒康復院舍、預防藥物依賴服務、戒毒外展服務。另外，其他有綜合服務，亦都有預防賭博服務，這個一方面係有 5 間嘅。再一個就係對年滿 65 歲以上嘅長者每年發放敬老金，2013 年會調整為 6,600 元。

在第二層裏面，養老金係作為社會保障制度嘅主要給付，目的係為居民提供基本嘅養老保障，以隨收隨付嘅社會保險形式運作。現在制度裏面 9 成嘅養老金支出係由政府承擔。政府已經計劃未來 4 年額外注資 3 千 7 百億……講錯，對唔住，大多了……政府已經計劃未來 4 年額外注資 3 百 70 億，並且建議明年加大對撥入社保基金嘅金額。估計明年由社保基金來自博彩收益嘅撥款，將會收到超過 40 億。這個就係社會保障基金嘅一層。

第三層係中央公積金方面嘅工作。在 2009 年嘅時候推出咗中央儲蓄個人帳戶嘅措施，開戶每人即撥入 10,000 元，其後嘅三年分別係 4 千，6 千，6 千。並於 2012 年透過《公積金個人帳戶》法案繼續執行。未來嘅時間將會落實《中央公積金制度》嘅法案。現時嘅成效同埋未來嘅工作嘅話，我哋喺可以睇到，其實澳門社會福利並不太差。因為點解呢？而家推行嘅養老模式已經比較接近世界銀行嘅建議。而未來亦都會持續因應經濟發展同埋人口變化，透過聽取社會嘅意見、研究同埋分析，定期精算同方案改善等等嘅機制，有序咁樣完善雙層社會

保障制度嘅執行同埋運作，使到有效咁樣保持社會保障長效機制嘅實施。

這裏補充多一句，如果透過稍後關於供款嘅提升達成共識的話，同埋政府未來這些支援嘅撥款或者注資，我哋澳門社會保障這個體系，但嘅生命力如果冇記錯應該起碼 40 年嘅，就唔會話 10 年、20 年，就會有危機或者會出現破產嘅。

主席，或者剩返時間我想請葉炳權主席會補充一下，尤其是對於一些資金嘅管理，點樣可以升值更多一些。或者容局長，唔知夠唔夠時間啦。

主席：請葉炳權主席。

社會保障基金行政管理委員會主席葉炳權：首先在保障基金嘅管理方面，我哋一直以來都係以一個穩健投資嘅方式去進行嘅。可能大家都係會觀察到這一、兩年在社會保障基金方面嘅投資個個收益回報，相對來講係比較低些。咁我記得 2011 年約有 1.64% 嘅收益。咁這一個歸根究底嘅原因，最主要就在近這幾年，佢個市場嘅經濟波動十分之大。咁在隨著社保這個資源不斷，特別係博彩撥款加大咗，個個收入係多咗，所以，撥給社保個個款項係增加咗。所以，導致我哋個個現金存量相對來講係大咗嘅。咁而亦都係同一個正常嘅社保基金方面嘅管理、投資嘅增值係有所偏離。因為，一般上我哋現金存量係唔應該咁高嘅。咁而家，如果而家睇返目前個情況，我哋個現金大概係佔咗我哋 8 成半。另外，在環球嘅投資裏面係佔咗 1 成半，咁所以，導致這個投資嘅增值係減少。咁但係，我哋亦都注意到，在去年，我哋亦都注意到相關嘅情況，咁所以，我哋亦都係建議係希望增加這個投資。咁但係，在去年亦都係唔係咁好彩，因為在個歐債危機，咁佢其實係發生。咁所以，當我哋準備去投資嘅時候，咁我哋亦都係有所延誤落來。咁最後，咁我哋亦都係開始，在今年初開始去甄選，在一些新嘅債券方面嘅一些基金經理去進行這一方面嘅投資，希望能夠在一個穩健嘅情況底下去增值。咁透過在現今嘅，初步同我哋嘅財務顧問公司去商討，暫時係以一個保持現金係 6 成，環球投資係 4 成咁嘅方向係去進行我哋個個投資，令到我哋個個增值係在，如果我有記錯，大概 3.7% 到 6.5% 之間。咁而在未來，隨著我哋這一個現金，隨著我哋這一個總體嘅資產係不斷增加嘅時候，咁我哋嘅負回報機會係細過 5%。咁但係，大家要注意，當一個投資如果係長期性嘅時候，咁我哋出現負回報嘅機會係十分之細。咁當然，在中間裏面係有經濟嘅周期係不斷咁波動，咁大概十多年就會有一個大嘅經濟循

環，三幾年係會有一個小嘅經濟循環。咁當佢在一個長期性嘅時候，總體我哋個增值係會有一定嘅保證。咁無論如何，在資金嘅管理，我哋資產嘅管理方面，我哋都朝著一個穩健，跟著去增大這個回報，令到我哋嘅資產都係可以，再加上這些嘅投資嘅回報，令到我哋可以保持 40 到 50 年嘅一個狀態，令到我哋係可以有這一個嘅穩健嘅發展。

咁另外，我哋亦都在行政管理委員會裏面，係有勞資雙方嘅成員，再加上社保兩個嘅領導人員，再加多另外一位政府所委任嘅一個人員係去管理我哋相關財務嘅狀況。我哋每一筆嘅投資都需要係相關成員嘅確認，之後再給司長去批准，同埋最後，如果金額係高嘅時候，都需要特首去進行一個批准。

咁另外，我哋亦都係有一個監察委員會，係對於社保嘅財務嘅狀況同埋一些行政嘅管理，佢哋都係會進行監察。

司長、主席：

我大概係補充咁多。

主席：好，各位議員：

這個社會工作同埋社會保障領域，相信聽日仲有議員會就這個問題發言，或者其他嘅領域，甚至乎教育、衛生講咗了，聽日都會有議員提出問題；旅遊、青年、文化、體育，還有好多。

咁我哋聽日下午 3 點鐘繼續這個施政方針辯論。

現在散會。

(休會)

(十一月三十日會議)

主席：張司長、各位官員、各位議員：

午安。

我哋今日就繼續社會文化領域 2013 年度施政報告嘅辯論。

請徐偉坤議員發言。

徐偉坤：多謝主席。

張司長、各位官員：

昨日司長講：真人真君子。我相信司長嘅個人操守不容置疑。會議周不時都會偏離咗政策嘅討論，好多時都對人不對事，時有發生嘅。這些都係搵食嘅伎倆，司長唔使介懷嘅。

首先，我想講下教育問題。施政報告一出，社會就聚焦在福利嘅部分。所以有人講：這些長期優惠多，相對一些長效機制就有甚麼人關注。但其實在報告裏面有一點係非常之亮眼嘅，就係強調咗教育興澳這個施政的路向。司長在這個施政方針亦都用咗好長嘅篇幅，用咗三分之一嘅篇幅，由第 239 至到 250，共有 11 頁紙，體現咗司長以人為本這個施政理念。

澳門嘅經濟唔能夠獨自發展，必須靠人去扶助。現在經濟發展得咁好，公民素質一定要同步前進。從教育水平嘅整體提升，豐富人嘅內涵同埋視野、知識同埋能力，要面對將來世界全球性嘅競爭。澳門有咁好嘅福利政策，係政府要同居民分享成果嘅一番善意。進步離唔開人才嘅培養，但係，我相信要培養嘅絕對唔係一班只係識得享受福利嘅公主同埋王子。

在施政報告中嘅教育政策，其實係政府對澳門所作嘅長遠承擔。比如話在非高等教育方面，政府明年增加咗 26% 嘅資源投入。另外，高等教育貸學金名額同埋金額亦同時增加咗，又將會籌設高等教育基金。司長又重點鼓勵持續教育、終身學習這個理念。澳門在培育人才嘅工作上可謂不遺餘力。注重人才發展，實現澳門將來長遠嘅利益，係一個負責任政府應該做嘅事。我對於有關嘅政策係表示高度嘅認同。我想問司長，你將會如何實現你嘅理念同埋落實有關嘅政策？如何降低之前何少金議員所關注嘅留班率？

剛才係講到教育。教育唔單只係知識同埋技能嘅灌輸，亦包括思想上嘅引導。公民教育亦都係教育。司長在引介中亦提出要培育學生正確嘅人生觀同埋價值觀。其實唔單只係學生，如何加強公民教育、糾正居民價值觀同等重要。

自從幾年前第一次進行咗現金分享以來，政府年年向市民大灑金錢。這幾年嘅通脹非常之高，無論有錢好或者冇錢好，一樣深受其害。政府現金分享同埋一籃子嘅惠民措施，無疑係可以令日子過得好些。政府與民分享經濟成果嘅意願，亦平衡咗不少人嘅心理。久而久之，這些措施成為慣例，成為某

些人心中應份得到嘅好處。每年嘅施政報告，好多人只係關心，喂，明年現金分享有冇加碼？增加咗甚麼津貼同埋補助？明年又可以收多幾多錢？社會上有意見認為施政報告欠缺長遠規劃，但真相其實係，無論傳媒又好，市民口耳相傳都好，談論嘅焦點都在金錢福利。長期規劃對不少人係少留意嘅，而又好少人有興趣去討論。由此可見，社會嘅心態在這幾年已經慢慢起咗變化。有些人每年期待嘅施政報告好似期待有錢在天跌落來一樣。好似前年嘅施政報告建議將一部分嘅現金分享轉到央積金嘅戶口。這個本來就係長期嘅規劃，點不知一公佈咗之後就群情洶湧，就連報紙社論都鬧埋亦一齊，咁有甚麼道理呢？一個城市有著同一個共同價值觀係非常之可怕嘅，就好似我哋成日講要讓澳門人向上流動，給多些機會佢哋向上流動。當然，如果向上流動一定要靠自己嘅努力去爭取，但好多人嘅說法就唔係，若要向上流動嘅話就要將外來嘅管理人員踢走咗先。咁這個心態係甚麼心態呢？還有，一畢業就話應份要買到樓，買唔到樓嘅話就係政府嘅錯。冇錯，現時經濟好景，公共財政收入理想，但係要保證人人買到樓，我相信公帑唔係咁樣用嘅，同時我相信有一個政府係可以做得好。社會上不斷提出咁嘅訴求，要咁樣、要咁樣，要增加福利，這個福利啲樣福利，加上一些政客為討好選民而推波助瀾，造就咗好多唔理性嘅願望同埋理想。有些人唔想付出，但係想得到嘅；想要權利又不盡義務。如嗰個個人對公共財政嘅收入都予取予求，將來邊個去建設澳門呢？我哋將來有甚麼條件去成全高福利？早幾年，杜拜就係一個好好嘅例子。

剛才講到嘅現象不單止反映咗社會嘅問題，亦都反映咗一些教育上嘅問題，我希望社會加以重視、深思、討論。在社會文化領域裏面亦可以深入研究現時嘅短期福利措施所引起一些嘅副作用。同埋點樣從這個教育方面著手，將理性嘅思想同埋價值觀矯正。這個工作就真係長期規劃，司長你真係任重道遠。

昨日我聽到葉局長講基金嘅回報率係有 1.64%。我返去睇一睇，比拼一下，就比我哋財政基金投資回報 0.7% 多咗 1 倍有多。我相信官員亦都可能有些資源錯配。

在明年嘅施政報告裏面，對照長者方面嘅措施，著墨唔少，單係講到金錢上嘅生活補助都差唔多令人眼花繚亂。好似這個施政報告小冊子，幫助市民，歸納起來，有敬老金、養老金、現金分享、中央儲蓄嘅額外注資，加埋，每位長者每年都有 6 萬蚊，平均每月有 5 千蚊嘅，另外再加上 6 百蚊嘅醫療券。咁多項目可能連自己長者數都數唔清。當局係唔係可以將

佢哋簡化一些呢？養老金屬於長期性嘅退休保障政策，每個月發放一次。至於敬老金當局由 2005 年開始發放，原意係體現對長者嘅關懷、弘揚敬老嘅美德，每年發放一次。如果嚴格區分兩者嘅話，兩者的確具有不同嘅功能。但時至今日，敬老金已經差唔多同樣成為一個長期嘅措施。再者，為咗精簡這個制度同埋手續，係唔係可以考慮將佢哋合二為一？或者將發放時間統一化？特首在施政報告裏面曾經透露咗這方面嘅意向。在佢嘅報告裏面嘅第 13 頁指出：政府將研究把敬老金納入社會保障範疇發放嘅可能，以有助提高養老金與敬老金發放嘅行政效率。本人贊成把敬老金同養老金結合成為養老保障之中，無論對政府或者對老人家來講都係比較方便。司長可否講一講這項研究詳細情況？佢嘅行走軌道係點樣？因為，在司長你嘅施政方針裏面睇唔到有相關嘅資料。

仲有少少時間，我想講一講，早幾日我都講過，就係關於檢討免稅車問題。其實我哋現在的道路，車輛負荷非常之嚴重。我唔止一次，係多次建議政府係唔係對機動車輛稅嘅規章進行檢討，尤其是研究撤銷一些現時我哋賺錢最多嘅行業，好似酒店、旅行社、賭場，佢哋個個豁免優惠政策，紓解一下現時黃牌車充斥市面這個現象。因為這個問題牽涉非常之廣，旅遊、稅收、法務、環保都有牽連嘅。所以在這段日子裏面，行政法務司、經濟財政司同埋運輸工務司三個領域嘅官員都先後作過回應，但係始終都未有一個較清晰嘅共識。

賭場、酒店、旅行社這些企業屬於旅遊局嘅管轄範疇，以現時龐大嘅旅遊車輛對其真正是否有需要？司長認為合唔合理呢？獲得豁免嘅旅遊車又好、小車又好，只要在車身印上公司嘅名字，無論大小、顏色顯唔顯現都係可以嘅，有些可以用放大鏡都睇唔到嘅。這些車輛係唔係真正攞來做公務用途呢，一般人係唔知嘅。有冇可能這些免稅車其實在企業裏面係給董事用嘅？所謂董事車又好、老闆車又好，這些對納稅人來講公唔公道呢？我覺得有時這些車輛真係有些濫用資源，浪費咗我哋嘅公帑，抽我哋納稅人嘅水。希望司長可以同有關部門研究一下，係唔係檢討下這個黃牌車工作。

多謝。

主席：關翠杏議員。

關翠杏：多謝主席。

司長、各位官員：

我今日想同司長探討第一個仍然係關於社保問題。

昨日，司長就講咗好多關於政府在社會安全網嘅理念，亦都提及到社會保障基金嘅制度上面一些問題。記得前幾日，行政長官就來這裏立法會講明年施政嘅時候帶來一個訊息，就話明年嘅一月份開始，養老金就會增加到 3 千蚊。這個對於受惠嘅長者來講當然係一個非常好嘅消息。同時，政府亦都講咗，話喺未來嘅 4 年會注資 370 億。我相信這個消息亦都係我哋長期希望社保能夠有持續運作嘅資金方向上面有一個好好嘅回應。司長，你昨日仲講咗一個非常之好嘅預期，你就話社會保障基金未來 40 年都可以好穩健，我哋嗰度嗰啲後生聽起來就話：咁都安樂啲。但係，對於這一個問題，我自己真係諗來諗去，我唔知道司長這個條數你到係點樣計。因為講到底，至到而家為止，社會保障基金在發放福利，尤其係養老金嘅安排上面，到底計劃同規劃係點嘅？同理，在未來有一個方向，係點樣引領著社會保障基金能夠持續運作？我相信這個係淨係基金管理委員會嘅問題，佢會涉及到我哋澳門幾十萬人未來福祉嘅問題。所以，其實大家都好想知道，不過好可惜你昨日冇講到這些，你淨係講到最後你拍心口講 40 年冇問題喇。咁但係我哋都要有依據。所以，我好希望你能夠將這些問題清楚去講。我相信今日施政報告應該有甚麼條件，因為你太多範疇，但係我相信我將來會跟進，亦都希望司長你能夠盡量給多些資料。因為到而家為止，我知道在協調委員會都仲未清楚瞭解到整個社保未來嘅構想到底係點。

在這裏，我第二個就想去談及關於養老保障嘅第二層問題。昨日我哋亦都有同事提到，其實當日構思雙層社保嘅時候，養老金制度只係一個最基礎嘅養老保障第一條線，而第二條線就係中央公積金制度嘅構建。而政府最初嘅想法就係透過非強制性中央公積金來開啟中央公積金制度。咁這個非強制講到明係非強制，即係自願參與，但係點樣自願參與呢？其實講咗幾年落來，政府在中央公積金制度上面，我真係見唔到你哋做到些甚麼。當然，在這個範圍裏面，其實好多人都會講到一個問題，就是說，其實而家在我哋澳門社會裏面，本身就已經存在咗一種叫做私人退休金制度。我記得在 2010 年嘅時候，政府亦都來到立法會介紹過，當時亦都提出咗一些數字。佢就話：在全澳門去到 2010 年嘅第一季，我哋參與私人退休金制度嘅僱員其實係已經接近 8 萬，係 7 萬幾人，7 萬 8 千人，當中係有 600 幾間企業。本來在這些現存嘅制度上面，只要政府努力些去做一些條件去推動，佢哋本身已經有條件點樣去加入這個非強制性中央公積金裏面。但係我唔知點解做到而家，這些機構基本上都未有接觸到，亦都未有條件坐落來去傾。究竟係

政府嘅決心問題又還是遇到甚麼難題，我真係好希望可以知道。因為你越遲一日去落實中央公積金制度，其實對我哋，尤其係作為僱員未來嘅養老保障損害亦都係會更大。

另外，我哋昨日亦都有同事提到嘅，其實你真係可以參考，而家在政府嘅資助項目，包括咗現在《私框》嘅落實，以至到你昨日都介紹咗一個數字，有差不多 200 間嘅機構係政府透過資源去資助嘅社會服務機構，佢哋有條件建立中央公積金。咁樣點樣在這裏行先呢？我覺得政府應該在這裏要做一個積極點嘅態度。我唔知司長有甚麼回應，但係在這裏，我作為勞工界嘅人，我的確好希望政府在這裏去完善好這些相關嘅制度，行出一步。

另外一個想講到嘅就係關於社會保障基金嘅管理問題。頭先徐議員又讚下，咁起碼，我都要讚嘅，要讚甚麼？因為，事實上比金管局嗰個效果好好多。但係我就有留意到，其實我哋睇返我哋嗰兩年中央帳戶嗰個利息其實唔錯嘅，好高。吳議員昨日問，我諗可能佢少人去睇下，我哋嗰啲緊張啲，我會入去睇。我睇到之前其實擺咁少時間、咁少錢，正常你有擺過嘅那些人，而家未夠 65 歲那些係有 600 幾蚊利息。所以這個係一個唔錯嘅收益，講句笑就有些人都會話：點樣政府可以開放給我哋自己擺定一些錢入去？有咁高利息，肯定高過銀行。我覺得這個係一個好嘅方向，但係從要求上面，我仍然係希望社會保障基金嘅管理者應該要有一個更開放啲嘅思維。因為而家嘅這種基金管理同當初 1990 年成立社會保障基金係完全唔同。我昨日聽到葉主席你嘅介紹，我其實有少少唔係咁認同。當然你講咗有管理委員會，但係當時嘅管理委員會係基於當時好低效運作嘅社會保障基金，資源亦都極少，嗰陣時嘅管理我相信應付得到，但係面對今日，我哋剛剛，淨係，截止我留意到嘅就係去年剩餘嘅錢已經係 110 億。在咁大筆錢嘅資源留喺度嘅時候，資源投放增值效果應該更佳。而且社保基金仲有一個好重要嘅問題就係現收現支，所以這筆錢可以基本上唔郁嘅。在咁嘅情況底下，佢嘅投資效益應該更大。而現時嘅管理委員會，我唔質疑這些人士佢個能力，但係我覺得未必應付到一個專業投資需要。係唔係有需要加強同埋完善呢，去聘請更多相關嘅人士入去給一些意見呢，我覺得這一方面需要注意嘅。

另外第二個，葉主席亦都提到應該，可能搵一些基金經理作積極嘅投資。我覺得這個係一個好嘅建議，不過我在這裏亦都提醒要注意嘅，香港強制性嘅公積金制度到最後這幾年落來，其實大家都在檢討高昂嘅管理費問題。所以，我哋澳門係唔係一定要行這條路呢，又或者係唔係一定要將我哋這些希望

寄託在人哋嘅手上面呢，我覺得這些應該係更加多思考。所以，這裏係我個人嘅一些建議，僅供參考。

下面落來想講一講關於教育嘅問題。昨日，關於非高等教育嘅提問，其實政府好少答到。在這裏我就係想講一講，首先想講嘅，就是早前就我收到一些入網學校，佢對政府學生學費津貼嘅問題有好意見。當然過程當中係有其中嘅某一些問題我唔去講，但我相信政府你哋係清楚。但係作為入網學校，我覺得入網學校本身就係作為在免費教育網裏面一個重要嘅支撐。當日點解政府要制定一個免費教育網？就係希望透過推動學校入網，來到完善一個免費教育制度。更重要嘅理念就係要讓所有嘅學生，包括冇條件或者係經濟緊缺嘅學生都能夠在一個共同嘅公平學習資源同埋環境底下去得到學習，得到保證佢完成 15 年嘅免費教育。所以這一個理念上面，在這一個理念上，係應該要所有人都有一個公平嘅環境，這個就係我哋作為免費教育網絡設定嘅一個最終核心。但係，而家根據我哋這些入網學校嘅反映，除咗包班費用之外，處處受制約，無論收生、無論學費或者其他費用嘅收取，而導致到學校冇更多嘅資源去加強硬件建設，吸引更優嘅師資。這一種結果係唔係就係公平呢？我有留意到司長你在昨日嘅介紹裏面第 14 頁講到嘅，會優先去對一些，尤其入網學校嘅扶助。但係因為你冇介紹到，我唔知你裏面有甚麼內涵。我希望政府能夠透過這一次施政辯論解釋一下，讓人網學校嘅人士多些瞭解政府嘅想法同埋理念，唔好大家產生好多意見，而影響到教育嘅效果。

咁再一個，頭先大家同事有提到一個關於留級率嘅問題。其實這一輪都提咗好多。但係我這裏又唔係講甚麼留級率，但我始終又覺得政府在教育上面總係有一個缺失，這個缺失就係我哋作為學生在接受教育嘅時候總有不同嘅人，但我哋而家在教育系統上面仲係以文化教育為主，學歷教育、應試教育，對於一些唔擅於讀寫應試嘅人，又或者一些操作性相對比較強嘅呢啲咁樣嘅學生嘅情況底下，我哋有冇一些薰陶嘅方向給佢哋呢，特別係對於澳門嘅未來？而家澳門唔少人整天講我哋澳門冇人才、冇人才，又輸入咗好多人才，十年落來都係要靠輸入人才。點解我哋自己冇呢？澳門早幾日有個官講：30 年了，這個輸入外勞制度。係呀，我都好似佢想講嘅，除咗你話給我聽人力資源緊缺要填補，我有反對意見，但我哋澳門整天都話冇人才，30 年都可以冇人才，究竟係甚麼？係我哋嘅教育系統出問題，還是根本唔刻意去諗甚麼人才呢？所以，我在這裏我想提嘅就係話作為職業教育，政府在這裏的而且確有認真去思考，特別面對未來。而家好簡單嘅一個，將來我哋有輕軌行嘅時候，我哋在機電嘅教育上面，即係專業嘅中專人才

訓練，到底我哋做得幾多呢？但未必一定係話要去到勞工局做這些，關鍵就係從職業教育已經應該要開始。所以，我希望政府在這裏你哋真係要有多些思考。我今早睇咗一個教育工作者給我一份報告，講佢在教青局嘅組織底下去咗德國參觀，佢返來好有感受，人哋將職業教育係點樣去作為自己人力資源培訓嘅一個全局考量。咁我覺得我哋政府整天都去外面參觀，我哋嘅官員係唔係應該要有一些新嘅思維呢？這個係建議大家去諗下嘅。

而家落來本來我想講旅遊嘅，不過沒甚麼時間了。我淨係想講一個，昨日司長你講到我哋有 200 間這些咁嘅機構。政府可能係透過購買服務或者係透過和一些民間機構合作，讓這些機構嘅服務能夠更便民。另外一個，佢嘅目的到底係為了甚麼？除咗便民之外，究竟係唔係想節省資源呢？但係在這裏無論點，我係希望政府你真係應該要考量，就是說，過去比較細嘅這些這樣的購買服務又或者係透過民間機構去承擔咗政府嘅這些地區嘅服務，但係容易透過本身機構自己嘅資源去支撐，但係如果越來越多，去到 200 個，你諗下民間機構點樣去支撐呢？所以，政府在資源安排上面，你哋一定要考量，唔係淨係政府資源就多，民間機構資源少嘅時候，你根本係冇辦法提供到質優嘅服務給市民。

咁差唔多夠鐘了，我都講唔晒。

唔該。

主席：崔世昌議員。

崔世昌：多謝主席。

張司長、各位同事、各位官員：

今日首先想同司長交換一下意見，關於幾個同青少年或者青年成長有關嘅問題同埋現象。

首先，在早前發表嘅本澳居民體質調查，當中反映出本澳青少年嘅體質偏弱，這方面嘅問題引起咗大眾嘅關注。青少年係社會嘅未來棟樑，係社會保持可以持續發展嘅人才依靠。在青少年就學階段，學校係佢哋學知識、長身體嘅地方，亦係佢哋生活嘅組成重要部分。通過同一些家長傾談，瞭解到目前一些學校在推進青少年身體方面有較好嘅安排，包括每周至少有兩次體育課，每天有早操，另外亦都係課間操，眼保健操。這

些安排既可幫助青少年在緊張嘅課堂學習之餘得到咗精神嘅放鬆，更重要係能在持續不懈嘅堅持中使到身體同埋意志得到鍛煉。然而，更多嘅學校卻只係每一周只有一堂嘅體育課，其它嘅體育活動完全欠奉。學生在學校除咗上課，仲係上課，其後就係補習。點解有不同嘅學校在體育方面會有咁大嘅差異？而教育部門在這方面是否對學校發出指引？或者體育活動是否屬於這個指引嘅範圍？教育部門針對本澳青少年體質偏弱嘅情況，請問會有甚麼措施作出配合？

另外又想同司長交流一下，就係在司長方針中，係對強化教師隊伍嘅建設提出咗一系列嘅措施，包括致力提升教師嘅待遇、增進與前線教師嘅溝通、加強家長同學校嘅合作、提升教師嘅專業水平同埋教學嘅技巧等等。這些基本上相信大家都會認同。隨著本澳嘅社會發展，教師嘅待遇逐漸得到改善，在一定程度上係吸引咗一批青年人入行。青年人嘅特點就係容易吸收新事物，有創新嘅思維。但係亦有一點就係好容易被周圍嘅環境所影響，而這些青年教師亦都較容易同學生有相近嘅話題，容易打成一片，容易得到學生嘅信任，從而影響學生嘅行為同埋取向。當局在教師培訓中是否有加入社會道德職業操守方面嘅內容，以便從小向學生灌輸積極向上、敬業樂業嘅精神同埋正確嘅價值觀同埋人生觀？

另外，在司長嘅施政方針嘅青年事務章節裏面提到鼓勵青年結社。我在上面都講到，青年係容易接受新事物、新思維，亦係容易受外界影響。結社固然係《基本法》賦予本澳市民，尤其係青年人嘅權利。從正面嘅角度去考慮，大家都希望結社係有利於社會嘅和諧同埋發展。因此，特區政府鼓勵青年結社，但係在這方面，實質上有甚麼構想？而這個方面嘅工作又係點呢？想問一問司長。

最後，這兩日都聽到好多同事同司長同埋有關官員溝通有關社保基金會嘅問題。我想發表一點個人嘅意見，希望司長帶返去考慮一下。首先，我係好認同社保基金會主席同埋佢同事做咗好多工作，亦都取得一定嘅成效，但係我亦都覺得佢係好辛苦之餘，亦都係負嘅責任係大過佢應該負嘅責任，點解呢？從兩點來睇：

第一，葉局長嗰個行政委員會得五個人，其實係得佢同埋一個全職委員去負責日常工作，其他三個係兼職嘅。我相信佢哋三個都好落力，但係主要佢係來參加會議。這個我亦都做咗一些調查瞭解。對於葉局長同這位全職委員來講，確實係負嘅擔子好重。但係，如果做得好當然好啦，如果有甚麼事發生嘅

時候，搵多個人來幫下手都係比較困難。而且大家都知道這個社保基金係越來越大、越來越個責任重。咁所以，我這裏提議司長，在未來嘅日子裏面係要給多些空間葉主席，例如可以將這個行政委員會擴大 1、2 名嘅位置，搵些專業人士，係全職或者兼職都好，幫幫葉主席手。

另外，我覺得亦都應該，一個基金去到咁大嘅時候，亦都應該有個監事會。這個監事會一面係監督葉主席嘅工作，但係另外一面亦都係可以幫佢分擔佢嘅責任，可以在事後提供意見或者在事前提出一些建議。咁我覺得這個我自己係認為司長應該要帶返去考慮一下這個問題。

我講嘅係咁多。

主席：區錦新議員。

區錦新：多謝主席。

司長、各位官員、各位同事：

好多問題都講咗了，我主要就想集中睇睇幾個長效機制。四個長效機制裏面就有三個都係司長嘅，就只是房屋保障嗰個唔係啫。

社會保障嗰個長效機制裏面，其實就我睇落去，長效機制係一個亮點來嘅，今次這個施政方針。但係，事實上就以這個社會保障長效機制為例，其實都唔係太長效，因為四年擺 370 億落去嘅話，其實係唔係真係可以支撐到 40 年呢？剛才關姐已經提出咗個疑問啦，我都希望司長能夠提供多些資料。因為除咗這 370 億之外，仲有，司長昨日都講每年會就在博彩毛收入嗰邊就係會撥多，注資多 40 億，但係，究竟係唔係真係可以支撐得到呢？這個都係好成疑問嘅，如果唔係整個制度上面有得調整嘅話。所以，這方面我都係希望這個長效機制真係能夠發揮長效作用，而唔係導致好多人會覺得我會讓……這個社保基金嘅供款供死會嘅咁樣，希望就唔會給人冇這個危機嘅感覺。

咁另外就係這個機制裏面亦都係包括仲有養老金。養老金就剛才冇同事提過啦，而家會加到 3,000 蚊，而特首嘅講法就話要將敬老金擺返落每月，擺埋落去。咁嘅時候，每月擺嘅時候就令到養老金加埋敬老金就係有 3,550 蚊一個月。咁就超出維生指數，紓緩到社會壓力，這個說法都係正確嘅。

但係，另外我亦都收到一些收緊殘疾嘅朋友，殘疾津貼嘅朋友，亦都係有一些意見。咁當然啦，我相信司長都接收到的了，佢哋不斷要求就係殘疾個個都能夠同維生指數睇齊。而家殘疾津貼本身，如果好彩，社工局嘅殘疾金又攤到、社保基金個個又攤到，兩邊攤到嘅話，咁嘅時候可能就其實平均每月都去到……如果將來加埋每月都去到 2,550 蚊或者係 3,100 蚊了。如果稍微加多些嘅時候，其實佢都逼近維生指數嘅，咁這方面亦都係有一個好嘅回應來嘅。

但係，另外多一點意見提出嘅時候，一些做殘疾工作，即係做這方面社會服務工作嘅人就同我講，佢話：其實殘疾津貼而家分成普通殘疾同埋特別殘疾，分成兩級。其實佢認為這個分級就唔係好合理，但係，當然這個係我哋立法會通過嘅，咁但係就唔係好合理嘅。因為，佢認為普通殘疾人獲得嘅殘疾津貼少些，而嚴重殘疾人獲得嘅殘疾津貼多些，其實未必啱嘅。因為可能普通殘疾嘅人佢嘅活動能力會強些，佢需要去外面花嘅交通費用等等各方面，其實佢係可能多些。而家將佢分成兩級嘅時候，其實就有些唔合理嘅。咁這方面我諗需要檢討同埋考慮。如果能夠將殘疾津貼每月發放嘅話，即係殘疾金加殘疾津貼每月發放嘅時候，咁這個就能夠接近維生指數水平嘅時候，亦都係令到那些領取殘疾嘅朋友佢哋有比較好用一些嘅錢。

第二個長效機制就係講關於教育。其實教育就好多嘢講嘅，因為事實上，免費教育我哋實行咗 15 年，大家都好，即係被交口稱讚嘅，大家都好稱讚這個係特區政府一大德政來嘅。但事實上當年爭取免費教育嘅時候，亦都冇人批評，在這個殿堂裏面都有人批評：實行到免費教育唔代表解決一切問題。真的，真係唔會解決一切問題。因為，而家我哋問題就係，如果我哋實行咗，而家實行咗 15 年免費教育嘅時候，關鍵地方就需要在實行免費教育嘅基礎上面，奠定一個有可能推進到優質教育嘅基礎。而家問題在哪裏呢？講到留級率嘅問題，這個亦都係大家都好關注留級嘅問題。有甚麼辦法去解決留級問題呢？其實而家都有個關鍵地方就係需要點樣去扶起啲差生，啲差生。我哋要拔尖固然係好，如果特區裏面有好多教育尖子出來當然最好啦。但係拔尖嘅同時，保底亦都係非常之重要嘅。而家我哋好多問題就好多係個底，有些個底唔得，咁就會出現咗大量嘅差生同埋留級率高嘅問題在這裏。政府在動用咗咁多資源去推行免費教育嘅時候，有冇辦法去投放一些資源去推動、去支援啲後進生呢？如果能夠投放一些資源去支援後進生嘅時候，幫助佢哋趕返上來。我哋中國以前有部電影叫《一個也不能少》，令到落後咗嘅、讀唔上嘅能夠扶返起

佢，提供資源去幫佢，這些其實亦都係我覺得應該去思考嘅，就唔係我哋純粹話要淨係減少留級率。留級率減少係憑甚麼減少留級率？係憑幫助到後進生來到令到佢扶返上來，來到減少留級率，這個先係一個最正途嘅做法。希望這方面真係去思考，亦都去支援各個不同學校，如果佢哋有一些計劃去幫助後進生嘅時候，其實政府應該多些提供支援，令到佢哋實行這個計劃。

咁另外一個就係要解決教育問題，對教師嘅支援亦都係非常之重要嘅，對教師嘅支援都係好重要嘅。咁點去對老師支援呢？我一直都講緊，其實教師都需要與時俱進嘅。而家有咗《私框》之外，除咗《私框》，除咗睇到福利有所提高之外，更加重要嘅係推動教育質，即係教師嘅質素提高。點樣去建立一些持續進修嘅師資培訓？甚至脫產培訓，來到去幫助所有嘅老師都能夠每年都接受一些培訓，來到去與時俱進，這些我覺得係好需要去做嘅。事實上，而家我哋在今時今日，我哋評鑒一個教學，好多地方來講，先進地方評鑒教學嘅質素已經唔係睇教師係唔係講到天花龍鳳，唔係睇教師教得好唔好，而係要睇學生學唔學到。我哋都知道啦，而家香港已經做緊這方面嘅工作了。係睇學生，個啲督學入到來，唔係睇老師教成點，而係睇那些學生收唔收到。我哋其實這個都需要有一個開始、有一個調整去改進，因為睇產出先至係最重要嘅。咁好喇，問題就係我哋這方面嘅時候，教師亦都需要更加多嘅培訓來到協助佢哋去解決這些問題嘅時候，我覺得然後先能夠真正係推動到澳門嘅教育質素有所提高。

而家講到長效機制嘅時候，事實上教育嘅長效機制裏面，我哋睇唔到這些嘢，咁希望這方面亦都去思考一下。所謂長效機制嘅時候，前提就係點樣去推動澳門教育質素提高，點樣能夠令到受教育者能夠係成為未來嘅人才，這個先係長效機制建立嘅目標。

第三個講醫療。醫療嘅長效機制，我哋見到政府推出來就係好多嘅硬件，這個硬件其實唔係今次施政方針講的了，係之前已經公佈咗的了。但係，建立好多硬件就並唔代表醫療係提供到優質服務嘅。而且，就算而家硬件嘅建設，老實講都好似好有問題。因為如果按照返政府講離島醫院，其實 2010 年嘅時候，即係 2 年前，已經落實咗這個建築，興建醫院嘅地點。本來到 2014 年就應該係第 1 期落成嘅，但係到現在為止，係到 2014 年先至開工。2010 年確定咗院址，2014 年先至開工？當然中間有好多解釋，甚麼甚麼顧問嘅意見、設計上嘅困難，但係，係唔係真係講得過去呢？點解起間醫院要拖幾年時間，要

4 年時間先至可以去做得到呢？先至可以開始動工呢？我覺得這個係唔係我哋在工作上的確存在一些問題需要認真去分析同研究，點解會拖咁長嘅時間？這個係硬件嘅建設。

除咗這個之外，將來仲有青洲坊 Lot3 地段、路環石排灣、氹仔 TN27 都會有衛生中心。好明顯，當這些醫療系統嘅擴大、衛生中心嘅增加就必然係牽涉到醫療嘅醫護人員的需求。如果以現在已經話醫務人員數量都係好唔夠嘅時候，當擴展咗這些醫療系統嘅時候，我哋點算呢？我記得李局長曾經講過，將來可能，按照而家嘅計算，可能欠缺幾百個醫生，護士可能欠缺更多，如果當這些醫療系統建立之後，這些新嘅硬件建立之後。但係又與此同時，我哋又知道，而家澳門裏面亦都有好多讀咗醫科返來嘅學生係入唔到，連去報考這些培訓課程或者係這些都入唔到去，浪費緊這些資源。我哋係唔係真係可以……我哋個個培訓方式嘅時候係唔係可以去研究一下，點樣能夠令到已有嘅已經讀過醫科嘅准醫生能夠有機會去接受更多嘅培訓，來到去做準備，去迎接未來嘅工作呢？一方面我哋話醫生唔夠，未來嘅醫生會欠缺更多，但係一方面又有好多讀完醫科嘅學生入唔到職，這個好明顯係一個錯配嘅時候，就係政府點樣去思考這個問題，點去解決這個問題呢？我覺得這方面亦都係好重要嘅。因為，事實上培訓方面當然有好多嘅困難，澳門嘅醫療個個，本身醫療系統比較細、病例比較少，但係有問題總會有辦法可以解決嘅，除非你唔諗，係唔係？另外，作為而家嘅醫療系統裏面，我昨日臨走就給咗一個個案給司長，患癌症病人入去輪輪輪輪，排咗入去睇山頂嘅時候，醫生已經話：冇喇，唔使醫喇，三個月命，返去得了。結果個位朋友亦都聽到佢有些朋友之前在山頂同樣係話咗佢唔使醫了，結果佢走去香港就醫好咗，咁於是佢又跑去香港醫，咁真係又醫好咗。咁嘅時候，咁嘅醫療質素、咁嘅醫療態度，係唔係我哋特區政府真係願意提供咁嘅服務呢？我哋明白，而家在澳門政府部門嘅醫生、護士佢哋工作壓力好大，但係醫者父母心，你係去救人的，有能力去救人嘅時候，咁點解唔去，點解會咁容易去判定一個人死刑呢？希望這方面亦都係檢討。我唔係需要你答，需要就這個個案來討論問題，只不過係一個例子說明我哋嘅醫療質素的確係存在一些問題。

另外，昨日亦都講到關於急診濫用嘅問題。我記得李局長每次來都係指出急診被濫用，但係，問題係濫用嘅原因係甚麼？濫用嘅原因就係夜咗嘅醫療服務唔足夠。好簡單，一個普通嘅市民，我今晚夜咗覺得我感冒發燒，少少而已，感冒發燒，去唔去睇醫生？唔去，唔去又得，留返明天去睇醫生係唔係？唔返工來睇醫生。你站在感同身受，如果一個感冒，有少

少發燒，如果佢今晚能夠睇到醫生之後，可能今晚食咗藥，我明天起身我有事，我返得工。於是你話：少少感冒發燒你就去睇急診，你咪濫用囉。但係，問題就係有冇啲醫療服務提供呢？我哋澳門而家有一些 24 小時嘅醫療中心，亦都有一些有夜診，但係唔多。政府在這方面要減少人哋去急診服務嘅時候，係唔係能夠提供多一些，有一些夜診嘅服務或者政府開衛生中心來到做夜診服務？我以前都講過，收費嘅，又或者支援其他嘅機構去做夜診服務，去紓緩這方面嘅問題？這方面如果長期唔解決嘅時候就永遠都係咁嘅情況，一定來濫用急診。局長你年年都可以批評人哋濫用急診，因為事實上這個濫用急診係物質基礎供應唔夠嘅問題。

最後就係關於控煙。控煙數字就好多嘅，但問題係今日時間就唔係好多。但係事實上控煙，而家最多嘅反映就係，如果我哋控煙嘅執行上，辦公時間內打電話先至有人去處理，唔係辦公時間就冇人處理嘅時候，咁這個就好大問題。原來辦公時間內禁煙，辦公時間以外就唔禁煙，咁嘅時候，大家都會懂得這個遊戲規則。我哋在這方面點樣去調動、去處理，真係能夠達到一個控煙嘅好措施呢？

多謝。

主席：陳美儀議員。

陳美儀：多謝主席。

司長、各位官員：

司長你管轄嘅範疇就好多嘅，覆蓋面又好廣泛，亦都係全澳市民關於民生福祉嘅嘢就全部都在你手上面，特別係一些弱勢社群。我哋亦都知道司長同埋你那些同事都係好辛苦，亦都動咗好多腦筋。在過去這一年，司長同埋你哋所有嘅局都做咗好大量嘅工作，成績我哋睇到係有進步嘅，尤其是社保嘅養老金發放達到市民嘅要求，去到 3,000 蚊。雖然，係未同維生指數掛鉤，但係已經體現咗特區政府係順應民意嘅。當然係有最好，只係有更好，好多方面仲可以有進步嘅空間。早前，我在調查快樂指數嗰度得到一個訊息，有同市民息息相關嘅民生方面，有四大要素仲係未滿意同埋對政府有一些期盼。這幾方面就係房屋、醫療、教育同埋就業。以上這些都係需要長期嘅政策同埋要政府投放大量嘅資源先至能夠做得到嘅。在政府有些短暫嘅利民措施方面，市民只係能夠保持短暫嘅快樂。所以，政府係應該要有一些長遠嘅目光同埋觸覺，為市民去做一

些長效穩定嘅措施，使到我哋澳門嘅市民更加幸福快樂。

在司長施政方針總結那裏係有一段說話講到：2013 年，社會文化範疇內各項嘅工作，尤其係要加強對弱勢社群嘅支持，加強對老、幼、婦、殘人士嘅照顧，完善雙層社保嘅體系，提高醫療服務水平。這些同我頭先所講嘅正正係不謀而合。咁我自己作為一個長期在社會服務嘅工作者來講，我有一些問題想同司長探討下。

首先，我哋講嘅就係一些殘疾人士方面嘅問題。在行政長官施政報告之中亦都有提過就話要增進民生福祉，立足長遠發展作為一個主題，亦都表明在經濟發展方面，而家澳門經濟係希望平穩咁發展，亦都確保資源穩健投入，在這個基礎上，加強民生福利嘅工作，體現以人為本這個理念。講到民生福祉，所以特別就令到社會人士更關心就係對弱勢社群，就係殘疾人士同埋智障人士同埋佢哋嘅家長，如何去伸出援手。而事實上，澳門而家經濟發展得咁好，往往佢哋唔能夠得到一個及時嘅分享經濟發展嘅成果呢，咁就要睇下政府嘅政策係點樣。但係，佢哋往往係首當其衝受到經濟上升所帶來嘅一些壓力。而家政府係制定咗殘疾評估同埋殘疾津貼，已經實施咗一段時期了，的確為殘疾人士同埋家庭提供咗一些更好嘅保障制度。政府就有對經濟貧乏嘅個人或者係家團發放經濟援助金。一般身體殘疾嘅人士，如果佢哋收入係低於維生指數嘅時候，佢哋可以以個人來到去申請經濟援助金，但係，由於殘疾人……智障人士佢哋嘅身體狀況係有特殊嘅情況，佢一定係要同家團一齊住嘅，所以就唔可以以個人來到去申請這個援助。但係實際上，智障人士佢基本都係有謀生能力，即係話佢哋根本就係零收入，維持生活嘅日常開支全部都係依靠佢哋嘅家庭成員共同去承擔同埋照顧。其實這些家團已經係背負著沉重嘅生活壓力了，但係可惜政府就有去體恤佢哋這一點，智障人士就一定係要以家團捆綁式來到去申請經濟援助金。在客觀上對佢哋已經係造成咗一些唔公平了，亦都有違政府發放經濟援助金照顧貧困、以人為本嘅原意。我哋希望司長能夠體恤下智障人士同埋佢哋家團嘅一些辛苦狀況，可以就智障人士申請經濟援助金方面作出一些政策嘅調整，准許佢哋用個人名義來到去申請。

另外，社會上都好關心智障人士家長同埋佢哋嘅一些面臨緊嘅雙重老化問題，亦都希望政府盡快落實一些院舍，同埋幾時去投入服務呢，昨日亦都係有些同事問咗，我自己亦都在 10 月份就再發咗一個書面質詢來到去追問政府嘅，昨日啱啱開完會之後返到辦公室，政府亦都係做得好快，昨日我就即刻

收到政府有個回應，亦都講得好詳述，關於院舍嘅一些安排。在這裏我希望，我亦都唔多講了，希望政府能夠盡快去落實，按返這個時間表來到去落實晒所有工作，希望幫助到這些有需要嘅家庭。

所以，我用些時間來到去同政府講下，亦都係殘疾人士嘅。除咗要體現照顧佢哋方面，即係用金錢去照顧佢哋方面，我覺得政府係應該更加鼓勵佢哋投入社會，有這個責任。而發展同埋推動殘疾人士參加運動就係其中一個好好嘅方法。運動可以幫助殘疾人士促進身體健康，亦都係可以增加佢哋嘅自信，更加可以鼓勵佢哋走出家門，融入社群。優異嘅成績可以透過比賽為澳門增光。可惜而家特區政府對待一般嘅運動員同埋一些特殘運動員在規格上係存有差異嘅。特區政府為咗促進體育嘅運動，給運動員嘅支持，就設立咗高度競爭體育獎勵規章。當澳門嘅運動員在唔同層面嘅國際比賽擺到獎項嗰陣時，運動員同埋教練就可以獲得發放一定程度嘅獎金。就以世界錦標賽為例，個人嘅冠軍就可以獲得 18 萬，團體嘅冠軍就有 12 萬，但係，殘疾嘅運動員就唔能夠包括在這個規章入邊，佢哋嘅獎勵制度係另外一條來到去規範，就係在殘疾人士體育獎勵規章嗰度，咁兩者嘅待遇就有好大嘅差別。就以世界錦標賽相同標準嘅殘奧系列世界錦標賽為例，殘疾嘅運動員如果得到冠軍嘅，個人冠軍只係得 2 萬蚊嘅獎金，團體嘅冠軍只係得萬八蚊嘅獎金。咁我哋計下條數，其實殘疾運動員同埋一般運動員獲得獎金嘅差額係相差成九倍嘅。除咗我會感覺到唔公平之外，更加懷疑特區政府對殘疾運動員係唔係存有一些歧視呢？而事實上，殘疾運動員同埋一般運動員佢哋要擺到好成績，都一樣係要長期刻苦訓練嘅，甚至乎佢哋係要付出雙倍嘅努力先至能夠擺到一些獎項嘅。這些獎金除咗鼓勵佢哋之外，更加可以幫助佢哋在日常生活嘅需要。我就希望司長在這一個政策方面亦都去檢視下，希望可以體現返政府對殘疾人士嘅關懷同埋一些鼓勵。

我作為一個立法議員，除咗著眼點係為市民同埋弱勢社群去爭取合理嘅福利同埋權益之外，我更加要堅守立法嘅精神。在這一方面，昨日司長回應到醫務委員會成立嘅問題同埋定義。在這裏我想提出，對於醫務委員會同埋醫療事故法互相有關聯嘅一些問題。

首先，醫務委員會嘅成立已經係傾咗幾年，政府、業界同埋市民都係有共識，認為有成立嘅必要。但係，最重要嘅就係這個醫委會嘅組成、架構同埋職能嘅要點到底係點呢？佢嘅定位係點樣呢？這個係非常之重要。事實上，在專業嘅角度

睇，我希望這個委員會係要有專業性、權威性、認受性同埋負責任性，唔能夠只係一個諮詢機構，因為將來無論係專業資格嘅認證、發牌、發生醫療事故嘅爭拗，甚至係訴訟，這個委員會應該係有權威性嘅作用。而醫療事故法嘅制訂同埋執行亦都需要有以上專業職能嘅裁決。如果只係得醫委會而有醫療事故法，即係話只係有人，係冇法，係好難去執行嘅。如果有醫療事故法而又有醫務委員會，只係有法，又冇人去做法，兩者就好似人嘅一對手同埋車嘅兩個轆咁樣，係缺一不可嘅。因應以上嘅情況，我想問一問司長，到底你認為係點樣呢？同埋，這兩者你認為邊一個應該係成立先呢？成立邊個，同埋邊個先邊個後呢，其實係有一些影響嘅，當中係有決定性嘅影響同埋亦都係有一些關係，我希望司長在這裏可以給我一個解釋下點解。

另外，我就想講下家暴這一個問題。其實去年同埋今年這兩年我都出咗三次書面質詢，包括就係保護兒童同埋家暴法。我自己認為家暴法係應該列為公罪嘅，昨日亦都係有一些同事認同這一個睇法，大家都認為家暴法係應該列為公罪。但係可惜司長答辯嗰陣時就表示，淨係話：將立法嘅重點就放在加強對受害人保護同埋支援嘅機制上，法案嘅名稱亦都係改咗家庭暴力防治法。社會上我知道有些人有意見，係擔心將家庭暴力嘅犯罪定為公罪係有礙於家庭關係嘅修補，但係，這個觀點其實係要受害人容忍家暴這一個行為嘅，係要將受害人作為人嘅基本人權置之不顧。我認為係應該將會在客觀上產生縱容家暴嘅效果。這個係我對這件事嘅睇法。咁又講些例子給你聽下，司長。如果一個家暴嘅受害者需要自己去報案同埋要說給警方聽係追究先至受理，往往在家庭嘅原因，佢因為係要依靠對方，有時亦都係驚投無門、家醜不出外揚，往往係這些情況，佢會啞忍嘅。其實而家有些案例，受害者甚至乎係受虐待超過五年至到十年。甚至有一些係細路仔。其實細路仔如果佢係受到侵害嘅，佢根本就有辦法去報案，就算佢去報案，警方都會將佢交返去給佢嘅監護人，而佢嘅監護人往往都係施暴者，美其名就話帶佢返去管教，但其實就係送羊入虎口。在這一個方面，我亦都睇到一些個案甚至乎係性侵犯者嘅。其實國際間已經對保護兒童定為係有重要嘅工作要去做嘅，包括就係兒童權利公約，中國亦都係公約國。所以，如果你唔定佢係公罪，隔離鄰居見到佢有這個問題，佢就算去投訴都係有辦法去處理的。所以，我亦認為家暴法係應該要定為公罪嘅，主要嘅目的就想施暴者有一些警惕，因為佢係怕受揭發而受刑，咁樣這一個法然後先至能夠佢得到一個警世嘅作用。我仲舉多個例子。如果販毒嘅人唔係公罪，咁毒犯同埋販賣毒品嘅人，佢自己都唔會去舉報嘅，點樣可以將毒犯繩之於

法呢？

我在餘下嘅時間想講下社保金。其實，社保金咁多年，我哋一路都係爭取發放到 3 千蚊，並且係同維生指數掛鈎。好高興，行政長官在施政報告之中已經提到，就話將佢提升去到 3 千蚊。官員亦都解釋就係話將敬老金 6 千 6 百蚊平均分咗之後，每月就有 3 千 5 百 50 蚊。頭先有同事亦都提到將敬老金作為一個長效嘅機制，這個建議我係支持嘅，亦都希望政府可以將兩個敬老金同埋養老金係可以放埋一齊，長期去發放嘅。其實，政府亦都係講咗，社保金唔會短期之內破產嘅，長者有這個生活費，亦都係再講一次，政府係一個德政來嘅，在這一方面。不過，居安思危，在而家澳門嗰個形勢咁好嘅情況之下，政府係應該要更加為市民去設想。在社保嘅供款方面，點樣才能夠設計一個更加長效嘅機制？在這裏應該要釐清，到底僱主同埋僱員嘅供款數字係幾多呢？最重要就係要保障我哋嘅居民以後日後退休咗之後，能夠得到一些生活嘅基本保障。葉主席昨日講咗基金會操作，作咗一些解釋。咁我哋希望葉主席為我哋長者守護好這一筆養老金，佢嘅責任係好重大嘅。我哋希望除咗係保本增值之外，亦都希望佢追得上通脹，咁先至實際係市民之福。

其實今日時間好短，我仲有好多醫療、教育，包括毒品嘅問題、離校生嘅問題都要向政府提出嘅，我遲些交一份書面嘅意見給返司長，因為而家唔夠時間。

多謝。

主席：高開賢議員。

高開賢：多謝主席。

司長、各位官員、各位同事：

司長嘅範疇講真係責任幾大，可以話人嘅成世都給咗你了，由生老病死、由 BB 出世一路到死，生在你嘅手上，死也在你手上。

除咗人嘅一生之外，仲包括埋旅遊、教育等等，我哋睇到有八大局在這裏；仲有三間學校，責任真係相當之重，工作量相當之大。不過今日我主要想講都係兩個方面，一個就係關於旅遊方面嘅。而這方面，我過去亦都經常講，點樣能夠增加些旅遊元素，延長遊客留澳嘅時間。但係一路講，似乎講咗唔少

時間，但係似乎進展又唔係好大。

在國家“十二·五”規劃裏面亦都好明確咁支持澳門要建設成為世界旅遊休閒中心。而事實上，澳門本身來講亦都係有唔少得天獨厚嘅條件。譬如好似 400 幾年嘅中西文化交融，世界文化遺產，非物質文化遺產等等。但係由於政府一直以來都係比較欠缺一個詳細、周詳嘅計劃，而且各部門在增加或者在完善旅遊嘅元素方面，我哋睇到似乎又各自為政，欠缺咗統籌。係唔能夠讓到本澳這些深厚嘅文化底蘊能夠完全發揮出來，令到好多旅客對澳門嘅印象，我哋經常有出差到外面，一講澳門嘅時候，人哋嘅感覺就係賭城，淨係得個“賭”字。來澳門冇甚麼地方行，地方細，感覺就係咁樣。點樣能夠將佢改觀得到呢，唔好給人仲係一直看成澳門係一個賭城。

在過去來講，都講咗好多年了，舊區有唔少獨特嘅文化氣息喺度，點樣能夠好好咁來到去利用。將舊區重新包裝，打造成為一個有聲有色嘅旅遊景點。一方面係可以推廣澳門嘅文化歷史，而另一方面亦都係能夠引客人去舊區，盤活區內嘅營商環境。在這方面，政府亦都整天說要支持中小企業，其實除咗在資金上面嘅支援之外，舊區嘅小商號我認仲係好希望政府能夠坐言起行，積極咁行動起來，擺出決心真正能夠落實，盡快來到去選點，研究將有關嘅舊區粉飾美化。講真，講粉飾同埋美化，我哋都講咗好多年了，其實。由噴水池，即係而家嘅議事亭前地，一路上到去大三巴牌坊，或者係福隆新街等等，都係前朝政府整咗落來。而前朝政府點解又能夠將這些地方能夠完全……反正係整條福隆新街整過晒，屋油過晒，門面裝修過晒，整個議事亭前地充滿歐陸風味。點解當其時能夠做得，而現在唔能夠做呢？點解而家又做唔到呢？我真係好懷疑這一樣嘢，究竟存在甚麼問題在這裏？而家講真，有些朋友來到澳門，我哋只敢帶佢去一些旅遊景點，而且有時仲要兜路，唔敢行入些舊區，唔敢經過司打口一路落到去十六號碼頭，因為太殘、太舊，我驚失禮人，我唔敢帶人落去睇。所以，這些舊區方面來講，我哋點樣粉飾靚佢，給人哋有一個好嘅觀感呢？我覺得在這方面，確實政府應該係花多些腦筋去考慮一下，點樣能夠將澳門真係能夠美化，等遊客來到去睇到，嘩，澳門真係靚，真係與別不同。

再講，點樣能夠發揮澳門文化特色旅遊元素，在這方面，我哋經常有到內地，好多時，在晚上，我哋都會睇到一些比較大型嘅夜間表演節目。這些表演當然有歌、有舞，有些在水上、有些在陸地、有些係實景嘅，甚至乎係……而且，這些節目多數都係採取一些故事嘅形式，展示當地嘅一些文化歷

史。澳門有冇條件可以搞一些類似嘅表演呢？譬如好似在一些固定嘅時間或者晚上，我哋能唔能夠將澳門 400 年嘅歷史文化，將佢編輯成一些故事、編輯成一些節目，在夜間可以能夠給遊客來到去睇？我哋可以在海上面安排一些節目都得嘅，其實，以前亦都有人在湖上面去搞，搞完之後停咗落來。但係，我哋睇，好多時在內地來講，佢都係政府行為來嘅，唔係完全係商業行為。你話完全靠投資者去做嘅話，佢一計成本未必能夠有錢賺，佢未必願意去做。但係，我哋要增加這些元素吸引遊客，尤其在晚上嘅時間能夠吸引咗佢之後，佢一定會留在澳門，唔會走。從而係可以延長遊客嘅逗留時間。睇戲前、睇表演前或者睇表演後，遊客都會走去周邊嘅地方去旅遊、去行下，亦都可以帶旺周邊嘅一些地區，亦都係盤活有關地區嘅營商環境。這些來講，政府點樣推動去做，甚至乎作為政府行為，又可以點樣去做，我認政府係唔係可以考慮一下？

我哋亦都睇到，即係而家比較新嘅一個統計喺度，直到今年 12 月，唔喺度過夜嘅旅遊佔入境嘅旅客 52%。旅客，當然唔願意留在澳門嘅其中一個因素，我認酒店貴亦都係其中一個因素。點樣能夠鼓勵投資經濟型嘅酒店？我哋聽到政府係允許，亦都支持，但係有冇相關嘅政策能夠係去給到這些投資者？我哋未睇到這一樣嘢。我哋需要係有一些政策上嘅傾斜，使到更多人能夠去投資這些經濟型嘅酒店，相信能夠給到遊客可以唔使捱貴酒店，可以夜間能夠有多些節目去睇，我認這個對延長遊客在澳門嘅逗留時間相信係會有所幫助嘅。

另外一個，亦都好支持政府提出將澳門打成為“盛事之都”，主辦同埋協辦多項嘅盛事同埋節慶嘅活動，譬如好似國際煙花比賽匯演、格蘭披治大賽車、音樂節、藝穗節、新年大巡遊等等，這些在施政方針裏面亦都係提咗出來。但係這些盛事，當然我哋知道，一直以來都係有助於澳門提升國際嘅知名度，亦都係能夠讓旅客同埋市民體現不一樣的澳門。但係，點樣能夠將這些節日嘅氣氛能夠融入居民嘅日常生活裏面，我覺得這方面亦都係需要考慮。確實，而家好多這些煙花節、音樂節，甚麼都好，搞就在場裏面搞，我哋睇嘅煙花都係，煙花個個星期搞，但係睇嘅人有幾多？在澳門能唔能夠帶起整個節日氣氛？我哋唔感覺得到。譬如好似大賽車咁樣，大賽車，而家講普通話差唔多音就係大塞車，大家在現階段嘅時間唔係講邊個車手好，邊個車手唔好，而係邊條街塞車，邊條街唔塞車，行邊度好些。在這方面來講，我哋點樣能夠係將而家各項嘅節目、節日嘅一些氣氛能夠帶到入去整個澳門，能夠有整體嘅一個氛圍呢？我哋在這方面要營造到這個氣氛出來，使到遊客來到睇嘅時間係感受到一些節日嘅氣氛。除咗好

似頭先講嘅煙花，夜晚 Bomb 一聲，打完之後，在日間來講，我哋體現唔到有甚麼氣氛給到人哋。這些點樣去營造氣氛，我覺得政府係唔係可以多考慮在氣氛上面能夠營造多一些。

最後都想講一講有關教育方面，剛才大家都提到關於留級率嘅問題。其實，而家我覺得最緊要，關鍵仲係我哋教育改革始終未能夠改革得到一個填鴨式嘅教育方式。好明顯，如果在咁嘅情況底下，我哋如果係改變唔到嘅話，只係論成績來去到評價人才指標同埋觀念，我認係冇辦法鼓勵到學生產生一種學習嘅興趣出來。我認現在我哋嘅教育方式來講，係應該點樣能夠令到學生嘅學習時間產生興趣去學習，而唔係好似被迫學習。所以在咁嘅情況，我哋好希望政府同教育界方面要多些去研究考慮，點樣能夠係可以令到學生佢本身嘅學習興趣能夠產生出來。如果我哋在這方面唔能夠做得到好嘅話，在現階段嘅模式，這個留級率係一路一路咁樣高嘅話，只會係打擊學生學習嘅興趣同埋主動性，而我哋嘅教育改革亦都唔容易能夠可以有寸進。所以，在這方面都係希望政府能夠再進一步多些考慮，如何去提升學生嘅學習嘅興趣。

多謝。

主席：好，剛才六位議員先後發言，下來嘅時間交給張司長同埋各位官員作回應。

請張司長。

社會文化司司長張裕：多謝主席。

再次多謝今天同埋昨天發言嘅議員所提出好寶貴嘅意見同埋提出一些問題同埋睇法。

主席，我會就昨天有個別問題未答完嘅再補充一下，然後對今天各位議員提出來嘅各點再同各位解釋一下同埋交流一下。

昨天，唐曉晴議員提及到政府對新移民嘅支援，非常之同意。澳門係歷史上第一個移民嘅城市，不同年代，各個地方來到澳門，移民到澳門居住、工作，融入咗澳門嘅社會之後，都成為咗澳門人了。佢哋都為咗澳門嘅發展作出咗好多嘅貢獻。澳門人難得好可愛嘅地方就係共融，對佢哋都係接納，共同一路生活、一路合作，為澳門社會作貢獻。

我在這裏想從兩點來到講，事實上面係有需要給予關心、給予支持，幫助佢哋融入到澳門社會當中。在這個方面，教育暨青年局係長年都實施一個輔助新來澳學生嘅學習計劃，主要係委託社會服務機構為有需要嘅學生開辦英文、廣州話同埋繁、簡字之間（佢哋都適應嘅，原來）的課程的，這個係持續性嘅展開。而在今年 11 月底亦都開始招募學生，仲加埋佢哋嘅家長，係會開辦英文班同埋廣州話繁、簡字適應班，亦都為外籍嘅學生新增辦咗廣州話同埋中文嘅識字班。

另外一個範疇係社會工作局，對於新來澳人士嘅適應同社會共融，開展咗一系列嘅工作。一個方面，為來澳少於 7 年嘅經濟有困難家庭提供經濟援助，同時係資助民間機構向新來澳人士提供社會融合嘅服務，包括參加關注小組、語言班、督課班，各種興趣及社會參與活動等等。每一個年度嘅數字有時都係上萬計嘅。以經濟援助來講，受惠嘅家庭係有 8 百多個，2 千多人；參加社區融入服務有 1 萬 5 千人次，係去年嘅數字；參加社區融入服務，今年 1 至 9 月係 1 萬人次左右。而社工局亦都非常關注，為佢哋提供各類輔導服務，包括個人情緒、行為或者經濟問題等等。以前，本人在廉政公署工作嘅時候亦都會參加不同嘅部門，組織協助新移民融入社會嘅活動，尤其是向佢哋宣傳澳門廉潔守法，唔係次次靠送禮用來辦事情、用來求方便嘅。都曾經參與過相關嘅工作。好難得，澳門係一個和諧、共融、包容嘅社會。

有幾位議員昨天問及到大賽車嘅問題，崔世平議員。借這個機會再次感謝全澳市民對於大賽車活動嘅理解同埋包容。因為事實上面，一年一度嘅話，對大家嘅生活，尤其交通方面係造成咗一定程度嘅不便。感謝絕大多數市民都係包容同埋理解，尤其是接觸好多朋友，幾位議員都講及到，係澳門 50 多年嘅一個品牌，在國際上面都聲譽非常之良好。難得我哋有一個咁樣嘅品牌。在我哋個人嘅感情，事實上，我哋睇著佢嘅發展，佢亦都伴隨著我哋嘅成長，成為我哋嘅集體回憶。今年嘅活動最後都順利進行，但係先前亦都係曾經發生過一些令人難過嘅事。組織單位馬上加強咗相關嘅巡查工作、安全工作嘅部署，到最後，兩天正式嘅賽事基本順利完成。今年來講，市民反映交通仍然仲有一些問題，但係提及比去年係好咗一些。我亦都親自去到一些交通繁忙嘅地方，荷蘭園、高士德，都睇到相關嘅情形，都係一個經驗。星期四嘅時候，大家唔記得咗嘅時候，揸咗車出來，可能會在某些區域，特別迫嘅，美副將或者黑沙環、望廈體育館附近。明年，我哋會爭取在方方面面，我哋嘅同事安排得更好，尤其是明年係 60 歲 60 周年嘅紀念。組織單位係會考慮參考第 50 周年時候嘅經驗，第一個星期

會係星期六、星期日兩天進行，相信對市民交通嘅影響係會有，但係，係會比較輕微一些，因為都唔使返學、唔使返工。另外一個星期係會由常規性，好似一般嘅年度，今年咁樣，係星期四、星期五、星期六、星期日，4 天舉行。明年係甲子之年，我哋就係話鑽禧紀念。為咗特別慶祝這項盛事，將最好嘅節目帶給澳門嘅市民。大賽車委員會係希望盡最大嘅努力，將佢辦成大型全澳市民嘅嘉年華式活動。初步嘅構思，昨天有議員問到有冇甚麼構思可以透露下？係會跟周邊鄰近地區最時尚、最精彩嘅賽事，招攬這些賽事來澳門，因為佢有佢嘅吸引力，讓區域裏面最好嘅賽事在澳門舉行。另外，亦都為咗讓回歸祖國嘅澳門大肆慶祝這一項嘅盛事，計劃會籌組一個叫做“大中華杯”，讓兩岸四地：內地、台灣、香港、澳門嘅車手一同競技，讓大中華區嘅居民一同慶賀這一件盛事。過往，澳門大賽車係孕育出好多一級方程式明星級、冠軍級嘅車手。委員會係會計劃籌辦一場大師級嘅比賽，讓這些明星級嘅車手共同來澳門一齊共賀 60 屆大賽車。佢哋曾經在這裏參與過，奪得過獎項嘅一條咁精彩刺激嘅跑道。為咗增添嘉年華嘅氣氛，委員會亦都會計劃舉行名人巡遊，讓澳門嘅市民能夠一睹賽車上面嘅熱鬧氣氛。特別係考慮能唔能夠讓傳媒朋友同埋澳門市民都可以一齊參與呢？昨天有議員都建議，我哋係會計劃讓知名嘅車手以安全嘅速度搭著我哋記者朋友同埋市民在賽道上面巡遊，讓佢哋一起來到感受東望洋賽道嘅精彩。這個係初步嘅一些構思，向各位議員介紹一下。

昨天，崔世平議員問及到老齡化嘅問題，政府會唔會有甚麼策略上面嘅考慮。事實上，這個係值得高度關注嘅一件事情。根據統計局 2011 年人口普查嘅結果，2011 年嘅總人口係超過 52 萬，65 歲以上嘅係接近 4 萬人，佔總人口嘅 7.2%。而隨著社會進步，澳門嘅醫療在技術各方面嘅服務設施等等係有所提升，尤其是幾乎全民免費醫療這個大前提下。根據統計局嘅另外一份研究報告指出，2036 年澳門老年人口嘅比例將會增加至 20.7%。人口老化嘅趨勢日漸顯現，值得從工作上面、策略上面有所考慮同埋部署。老齡化係會對社會產生各方面影響，醫療、生活、居住、安老、康體、文康生活等等，亦都對經濟上會產生不同嘅影響，影響到經濟嘅增長，儲蓄，人力資源，養老金嘅投放，稅收方面嘅影響等等。所以，政府考慮在未來構建一個老有所養、老有所屬、老有所為嘅共融社會。考慮到人口老化會帶來挑戰，為咗應對社會老齡化嘅發展趨勢，行政長官在今年嘅施政報告裏面提出，將會就長者嘅醫療保障、退休保障等方面進行綜合嘅研究，逐步建立系統性嘅養老保障機制，這個機制涉及長者生活上各個方面嘅支援同埋照顧。因此，特區政府已經組成咗一個跨部門嘅養老保障機制研

究小組，共同跟進相關嘅工作。由社會工作局牽頭、協調同埋跟進，希望在政府各個部門、民間組織同埋機構嘅協作同埋推動下，尤其是對目前嘅養老保障制度同埋措施進行檢視，並且提出改善嘅方案。經過綜合研究同埋分析之後，會向特區政府提出一個建立系統性養老保障機制嘅具體措施。透過跨部門工作小組利用三年嘅時間進行一系列嘅綜合研究工作，目的係為特區政府制訂一個完善嘅安老政策，以及第一個十年嘅行動計劃，目標旨在構建一個老有所養、老有所屬、老有所為嘅共融社會。因此，構建養老保障機制嘅研究範圍係包括能夠支持長者達到老有所養、老有所屬、老有所為嘅各個主要施政領域。而研究嘅成果希望能夠提出關於本澳養老保障體系嘅檢討、分析、政策框架同埋行動計劃等系列嘅報告，作為特區政府在這些方面嘅施政藍圖，亦都擬定咗初步研究嘅一些方面。

按照上述芻議嘅一些研究方向，未來澳門養老保障嘅制度組成體系將會包括在法制層面，《基本法》，未來嘅長者權益保障綱要法同埋相關嘅法律法規，在政策層面嘅養老保障政策框架以及按照有關嘅政策框架，在執行層面而制訂嘅十年行動計劃，將會有一個十年嘅計劃。

事實上，我哋今天嘅澳門，雖然這一個研究係正在安排進行，但係各個政府部門在特區政府發展經濟、改善民生嘅施政取向方面，各個部門都在不同嘅層面對長者嘅服務有所安排，並且係努力地不斷去完善同埋提高。包括在醫療衛生方面，從預防、診治同埋康復這些方面著手，亦都進一步加強患者在社區嘅照護服務。具體嘅一些措施係會一步一步建立老人記憶門診、設立老人住院專區、推行病人出院計劃、實行優先就診等醫院服務。而亦都有其他相關嘅一些計劃，例如加強興建各項嘅醫療設施等等，力求把服務做得更好一些。社會工作局亦都在長者服務方面有各種不同層面嘅安排，一個方面係社區宣傳教育，這個係透過和不同嘅團體合作，其中包括開展各個類型嘅社交、康樂、教育及其他社會嘅服務，並且係開展退休準備與生活規劃社區教育活動嘅資助計劃。當然，其中亦都係有不少嘅課程，其中一些係長者書院或者係專門為長者而設嘅持續進修課程。亦都有社區支援嘅服務，譬如護老者支援、長者精神健康、關懷社區獨居長者同埋“平安通”呼援服務等等，亦都有院舍方面嘅規劃同埋建設一系列嘅工作。

另外一方面係社會保障工作方面。透過社會福利措施同埋社會保障制度，從多方面給予本澳長者各種類型嘅津貼同埋支持，使到長者老年生活基本得到保障。尤其是今年嘅施政報告裏面有一個小冊子係詳列咗 2013 年長者具體會受惠嘅內容一個

明細表，提及到一個小提示就係在一年，明年裏面可以領取 59,600 元嘅各種款項分享或者係尊敬嘅，還未包括養老金醫療券嘅 600 元、長者車資優惠計劃（每程澳門元 3 毫紙）、長者社屋、免費醫療、電費補貼、頤老咭嘅福利同埋優惠等等。議員問及到特區政府對於目前有一個趨勢，將會越來越走向老齡化，有些甚麼嘅對策同埋部署，向各位議員歸納介紹一下。

主席：

剛才冇幾位議員都係提及到養老金同埋敬老金合併，希望提供多些資料。今天時間關係，或者稍後我哋有更詳細嘅一些資料提供，或者稍後有些時間我哋講講啦。好高興聽到議員們都肯定這個係特區政府嘅一個德政，我相信大家都會感覺到係欣慰嘅，為我哋嘅老人家。行政長官講：佢哋過去長時間為澳門嘅發展付出咗辛勞同埋貢獻，表示返對佢哋嘅尊重同埋關心。我覺得大家都好中肯，真正反映咗我哋澳門老人家嘅心意同埋心聲。這些工作能夠得嘅我哋都盡量去多做，做得更好一些。

徐偉坤議員提及到要加強公民教育，推動建立正確嘅人生觀、價值觀，尤其是要有一種心態，又要向上流動、又要排外嘅話，係好有值得斟酌嘅地方。社會上面都有意見覺得，關鍵嘅要點係唔係要點樣推動提升我哋嘅競爭力。面對競爭，機會留給有準備嘅人，有才幹、有能力嘅人嘅話，咁樣泰山崩於眼前而不懼，仍然可以屹立不倒，不然的話，溫室裏面嘅嬌花，下下保護，所以有些意見都講，係唔係我哋嘅家庭、我哋嘅政府對年青人保護得太多呢？我諗都係一個好好嘅題目，值得我哋去深思。我佩服徐偉坤議員大聲疾呼，關心我哋嘅年青人，但係，要在社會形成一個競爭嘅意識，事實上還有好多工作要做。我好期望我哋嘅議員、我哋嘅社會、各位有識之士、我哋嘅家長都在關愛我哋嘅子女之餘，共同努力去鼓勵創造機會，讓我哋嘅年青人不害怕競爭，投入競爭，不斷去提升自我。咁未來我哋澳門嘅前途，相信係更有希望。

關翠杏議員提及到社會保障基金運作嘅資料，稍後係會送交到嘅。而建議非中央公積金嘅加強推動，如果有些大型嘅企業或者係津助合作社服務機構嘅推動加入嘅話，這個意見都係好好，我哋會加以考慮同埋安排。

亦都提及到一個職業教育嘅問題，我都特別去思考過，和不同嘅人士都探討過，係要好重視地去做嘅。不過，大家都提及到其中嘅一點，有兩點比較關鍵，第一就係家長望子成龍嘅

時候，能夠有大學讀，佢可能未必就鼓勵個仔讀完中學就算，讀完職業教學就算了。因為都瞭解到 2 間職業學校或者係其他大約 10 間有職業教育課程嘅學校，學生絕大多數畢業嘅意願，中學畢業之後，都係希望投考大學嘅。咁如果係一個咁樣嘅情況底下改變家長、改變學生自己嘅意願，其實我哋要思考一下點樣係一個合適嘅處理同埋做法。

另外一個，關議員提及到去到德國嘅一個考察。或者澳門嘅年青人都好叻，前年嘅時候去英國參加一個國際性嘅職業技能大賽，攞到非常好嘅成績。澳門嘅年青人都唔錯嘅，原來。係唔係旅遊學院嘅一個學生還是……職中嘅一個學生。旅遊學院嘅學生都攞過獎，我哋嘅年青人都唔錯嘅，都攞到獎。但係，佢哋嗰度一個方面，有一個認證制度，第二個方面，社會係非常尊重佢哋修讀完相關嘅課程之後，經過認證，人工差唔多等於老師嘅人工，如果我冇記錯。佢哋好尊重這些我哋這裏叫做師傅或者係一些專業性技能嘅職業工作。除咗尊重，尤其是從薪酬裏面體現。在我哋澳門，如果係讀職業學校畢業之後，社會上面嘅價值觀點樣係會給到……如果係一個理髮師傅、一個廚師或者係一個做餅嘅師傅、修車嘅師傅，或者係不同方面嘅專業技能，但係又唔係大學畢業嘅這些專業人才，在薪酬嗰方面係給予返佢一個尊重同埋造成一個吸引呢？我只係提出這兩個，但係我哋都會繼續去進行探討。初步我和同事商量過，一個方面，過 2 個星期我哋會和 2 個教師團體有一些會議，年度嘅工作會議，會聽聽佢哋嘅意見。即使未有一個定案嘅時候，推動更多嘅學校去增設一些職業教育嘅課程，或者係從政策上面去推動，增設更多嘅科目。原來多些科目都好嘅，家長或者朋友嘅意見。當然，第三方面亦都係和不同政府部門，教青局嘅同事和其他嘅政府部門在職業培訓嘅工作上面能唔能夠再做一些嘢呢？實事求是，如果有這個需求嘅話，開設一些全日制嘅或者係晚間嘅課程。但係，跟著要推動嘅就係認證嘅問題。認咗證能唔能夠給返佢相應嘅人工呢？這個都係唔少嘅工作要做，係要聽取社會各方面嘅意見，社會要給予多些重視、支持嘅話，相信可以行得多一些。但係能夠做嘅，加多些科目或者如果有需要嘅政策支持，開多一個教學嘅機構、開多間學校都可以嘅，問題開得來能唔能夠達到我哋嘅效果？係唔係開完之後又係升大呢？開完之後升大都唔緊要，如果大家覺得佢真係有專業技能嘅，識整下電器或者係識做下木，或者係其他廚藝、家政，這些都有好處嘅話，但係要仔細去思量，廣泛聽取大家嘅意見。

崔世昌議員建議社會保障基金能夠改組，加強佢嘅組成實力，以分擔相關嘅責任，我諗這個係好好嘅意見，我哋會進行

參考。

區議員提及到殘疾分級有意見話唔合理，我諗這個提出來係好嘅，我哋會加埋這些意見，因為稍後進行檢討嘅時候可以一併考慮。

但係有議員提及到一個情形，一個方面我哋係重視，希望係能夠有所改善。但係，我亦都唔係太認同單憑一句說話、一個定案，講及到澳門政府醫院或者係其他醫院醫療質素唔係太好嘅問題。因為，如果公開講嘅時候，一個案例就可能打擊晒所有嘅團隊，而呢個團隊都係好專科，讀書要讀 5 年、6 年，實習又要幾年，同埋好多都係敬業樂業嘅。所以，我嘅睇法，如果真係有這些事，可以循返正式投訴嘅途徑去反映，我哋一定係會努力去跟進。當然，我相信議員嘅意思唔係話指所有或者好多醫生都係咁樣。我想舉返另外一個例子，用來為我哋嘅醫療工作者打氣嘅。

最近我聽到 2 個消息，近嘅一個消息係格蘭披治大賽車有另外一個意外。有一位意大利籍嘅車手原來骨折嘅，有 5、6 處地方都骨折。係我哋嘅救援制度，好快送到去醫院：哎呀，好痛呀，哎呀，擔心會唔會醫唔返呀。經過我哋同事嘅努力，一個星期之後係康復得比較快速。香港佢嘅領事館領事都過來探佢，然後睇到具備條件，佢自己都願意用船送去香港，飛返去家鄉再治療。臨走嘅時候，佢嘅態度係點樣呢？感謝澳門嘅醫生為佢處理得咁好，當傷好咗之後，第日有機會佢一定會來澳門，再來比賽。因為澳門人係咁好嘅，因為澳門醫院醫生嘅水平係咁高嘅。

第二個例子係一個月之前，有一個非洲國家嘅部長約見我。我同佢都唔識嘅，點解要約見我呢？佢來參加中國與葡語系國家經貿論壇，來到澳門。唔記得當年係唔係溫總理都有來個屆，應該係。突然間有急病要去到山頂醫院。急病係甚麼病呢？腦溢血，腦出血，係比較嚴重嘅。結果在山頂醫院醫療咗 6 個月。6 個月，所有我見佢面嘅時候，唔知博士甚麼呀，又唔知甚麼李醫生，又唔知甚麼醫生，佢講晒甚麼護士。因為點解呢？耐呀嘛，6 個月，朝見口晚見面。然後醫好咗就返翻去佢嘅國家。跟著要再返來復診，佢同姍桃絲秘書長講：這些醫生嘅上司係邊個，政府方面嘅負責人，我要親自見見佢，感謝佢。我就接待佢。姍桃絲女士又一齊。佢又千多謝萬多謝，佢話：這些病唔係咁易醫得好，澳門嘅醫生居然可以把我醫好。同埋佢嘅國家裏面，整個政府、整個國家都知道晒。因為部長，來到外國開會腦出血，住醫院住咗半年。整個國家都

知道澳門人好、澳門嘅醫術高。專登係要約見進行多謝嘅。同埋邀請我同埋李局長同埋嘅醫生，10 幾個名，佢話，來我哋國家開個醫療嘅交流會，講下你哋嘅經驗。你哋來到一定大受歡迎，英雄一樣了，因為你哋醫咗一個真係不可思議嘅病，都給你哋醫好。

我想同大家分享，都係澳門人嘅一種光榮。我哋嘅人情味、我哋嘅醫生、我哋嘅醫院。我相信醫療嘅不可預見性嘅太多了，100 個人能夠醫到 95 個、98 個，有 2、3 個醫得冇咁好嘅話，有時難以避免。好難計個數，水準係差係好嘅。講嘅案例，唔係咁好嘅案例多咗，就好似差，講多些好嘅案例，係唔係我哋又會覺得好嘅呢？應該又會係覺得好些。我唔係話要維護邊個啲、邊個唔啲，我會覺得係比較難去落一個定論、去評價嘅。但係，市民嘅投訴意見、各方面給我哋嘅意見一定係會重視，加以分析，去檢討同埋改善嘅。

關翠杏議員提及到免費教育網，點樣保證優先發展入網學校系統嘅問題。我想講少少，這個就係按照《非高等教育制度綱要法》嘅規定，免費教育學校系統係由實施正規教育嘅公立學校同埋提供免費教育嘅私立學校組成，即係公立學校同埋入網那些。在澳門來講，加入免費教育學校系統嘅私立學校有 53 間，加埋 11 所公立學校，佔總數嘅 85.3%；非免費教育學校系統嘅私立學校係有 11 所。特區政府在優先發展免費教育學校系統嘅政策主要體現在兩個方面：

第一個就係優先保證教育經費嘅投入，係優先會保證嘅。第二個係優先保障其他嘅辦學條件，尤其是在批地建校、校舍嘅擴建同埋改建嘅資助上面都對納入免費教育學校系統嘅私立學校給予咗最大嘅支持。

在未來嘅政策方面，將會繼續優先保證免費教育學校系統嘅發展，讓免費教育津貼與學費津貼在現有嘅基礎上同時得到增長，但係兩者之間會保持應該有嘅差幅，即係話資助免費教育嘅學生同埋資助冇入網學生嘅年度學費津貼，都係支持家長、支持學生，不過佢有一個差額嘅。如果從一個具體嘅金額上，免費教育系統私立學校入咗網嘅學生，每一個人在佢學習嘅階段裏面平均受惠 31 萬元，而冇入網嘅平均受惠 20 萬元。當然可能個別 1 間、2 間，佢嘅學生 30 幾人、40 幾人或者 50 幾人，好個別嘅例子，我哋都會睇返情況，點樣把相關嘅關係處理得更加妥當一些。尤其是頭先所講嘅，就係兩者會繼續保持應有嘅差幅，唔會再拉近了。而另外亦都會逐步規範非入網私校嘅每班學生人數。這裏係一個簡單嘅介紹，如果有時

間，教育局局長可以再詳細介紹一下。

主席：

下面我會就崔世昌議員嘅另外一個建議和各位交流一下，然後會交給幾位局長再同議員介紹一些情況。

崔世昌議員提及到針對本澳青少年體質偏弱嘅情況，會有甚麼措施作出配合？我想講偏弱，我相信就唔係話弱得好犀利嘅，希望佢係弱得一個可能接受嘅範圍啦，唔係話弱得咁犀利，但係大家關愛我哋嘅青少年。身心健康、體魄強健、意志毅力、充滿活力，對於青少年嘅成長同埋學習，以至走出社會工作都係十分之重要嘅。教育局會持續研究、制訂同埋推行普及性體育同埋健康嘅政策，並且從下面四個大嘅層面進一步提升學生鍛煉身體嘅質量。

在政策嘅層面上，已經進入立法程序嘅正規教育課程框架以及草擬中嘅澳門青年政策都加入咗提升學生同埋青少年體質嘅政策同埋措施，裏面正規教育課程框架規範咗各個教育階段，需要設置體育與健康、學習領域同埋一定嘅教學時數。同時係規定學校需要保證學生每周進行不少於 150 分鐘嘅體育嘅時間。仲有其他一些要求。在學校嘅層面，教育局在 2012-2013 學年嘅學校運作指南裏面新增加咗校園體育運動指南，推動學校為學生安排體育課以外嘅體育鍛煉活動。例如可以利用課前同埋課間嘅時段，安排學生每周進行三至五次，每次十至十五分鐘嘅伸展運動或者係其他嘅運動。

另外，亦都積極開拓活動嘅空間，在 2012-2013 學年首次係透過教育發展基金、學校發展計劃項目，支持學校在現有嘅室內空間裏面設立多元嘅健體中心，提升學生參與運動嘅興趣，增加運動量。我都去參觀過，都有玩過嘅，都幾吸引同埋幾有效，細細嘅地方就容易做到運動。

而針對學生體質下降，肥胖、近視同埋牙齒健康嘅問題，教育局分別會同大專院校合作推出提升學生健康體適能以及愛眼護牙計劃。今年 10 月開始研究緊對初中學生進行洗牙工作安排嘅探討當中。並且係從體育鍛煉同埋健康生活習慣為切入點，制作學生手冊同埋家長指引等等。同時開展教師培訓，培養學生持衡嘅運動、良好飲食、睡眠等嘅健康生活習慣同埋意識。

另外，今年首次推動陽光新一代推動計劃，整合澳門公共

部門活動場地嘅資源，游泳池、圖書館、球場、郊野公園、步行徑、燒烤場等等，透過網頁或者係手機應用程式鼓勵青少年進行各類戶外及體育活動。同時，亦都係透過增加青年活動嘅空間、優化各類活動嘅設施，安排更靈活嘅開放時間以及推動多元體育活動等嘅措施，更加全面咁樣關注青年體質嘅發展。尤其是場地，運動場嗰方面，點樣創造條件提供給我哋嘅年青人去多進行文娛康樂體育嘅活動呢？

在這點上面都同各位議員分享一下。這一年、兩年我打足球、打籃球嘅次數都多咗，有時都健下步，目的係甚麼呢？我就真係唔想健步，因為我嘅球技又唔係咁好，姿勢又唔係咁靚，但係希望給社會一個帶頭嘅作用，一個推動嘅作用。有時真係去行下山，推動去遠足、去郊野。去到郊外身心舒暢，人又平靜些，壓力都會少些，胸襟開寬些，視野會廣闊一些。其實都係希望帶動一種咁嘅風氣。我會懇切咁樣希望我哋嘅議員，有條件嘅話共同幫我哋去呼籲一下、去推動一下、去參與一下。如果遲啲有機會約大家打場足球就更好。我哋一齊在社會上面推動一些勤運動、健體魄，參與健康嘅體育或者係文娛嘅活動。

多謝崔議員嘅意見。頭先係介紹我哋嘅一些構思同埋工作嘅安排。

主席：

仲有些時間我想請其他幾位局長。容光耀局長昨天佢話想講嘅。

主席：好，請容局長。

社會工作局局長容光耀：多謝主席。

各位議員：

在昨日和今日，先後都有議員提出關於家暴立法。在諮詢嗰陣時係公罪，點解諮詢之後，而家建議成為半公罪呢？

咁我首先要強調，在先行的法例裏面，家庭暴力法嘅犯罪，家庭暴力行為係需要負上刑事嘅責任。因為，對於一個嚴重嘅傷害以及受害人如果佢係未成年嘅話已經係公罪了。只不過，在這兩種情況之外嘅一些普通傷害係屬於半公罪。而所謂半公罪嘅意思就係要當事人提出告訴先至可以來到去追究刑事

責任嘅。

按照在去年 9 月份作公開諮詢打擊家庭暴力犯罪法律草案文本，諮詢重點就係應否以一刀切嘅方式將某些原屬於半公罪嘅家庭暴力犯罪改為公罪。當時嘅考慮就係社會上普遍都認為家庭暴力受害人往往都係基於恐懼，經濟依賴，又或者係寬恕行為嘅原因，而唔敢或者係唔願去作出控訴。咁樣係會放任加害人，但嘅暴力行為可能會越加激烈以及嚴重。希望透過立法，將無論輕重嘅家庭暴力行為一律改為公罪處理。用意就係在迅速採取保護受害人嘅措施，促使到刑事程序嘅提起，並盡量勸諭加害人接受適當嘅輔導。然而，綜合各方嘅諮詢中，就打擊家庭暴力犯罪法律草案提供嘅意見，各界對家庭暴力事件嘅關注點，並唔僅係是否向施暴人作出檢控，而係在於這個立法係唔係能夠確保受害人得到即時、適切以及有效嘅保護。將家庭暴力以公罪論處嘅這個立法方向，執法同埋司法機關，甚至在法律界都係質疑在這個實務當中係唔係能夠真係可以解決到所有嘅家庭暴力問題。因為，在現實當中，即使係加害人提出控訴，又或者係成功追究刑事責任，好有可能會由於施暴人被判刑而導致無可挽救嘅夫妻、父子等關係變得冇轉彎嘅餘地，繼而令到整個家庭關係破裂。

今年 9 月，10 月期間，剛剛同葡國有一個家庭培訓活動在葡國進行，我哋都邀請咗社福界嘅朋友去到葡國接受這一個培訓。當中，我哋邀請到葡國里斯本大學法學院院長、法官、檢察官，都就家庭暴力行為向我哋作出引介。而參考咗葡國嘅一些經驗，雖然這一個國家嘅家庭暴力已經係定為公罪，但係在實踐中，家庭暴力案件並沒有因此而減少。所以，一刀切將家庭暴力行為定為公罪並唔具有有效嘅阻嚇作用。而最重要嘅係目前嘅刑事法律制度已經係有機制，對涉及家庭暴力嘅犯罪行為作出處理，只要加強執法嘅力度，已經係達致打擊家庭暴力嘅效果。為此，經社工局同埋法務局共同研究之後，因而將原屬刑事法律修訂嘅打擊家庭暴力犯罪法案草案嘅立法方向作出調整，立法文本重新擬定之後，名稱先係改為家庭暴力防治法。

對於打擊家庭暴力立法方向嘅轉變，社工局已經在今年 9 月到 10 月期間特別邀請咗業界同埋團體參加咗兩次引介會。包括向社會工作委員會，澳門婦聯、工聯、街總、明愛，澳門防治虐待兒童會護兒中心以及善牧中心等，引介重新擬定後嘅家庭暴力防治法法案草案嘅構思同埋框架，並且係收集各與會者嘅意見同埋建議。綜觀各個團體同埋業界提出嘅意見同埋建議，當中大多數已經係能夠理解同埋接受，以加強對受害人嘅輔助以及保護係立法嘅重點嘅家庭暴力防治法來到去取代打擊

家庭暴力犯罪嘅草案。同時，都係支持家庭暴力防治法法律草案嘅構思同埋框架者亦都係佔大部分。現今我哋已經係收好晒那些意見同埋建議。這個法律草案文本都係已經到咗最後嘅修訂當中。我哋希望在今年之內就可以向上呈交，進入立法程序。

至於劉永誠議員同埋陳美儀議員都相當關注到弱勢，尤其係智障人士方面。在澳門大概有 2 千多名智障人士，但係宿位只係得 4 百多個，所以院舍嘅需求係有迫切性的。在 2010 年已經係有一所全新嘅智障人士住宿院舍以及一所新拓展嘅智障人士日間照顧及暫托中心投入咗運作，同時亦都將有一所智障人士輔助就業中心搬遷後投入使用。而家正係積極跟進在未來三年增設四間住宿院舍嘅相關工作。將會增加約 350 個住宿名額，為有需要嘅智障人士提供院舍照顧服務。而另一方面，亦都積極加大展能、暫托，職業訓練以及家屬資源服務嘅名額，讓更多智障人士能夠得到日間照顧同埋訓練服務，以維持以及增強佢嘅獨立生活能力，減輕家庭照顧嘅壓力。新設施嘅籌設工作正有序進行。並與工務局同埋建設辦等相關職能部門緊密溝通同埋合作，務求在公共房屋落成之後，有關嘅康復服務設施可以在最短嘅時間之內投入運作。

關於雙重老化問題，一向都係社工局十分之關注嘅。因應殘障人士嘅特殊需要，現正係透過和民間機構合作，向智障人士提供咗包括早期教育以及訓練服務、暫托服務、展能服務、職業訓練以及輔助就業服務以及家屬資源服務等多方面嘅康復服務，協助智障人士維持同埋增強獨立生活嘅能力。同時亦都係減輕家庭照顧嘅壓力，促進佢哋能夠融入社會同埋參與生活。倘若有關嘅家人有能力照顧這些智障嘅家人，社工局係為佢尋求合適嘅院舍居住。如果係屬於緊急嘅個案，都會透過資助嘅方式安排佢入住私人院舍，等候入住資助院舍。

關於人手緊拙，我哋都因應設施嘅服務性質同服務對象，提供專業人員嘅資助同埋培訓嘅機會。同時，係持續推行社會服務人員嘅醫療保險計劃，強化人員嘅福利，吸納更多唔同專業人士，當中包括社工、醫生、護士、物理治療師、職業治療師等。未來，我哋將會全面咁來到去就人力資源調查同埋檢討這個資助制度嘅研究，盡力規劃人手配置以及透過資助制度嘅改革來到留住人才，吸引更多人士來到投身社會服務行業。而為協助智障人士融入社會，社工局都係向智障人士提供包括早期訓練、暫托服務、展能服務、職業訓練等，來到協助智障人士維持增強獨立生活。

在 2010 年殘疾人士就業發展計劃獲批准營辦嘅澳門扶康會心悅洗衣已經在 2012 年 1 月正式投入運作，為智障人士提供咗工作機會，加強佢哋透過工作融入社區。在 2009 年推出嘅殘疾人士社交康樂活動計劃，鼓勵咗康復嘅機構為殘疾人士開展社交康樂活動計劃，亦都有助智障人士參與社會，而有關嘅計劃將會在 2013 年繼續進行。

有提到關於智障人士，陳美儀提到可唔可以獨立嘅身份來到去申請援助金嘅問題。其實社工局，包括本人和我哋嘅同事都在好多場合裏面都係表示過，因為援助金發放係屬於社會救助目的，係需要協助經濟貧乏嘅弱勢社群，所以申請嗰陣時必須要經過經濟審查，來到確保社會嘅資源能夠幫助到真係有需要嘅家庭，好似必須按照個人同埋家庭嘅經濟狀況作為評估依據。在此，就無分佢係正常人、殘疾人、老年人或者係患有嚴重病患嘅病人，我哋都係一視同仁。所以，唔會因為佢係一個正常人士，佢就可以獨立出來申請這一個經濟援助。在而家這個審批援助金嘅過程當中，服務嘅核心精神係在於確保家庭嘅價值同埋功能，對陷入經濟困境嘅個人同埋家庭提供援助服務。而所謂捆綁式其實唔係一個好好嘅形容，因為我哋強調嘅係個人同埋家團。這個家團嘅意思即係生活在一齊嘅屋企人，佢哋大家係相親相愛、互相依賴、互相支持關懷。等於父母養育佢哋嘅子女，咁佢哋子女大咗之後就來到去供養父母。但係如果當家庭嘅功能失衡嘅時候，例如父母某一方因不幸過咗世，成為一個單親家庭，家庭嘅經濟受到好大嘅影響，嗰陣時政府就發揮功能，幫助這個家庭，使到佢哋嘅經濟情況得到改善。因為，若果這個殘疾人士能夠獨立申請嘅話，我哋可以睇到，現今有為數 4 萬個 65 歲嘅長者又或者係一些嚴重病患嘅人士都有同樣嘅道理，因為佢哋有能力來到去賺取生活嘅費用。這方面係有違社會援助目的，亦都會對這個家庭倫理同埋文化傳統造成衝擊，實在係需要謹慎來到去考慮嘅。

由於時間關係，咁我就回應到這裏。

社會文化司司長張裕：如果主席同意，旅遊局局長可能用 3、4 分鐘會就議員嘅一些問題作出一些介紹。

主席：嗯，好。

Director João Costa Antunes: Obrigado.

Sr. Presidente, Srs. Deputados, Caros colegas.

Eu ia começar por tocar numa problemática relativamente aos hotéis. Falou-se aqui na questão dos hotéis de acomodação económica, e também no tempo de permanência em Macau, no curto tempo de pernoita. Gostaria, então, de referir dois aspectos.

De facto, duma forma geral, podemos dizer que faltam hotéis em Macau. E não faltam só hotéis económicos, faltam hotéis de todas as categorias. Uma cidade que recebe 28 milhões de turistas dos quais apenas 50% pernoitam em Macau, e onde a taxa de ocupação dos hotéis é superior a 80%, eu diria que faltam hotéis, e se falarmos na categoria dos hotéis, diria que, se a média geral de permanência em Macau está à volta de 1.4 noites, a média de ocupação nos hotéis de 5 estrelas é de duas noites. Isto quer dizer que são muitos os turistas que vêm até Macau e que preferem, que escolhem, o alojamento de 5 estrelas. Contudo, estamos a dar toda a prioridade à análise da questão dos hotéis económicos. Neste momento, existem em Macau apenas 1 480 quartos em hotéis económicos, e estamos a analisar três processos, dois em expansão e, segundo informações obtidas, existem mais 18 pedidos para a construção de hotéis económicos no futuro. Significa isto que, neste momento, existem então cerca de 1 480 quartos, mas prevemos que venham a duplicar, atendendo ao número de hotéis que estão a ser licenciados, e cuja construção está a ser estudada. Vamos então poder duplicar o número de quartos económicos em Macau.

Para apoiar esta área de procura criámos uma página electrónica, através da qual se permite a reserva de quartos de hotel *online*. Portanto, existe a partir de agora a possibilidade de a procura de quartos económicos... de se poder proceder à sua reserva através da internet.

Estamos também a apoiar a hipótese da construção de hotéis económicos na nova via de acesso turístico das Portas do Cerco. Como sabem, é um projecto que está a ser desenvolvido, e foi já anunciada a possibilidade de se estabelecerem hotéis económicos nessa zona de acesso, junto às Portas do Cerco. Estamos a trabalhar nesse sentido e a dar toda a atenção a essa zona.

Se me permitem, gostaria de abordar apenas a parte do licenciamento, que ontem foi já referida, e em relação à qual gostaria, também, de clarificar alguns aspectos.

Os Serviços de Turismo possuem, como muitos departamentos oficiais, uma Carta de Qualidade, e nessa Carta de Qualidade relativa ao licenciamento estão previstos os prazos, o tempo que devemos levar para apreciar os vários pedidos. Ora bem, nós assumimos a responsabilidade do licenciamento, mas temos de trabalhar em conjunto com vários departamentos técnicos que também dão a sua colaboração.

Portanto, o que podemos afirmar é que criámos já, no nosso Serviço, uma área específica... para contactar com todos aqueles que pretendem investir em qualquer área, e que pretendem licenciamento, e distribuimos todas as informações em várias línguas. Os procedimentos de licenciamento estão... profundamente, digamos assim, distribuídos, também ao nível da página electrónica e nos médias, e temos, pelo menos, uma reunião semanal com os investidores que pretendem construir ou que pretendem abrir novos estabelecimentos. O que acontece muitas vezes é que os projectos são apresentados mas não estão em condições de serem licenciados, e nós temos que seguir, à risca, todos as indicações dos vários serviços e tomar atenção especial à segurança contra incêndios, à segurança das obras públicas e à saúde.

Que eu me lembre, nestes últimos 25 anos que levo à frente dos Serviços de Turismo, registaram-se dois casos em que, de facto, tivemos que ter reuniões para explicar porque razão não era possível licenciar o estabelecimento em causa. Um deles foi conseguido ao fim de quatro ou cinco anos, porque havia um problema de propriedade, e um outro não foi possível, de todo, licenciar. Portanto, o que dizemos é que nem sempre é possível licenciar todos os projectos que nos são apresentados, veja-se um exemplo. Se está a ser construído um bar numa sub-cave, onde não existem saídas de segurança em número suficiente, é claro que um empreendimento deste género nunca será licenciado.

Portanto, gostaria de referir que, ao nível do licenciamento, existe uma Carta de Qualidade, e que estamos abertos, com certeza, a melhorar o nosso trabalho; e se houver alguma questão que seja possível esclarecer, estamos sempre à disposição de qualquer pessoa, tenho sempre a porta aberta para receber seja quem for, relativamente a qualquer questão.

Muito obrigado.

(旅遊局局長安棟樑：多謝。

主席、各位議員、各位同事：

我先講講關於酒店的問題，尤其涉及經濟型酒店、旅客在澳門逗留時間及短暫留宿時間等問題，我想講兩個方面：

整體來講，本澳酒店現呈供不應求情況，不但是經濟型酒店，各星級酒店情況亦然。澳門每年接待約二千八百萬旅客，當中只有 50%的旅客入住酒店，占本澳酒店入住率 80%以上，使酒店供不應求。據統計，旅客平均留宿時間只約為 1.4 晚，入住五星級酒店的時間則為兩晚。顯示許多旅客較喜歡選擇入住本澳五星級酒店。儘管如此，本局還是以經濟型酒店或公寓作為優先審批的對象，因為目前本澳的經濟型酒店只能提供 1,480 間客房。根據資料顯示，現有十八個申請，其中兩、三個是申請擴建項目。本澳只可提供 1,480 間客房，但按申請牌照數目來看——這些申請興建酒店項目現正處於審批階段——預計日後本澳酒店客房的供應量會翻倍增加。

為方便旅客，本局已開設一網頁，由現在起旅客可透過網上預訂本澳經濟型酒店的客房。

與此同時，本局亦非常支持在粵澳新通道附近地段興建經濟型酒店。各位都知道這項工程現正展開，而在這一帶興建經濟型酒店的消息已向外公佈，本局現正進行這方面的工作且密切關注該區的發展。

關於昨日提及的發牌事宜，我想稍作解釋：

旅遊局與其他政府部門一樣都有服務承諾，特別在發牌期限方面的服務承諾，即訂定各項申請所需的審批時間。雖然本局負責發牌，但也需要其他部門尤其是在技術上的配合及協助。

本局已設立一專門部門負責與有意投資或取得牌照經營者聯繫，向他們提供不同語言的相關資料。除了提供資料外，有意投資者亦可在網上及從媒體上查閱申請牌照的程序。此外，本局至少在每周例會上為有意興建酒店或經營新酒店的投資者介紹有關程序。但是，雖然已收到不少投資計劃書，但是很多由於不符合條件，而不獲發牌。發牌必須完全符合各相關部門提出的要求，尤其須特別注意防火安全、工程安全及衛生等方面的要求。

在旅遊局工作的這二十五年來，我記憶猶新的有兩個申請牌照的個案，當時本局已召開會議說明了不能給有關場所發牌的理由。其中一個是涉及業權問題，事件擾攘了約四、五年，問題才得以解決，最後申請者獲發牌。另一個案是申請者始終沒獲發牌。我想說的是，並不是所有提交來的計劃書都可獲發牌照，例如：如果將地牢改裝成一間酒吧，但裡面沒有足夠的走火通道，這項投資計劃肯定不會獲發牌照。

最後，在發牌方面，本局許下服務承諾，且一直本著不斷改善各項工作為己任。為市民敞開大門，不論誰來問問題，本局人員必定接待。

多謝。)

主席：好，我哋現在休息半個小時繼續會議。

(休會)

主席：好，我哋繼續會議。

請李從正議員發言。

李從正：唔該主席。

司長、各位官員：

我今日想講嘅主要內容其實都係同三個長效機制有關嘅，想表達一下我嘅意見，亦都係聽一聽司長可能對這三個長效機制有甚麼睇法。

不過，在講長效機制之前，我有個問題想問嘅，就係幾時會再加煙稅？同埋正在到來一月一號，邊個職責範圍嘅同事會到娛樂場裏面進行控煙嘅執法？我相信這兩個係大家會關心嘅。因為加煙稅在其他地方來講，嗰個經驗所得係最有效，在目前來講係最有效令到煙民減少嘅一個舉措。所以，加煙稅來講我覺得應該係一個持續性要去思考嘅問題。而且這個做法，而且我哋澳門嘅煙稅同鄰近地區嘅煙稅仍然有一段距離，我相信係有空間去繼續去堅持這一個政策。

第二，喺嚟緊……昨日就好清楚了，我哋因為昨日，前日在保安領域嘅時候，係負責娛樂場裏面嘅司法警員就已經笑口咁講到明：佢哋都好忙嘅，主要職責都唔係控煙，主要都係

打擊罪案。咁樣嘅話，如果係博監，會唔會係博監做呢？但係博監主要嘅領域，可能佢嘅工作都係我哋嘅財主、我哋嘅出納去監督我哋嘅娛樂場在錢同埋運作上面嘅。咁最後，雖然寫就似乎係好清晰，就寫咗我哋有好多執法部門，但係最後在娛樂場入去執法、人去作一個叫做非定期或者定期嘅例行巡查，究竟係邊個部門主導？我覺得這個係非常要清晰嘅。因為來緊要做嘅話，究竟邊個人去？到時就話：你呀、你呀、你呀、你呀。咁最後邊個呢？我覺得在這裏如果能夠去清晰嘅話就最好清晰咗佢，咁我相信亦都係對於整個工作來講係有更大嘅一個積極作用。我希望能夠去瞭解一下，司長，在這方面究竟工作部署會係點樣？

如果講返長效機制，行政長官在施政報告裏面，其實在明年三個好重要嘅長效機制都在司長嘅範疇裏面，包括社會保障、教育、醫療。而且，我相信這幾個大範疇嘅長效機制都好少會涉及跨司嘅問題，所以，似乎三個長效機制都係司長一力承擔。這樣的話，會唔會在工作時間段或者在整個規劃上邊，究竟司長嘅藍圖會係點樣呢？因為，三個長效機制唔係講笑嘅，究竟佢只不過係一個可能五年規劃、十年規劃還是百年大計，其實這個係涉及到整個澳門三個好大嘅範疇，佢嘅政策如何規範性、穩定性同埋長期性地將這三個大嘅機制去落實？裏面涉及嘅究竟會係些甚麼東東呢？好似昨日咁，我聽到了，咁我好清楚，原來昨日司長介紹咗社會保障嘅長效機制，我哋參照咗世界銀行。我唔知呢個係我哋最後決定長效機制會議，世界銀行這個研究嘅五大支柱為一個基礎，去建構我哋社會保障嘅長效機制，係唔係這個意思？但係，如果係咁睇嘅話，這個長效機制裏面分咗五個部分，咁究竟每一個部分嘅規劃大概有甚麼關鍵性嘅一個制度我哋要做？而且，做嘅一個日程又或者想法會係點樣呢？因為，裏面有一些似乎好簡單，我哋睇到公積金傾咗好耐了，中央公積金我哋做到，私人私退金又點樣呢？而家我哋嘅雙層社保其實講就講咗好耐了，但係就未見蹤影。究竟會唔會真係最後變成百年大計？而在十年裏面究竟能唔能夠將五大支柱基本建成？這個概念係一個點樣嘅想法？而家可能係起步，未必一定有咁完善周詳，但係起碼讓我哋知道心中有譜，十年、二十年基本我要建些甚麼，起碼清清楚楚，我覺得這個係非常之重要嘅。因為，如果講到社會保障來講，好簡單了。而且，社會保障來講，司長剛才，昨日講嘅時候亦都好清晰，我哋嘅長效機制係同我哋經濟發展嘅情況相適應。當我哋經濟發展唔好嘅時候，我記得，首當其衝嘅就係裁員、減人工、減福利；冇公積金、私退金甚麼都有晒，唔供。到好番了，人工仍然會即刻上升，福利上，亦都有一些機構到而家未回復返正常。在咁嘅情況之

下，其實這個所謂嘅長效機制如何能夠確保穩定性呢？因為，好清晰嘅就係當經濟唔好嘅時候，一些老闆可能佢唔會考慮將佢過往賺到嘅錢拎返出來，然後一路貼貼貼貼貼，保持生活或工資水平、福利水平，保持晒冇問題，頂到過咗關為止，唔會！第一件事我會睇到，當時來講好清晰了，人客一少馬上 Cut、Cut、Cut、Cut、Cut，這個係一個好現實嘅情況。在政府來講，你點樣因應社會經濟發展嘅狀況來到穩定地、長期性地保障到社會保障機制，這個長效機制嘅落實，這個我相信係廣大打工仔好關心嘅事。因為，可能這樣嘢對於打工仔來講係年紀老嘅，可能變成一個年長嘅、就退休嘅才會關心。其實我亦都覺得係要呼籲我哋年青人都要關心這樣嘢，因為社會保障嘅長效機制係一個長效嘅機制，唔係講緊老人政策。咁所以，佢裏面涉及嘅其實都係年青人出來工作之後一生裏面嘅保障。點樣能夠讓更多嘅年青人去知道佢應該點樣為佢哋嘅人生規劃作好一個更大嘅保障同埋提出佢哋嘅意見？這個係我覺得非常之重要。因為，你會去令到佢在理財或者在工作嘅勞動保障上面會有更清晰嘅一個概念。我相信如果司長要構建社會保障嘅長效機制，唔單單只係機制咁簡單，可能在整套嘅理念上面，我相信司長亦都要好好地思量同埋好好地做好教育工作，令到更多嘅打工仔在這方面會知道佢哋應有嘅權益，而各方都應該要去支持，去做好這樣嘢。

第二我想講講就係教育嘅長效機制。我諗我醫療未必講得切。教育嘅長效機制，頭先我聽到一句說話，我覺得真係要講講。點樣呢？年青人怕競爭。我記得我在經濟財政司嘅時候就講咗一個故仔，個故仔就係好短而已，得一句說話，我又翻講了。這句說話就係講有一個年青人同我講咗一句說話，問咗我一樣嘢就係話：點樣才能夠搵到一份最快買到經屋嘅工呢？當時來講，我就話，哎呀！可能會有些人話覺得這個年青人好似冇甚麼競爭力、冇甚麼上進心，又可能一出來就要買樓，這些真係心頭高，點樣、點樣、點樣。但係，我覺得更重要嘅係去思考點解佢會咁諗？點解我哋會覺得佢怕競爭？原因係甚麼？甚麼造成？我相信這個係更多地我哋作為父母官嘅官員去思考嘅問題：點解會造成今天年青人會咁樣嘅諗法？佢點解會覺得佢唔能夠憑自己實力，在畢業之後可以在一定程度上在私人嘅樓宇裏面買到自己嘅樓，可以安居樂業？而佢一開始就想我一定要靠政府，點解？如果佢怕競爭嘅話，好簡單，我個日去講競爭力嘅時候就講咗外勞政策，我今日都講少少。其實不公平競爭導致怕競爭，咁係唔係就係怕競爭呢？一個外勞，可能佢根本來到被剝削，唔敢出聲，可能工資亦都係相對比較低嘅時候，咁年青人去面對這一種競爭，又係唔係真係怕競爭呢？所以，好多時我相信在去斷定一樣問題嘅時候，我哋

可以多從一個叫做點解會產生這個問題嘅源頭。這個源頭唔單單只係講緊年青人本身，這個源頭係講緊市場可能扭曲了。政府嘅一些政策導向可能令到年青人會有咁嘅想法，又或者這個政策嘅長期性之後令到佢成為咗一種意識，好多嘅問題都會令到年青人係會產生不同嘅想法。我相信，如果司長在青年工作上面亦都有一個好開明嘅思想，亦都有一個好開明嘅心去聽年青人講嘢。因為我見過司長你做過好多這方面嘅工作，我相信更多地在這方面，司長能夠同年青人換位思考：點解佢會咁？係甚麼造成佢會咁？點解佢會覺得我唔能夠有自信心，自強不息去爭取到，而給人覺得佢怕競爭？我相信這個先係關鍵，這個先係我哋而家整個政府嘅政策裏面嘅導向或者形成嘅社會氛圍所需要關心嘅年青人嘅其中一個我覺得需要去關心嘅問題。

仲有三分鐘。

如果講到醫療方面嘅話，我相信在這方面嘅長效機制，我相信在十年規劃，19年整個醫療系統嘅構建可能已經有咗端倪，好多問題都可能相對來講慢慢、慢慢會能夠有規劃地去解決。但係，的確在輪候時間長又或者在一些長期病患者佢哋去面對、佢哋去睇醫生嘅時候個個輪候或者檢查嘅時候、身體保養嘅時候，佢面對嘅實際困難，有冇一些短期嘅措施可以盡快解決呢？在現時來講，我哋嘅醫生本身平均，譬如話在山頂專科一個醫生，佢睇醫生時候嘅時間究竟有幾多？同埋幾多係用在病人身上？幾多可能用咗在入病歷、約時間這些行政手段身上呢？能唔能夠將一些工序更好地去令到優化個醫生本身在睇醫生嘅時候個個效益，令到病人可以更縮短去輪候嘅時間呢？我相信這個可以去諗下，可能在短效機制上面仍然係有所幫助。在這方面，我相信政府能夠去做嘅、優化嘅我相信會有好多。

最後剩返分零鐘嘅話，我又想講下少少旅遊。旅遊其實在這方面，我特別關心嘅，要支持徐議員所講嘅黃牌車，點解佢會係免稅呢？免稅點解唔去換返些好嘅嘢車呢？架旅遊巴完全冇晒保養，失晒靈，撞埋牆，幾十人傷咗，這個係甚麼呢？點解我哋唔去關注這些旅遊車嘅問題？我曾經亦都接到一個Case，架旅遊巴落斜路，發覺斷咗軚尺，即係方向盤冇咗，冇咗動力，咁嘅話，個司機當堂就已經係話：我辭職了，我唔做。大家而家在這方面，我哋面對嘅問題就係旅遊車已經舊了，一架換一架嘅零件，金屬疲勞，舊零件就換舊零件，換咗一啲嘢嘅時候，那些旅遊巴根本就冇保養。泊車位又唔足夠。咁嘅時候，我知道未必一定係旅遊局嘅問題，但係作為旅

遊局，如果係站在一個角度就係如何保障旅客嘅安全，我相信在這個角度上面足以去作出一個限制：旅遊巴應該甚麼時候要更新？甚麼時候應該要去作出維修保養？令到佢對個旅客嘅人身安全有最足夠嘅保障，唔可以再發生旅遊巴因為老化而出現傷害咗旅客嘅事情，這個係危害咗澳門作為世界旅遊休閒中心嘅形象。

唔該。

主席：張立群議員。

張立群：主席、司長、各位官員、各位同事：

在司長嘅施政報告部分裏面其實都唔使再睇了，你所寫嘅都齊全十足，甚麼大細都齊晒，睇完就甚麼都有了。特別昨日我聽見好開心，司長可能讀錯咗，係 3 千 7 百億，我一計條數，每人即刻分 74 萬，咁而家就分咗佢先，這個真係一件好事來嘅。

好多同事講培養人才，點解澳門冇人才。因為昨日趙校長講，澳門嘅大學將來要點改革，要創建、要做導演、創藝文化，甚麼都做齊晒。咁歷史上，澳門本身讀完書真係做教授嘅又有幾多個人呢？就算我自己，今年都咁大年紀，我啲仔女，我朋友啲仔女讀完書在外國攞晒碩士、博士返來嘅，你估做甚麼？在屋企幫下手做下家頭細務，自己老豆剩落多少，第二就走去賭場、酒店搵份工。Supervisor 就叫做好高級了，兩萬幾蚊，咁派牌又係有萬幾蚊。所以而家讀書，澳門變咗邊有人去讀書呀？嗰個比例係唔成嘅。而家請人，二萬人得百幾份工，二萬人去求，咁你睇個社會幾多人渴望想打政府工。所以，有時高天賜講話：前線人員辛苦。實際仲辛苦三倍都仲有人去捱呀。咁這個就唔係一件好事來嘅，咁點解呢？因為，年青人真係我哋要去深思，點樣去令到年青人佢捱到某個程度，真係有一定嘅地位，咁佢自然係捱。講開笑，頭先李從正先講，我唔係同你辯論，好似話年青人點樣怕競爭，梗係怕競爭啦！而家嬌生慣養，一出世老豆老母唔係金匙羹就係盜匙羹，唔使擔心兩餐，讀書全部唔使磅水，老豆、老母唔使擔心。出到社會梗有份工。政府嘅生活條件太好，給嘅福利太好。加上一些我哋立法會或者其他人一講做生意就奸商；如果同政府做嘢就係官商勾結。咁就仆街了，這兩個字你真係唔知點預了。咁變咗讀完書，佢唔去做生意淨係去搵份工，咁邊有咁多工打？邊有人創業呀？所以，你話給多 30 萬，給甚麼都有用嘅！個個都唔敢要，除非嗰 30 萬使完就算數。這個我覺得

都係一個想法，並唔係任何人嘅想法，係我自己嘅想法。所以，如果你哋想人改變怕競爭，以後公眾社會人士就唔好講奸商。商人係好人。工、商人就互相互讓、互諒，咁佢個心先至唔會一聽到做生意：喂，奸商來的，邊個敢制？除咗呢啲撈到幾十歲先至去做，冇法子唔做。所以，我覺得這樣嘢係在社會可能有少少影響嘅。如果將這些風氣改轉咗就會比較好一些。你話好似培養人才，好似我哋鄰埠一樣，鄰埠的政務官係全香港最好嘅學校學生，每一年揀 200 個人出來，培養那些人入政府做政務官，咁這些政府官每一個部門都做。所以，香港政府的官好似神仙一樣，邊個部門都做得到嘅。原因就從開始入職訓練咁多。但係澳門就有咁嘅機會，因為我哋回歸時間好短，亦都有時間造就到官員四圍氹氹轉咁換，換咗就唔知做唔做得到。咁起碼司長換咗，而家你做咁多範嘢都可以能夠同學生郊遊，四圍去做下，踢下足球，其實這個好難得了，你做到咁真係好難得了。你睇下而家啲司長、長官有邊個咁得閒去做這些嘢？佢哋真係嘍！佢哋如果好似你咁做，佢會驚人話佢係：哇！這個人咁懶唔做嘢，去做呢啲嘢。但係你唔同，你係這個範疇，你瓣瓣都有：去踢波又關你事，體育、游水甚麼都係關你事，教育，和學生交談又係啱。所以，你本身嘅問題係比較社會上的人對你言論上嘅攻擊，惡、暴力係少啲，都係少啲嘅。因為，你這些係比較平穩些，對市民、民生好接近嘅嘢。

咁亦都講我哋托兒那些。托兒其實你就增加咗五間托兒所。其實五間托兒所你講出來係有意義嘅。點解呢？托兒所係按照人嘅出生率計數，咁按而家生活水準，好了，好了，去年又多咗 1 千幾人出世，明年可能又多咗 2 千人出世。如果你幾千人出世同你加多五間托兒所增加 1 千 2 百人，咁嘅比例做唔到了。你再增加幾多都有。而且你嘅年期係幾年後先有這五間托兒所。而且你亦都有做過人口分析嘅問題。在哪裏擺五間托兒所？係路環擺 6 間都有用，這些人唔肯去搭車，咁遠。所以，這個地方嘅分佈就按人口嘅佈置，出生率計數，這個係人口調查做得到出來嘅。咁我就覺得托兒所就對澳門人係一個福氣來嘅。

咁講少少教育。我就未讀過書嘅。教育就分開有一種就係回歸教育，一種就係正常教育。回歸教育，你哋要計，幾多人嘅津貼，學生津貼。正常教育就 30 人一班，政府津貼同埋津貼俾自己學校。30 人一班梗係好！但係如果你話有些 30 人教，教到咁上下走咗 10 個，得翻 20 個，咁嗰個班得 20 個人，津貼少咗，咁嗰個班亦都開得零星落索。教師亦都唔知點做。所以，這樣嘢我覺得你哋，唔知係唔係真嘅，我睇這樣嘢

文件就係咁講，如果唔係，咁你自己睇睇，講清楚。所以，我覺得如果係有咁嘅情況下就應該去改善一下。既然我哋澳門咁多錢，個個都使唔晒，點解唔做到大家都均勻一些？講到回歸嘅教育一律就係雙失青年，對佢實際上應該仲要扶助。正規班嘅唔扶助，這些人都要扶助。將佢唔好嘅人、冇能力嘅人培養成一個有能力嘅人，這個就真係功德無量。

至於文化藝術嘅問題，在澳門講到文化藝術同體育真係冇得頂。我諗在亞洲地區或者全世界，澳門都係好優待的範圍來嘅。特別都提下讚下我哋黃有力局長。體育界咁多個會，真係資助到個個都笑嘅，真係這個係好事來嘅。不過，但係我覺得有時資助在某一些細些範疇嘅社團應該要加多照顧少少。因為大社團嘅那些組織體育運動，佢係有能力去做，係政府資助到夠，但係一些細嘅未成型嘅嘢呢，佢想去做，佢有能力去做。你資助給佢嘅津貼少，佢想做變咗冇得做，冇得做變咗散埋個會。大概越大就越大，越細嘅就滅亡。真係這個係一個，真係希望你能夠對啲細嘅都留意一下，等人冇得發展下啦，細嘅會。

講下文化曲藝。而家最緊要就係好多澳門人都係比較本土化，唱下粵曲。粵曲這興趣就其實好勞氣傷財嘅，又要幾樣鑼鼓去做一班樂師，你要搵個地方又要隔聲。所以，澳門而家房產業咁貴，去租個地方又要做隔聲、又要請人、又要搵師傅，一上來又要住酒店、又要食飯，其實這個負擔都好重嘅。咁但係，我哋澳門到今日，對這些整體一個團體藝術嘅人發展，你哋都補助好大，津貼場費咁。但係，就係因為我亦都頭先咁講，就話你哋津貼這些大嘅團體去做咗，一些個人就有喇。自己藝術創作行為，一個人做嘅嘢，佢點同你政府講甚麼你哋都唔信，唔會資助幾多給佢，咁就抹煞咗這班個人嘅創作藝術人才。所以，司長都對這個問題盡量睇下哪些係有成績嘅年青人做到個樣嘢，都給個機會佢能夠表示下，做些嘢啦。

其實，我要講嘅都差唔多，咁快趣喻下喻下，都喻齊嘞喇。我希望，譬如有些醫療方面，即係頭先我哋都講過，係實事，我同馮志強聽到。有些朋友就話，特別係鏡湖醫院，好多同事、好多對醫療部門都係，其實我哋花嘅錢都好多嘅。其實醫生亦都係好盡心盡力去做嘅。但係時間編排上，而家確實係正如有些同事講，特別係急診，夜嘅急診，即係特別嚴重嘅急診，佢即刻入醫院，真係冇醫生、冇設施、冇地方，只係睇普通急診就其實係差唔多係浪費嘅。甚至乎你話有些人 3 點鐘去，真係頭先講嘅，3 點鐘去睇到 8 點鐘都排唔到佢。其實這個就唔好甚麼原因，但係我哋只知道這些嘢都盡量去改善，等

市民……因為醫就係對健康好緊要嘅，我哋整日都以人為本，如果醫唔好人，個個都死就冇人為本了。所以，我希望其實整體澳門嘅這幾個架構部門做得已經都算係 80 分了，但係，市民嘅要求永遠係無止境嘅。

唔記得講一樣，你望，我先記得。這個真係好特別，社保基金。葉先生，因為點呢？上一次經濟司丁連星俾我……呀，我問都問到暈咗了：三千億得返十四億。佢每個開支，整個一年開支係二億嘅費用。咁你能夠用咁嘅數去賺到有 40% 投資，你可以搵 1.6% 回報，這樣嘢真係好可貴了。但係，我覺得你而家嘅基金，在人數計，你講那些監察全部加埋基本上就係同金融管理局差好遠嘅人數比例。到底你哋大家有冇一個接觸，即係同理一個唔同聲唔同嘅部門，大家都可以傾下、交流下，喂，我哋點做、點做？唔係邊個叻嘅問題，其實投資係講運氣嘅。你今日叻完，明日可能衰咗。唔係呀，這個係事實，大家都知道這樣嘢，唔可以保證，但係穩健嘅梗係唯一最好。但係睇嘅數來講，你嘅比例就好高了：1.6%。如果 3 千億同 14 億，0.1% 都未夠。所以，我覺得你應該既然做得咁好，你應該就想個辦法在人才方面，請多一些好嘅協助你。其實澳門人對 40 年後，我同你都睇唔到了，40 年後夠唔夠錢？真係得個問字。你就唔好擔心佢哋問你 40 年，你只係而家這 10 年內，你搵啲人做嘅基金 1.6 轉到 1.8，我就拍手高興了。

多謝。

主席：林香生議員。

林香生：多謝主席。

司長、各位官員、各位同事：

今年嘅施政報告就透過“推廣易”寄到每一個戶口都有，標題就係：增進民生福祉、立足長遠發展。新嘅條件同要求，我哋觀念上點更新？新嘅奮鬥目標同新嘅事業發展佈局，我哋行動上又點配合呢？這裏係要我哋整個澳門包括官員、社會各方面都要去考慮嘅問題。

教育上我唔知點，從教育上來講，我始終覺得澳門而家缺嘅係精神主軸。我經常都講：做人最緊要係意誠心正，意誠心正就無罔無欺；做事最重要是務實求真，務實求真就唔會弄虚作假。

司長嘅範疇好多都係要做長效機制，我講嘅希望今次我哋點樣聚焦到幫扶中產。這個中產嘅概念，我用一個數據，就係我哋公務員而家叫做第三級嘅 195 至 385，這個收入我哋同佢計一下就知。佢哋缺甚麼，佢哋欠甚麼，我哋點樣幫佢？

司長好想我哋提高整體素質，在這裏來講，我建議少少。

第一個，我哋現在免費教育去到 15 年。我哋嘅高等教育非常正規，但係成人嘅高等教育又點做呢？我哋係唔係又用正規教育這套呢？我希望司長去考慮一下學分銀行制。學分銀行制既可以改善學歷，又可以改善興趣，更可以係立竿見影，我急用先去學。有些事情可以積累起來，我可以係寫一篇論文變成碩士，寫一篇論文變成博士。問題澳門咁細，我哋自己本身可唔可以做一个學分銀行制？韓國已經推行緊，唔係我哋獨有。

第二個係我哋嘅職業訓練。我哋而家嘅職業訓練只有一個地方做：勞工局，其他唔做。但係，我哋 96 年有三個法令，51、52、53 都有。特別 53 法令有一個附件，半技術工人、技術工人、專業技術工人，從來無做過，邊個去做呀？無人去做。學徒制度只有勞工局做了幾樣嘢。我哋沒有向社區推廣，我哋唔係冇武器，我哋有武器，我哋有規定、有規矩。我哋有個委員會嘅，幾個學校嘅主要負責人都係那個委員會裏面嘅人，我唔知有冇開過會。

在職業訓練上面來講，在澳門我哋冇嘅，可唔可以購買課件呢？人哋隔離左右有，我哋購買課件。甚至乎我哋保送一些人去讀。我哋唔係未做過，我哋欠咗一批燒焊合格嘅時候，我哋同船級社做過，100 幾人，做過。有些經驗我哋可以繼續去做，可以做到一些嘢，提升我哋一個 Rate，提升我哋嘅素質，提升我哋工作能力。有些經驗做到，但係問題來講斷了，冇持續落去。

第二個問題係講社保。社保好感慨，2011 年 10 月 2 日報紙賣：2016 年社會保障基金破產。362 日之後，葉炳權主席話給我哋聽 40 年好穩定。1 年都唔夠，我哋中間就咁做咗一個 370 億嘅注資。甚麼都有搞過，一個就 2016 “叮叮”，一個就 40 年安穩。搞乜啊？另外，還有一個，社保唔係淨係養老金、唔係淨係殘疾金，社保仲有短期嘅津貼，有疾病、有失業、有出生、有結婚仲有喪葬。仲有兩個制度到而家我哋改咗社會保障制度之後無跟進改嘅，一個叫做破欠制度。應該唔叫這個嘅，澳門應該係叫做勞動債權代償機制。第二個係肺塵病，原來就附在工傷保險，後來就給落來社會保障基金，現在就半天

吊。我哋變來變去，最後要將這些機制理順返，邊個去理？冇人理呀！冇人理嘅。養老金就大晒，其他那些呢？有無考慮過？我哋而家嘅失業制度點呢？我哋雖然家 1.9 嘅失業率，好難講嘍，50 年河東、50 年河西，邊個講得完呀？有些嘢，我哋社會保障制度來講，我哋一個支撐制度係點？

再一個講投資。當然從現在來講，社會保障基金嘅制度上有些嘢冇辦法，考膽汁。在這裏我給個建議，亦都希望司長，你唔需要答我嘅，返去來講，兩個字：就係考慮。好似求婚一樣“考慮”就得啦！一個社會保障基金要成立兩個全資附屬公司，一個公司來起屋嘅，一個公司供樓嘅，接受供樓嘅。這兩樣嘢向我哋澳門嘅居民，向返我哋澳門裏面供緊社會保障基金嘅本地居民服務。這個起樓嘅公司，我可以去買埋舊樓，做埋舊區重建。我係起政府嘅房屋賺到嘅，都係大家嘅，可以去解決我哋甚麼限價樓，甚麼經濟房屋，我哋可以去解決一些問題。因為點解呀？社會保障基金我唔追求高盈利潤。第二個來講，我哋那些人要去借借貸嘅時候，你係社會保障基金嘅本地人，我係 5%按揭都得，5%首期，我借你 95，我可以低過銀行一厘，低過銀行厘半。沒問題啊，好穩陣嘍。這些嘢我哋可唔可以去諗呢？

我哋現在有 100 億幾嘅度，再擲下去可能過幾年有 200 億。有些錢，錢生錢要有路去得嘍。有些嘢又可以要做到這樣嘢。我哋經常都羨慕星加坡，人家 40 年前開始起動，我哋今天開始起動，40 年後，我哋係第二個星加坡呢？或者 40 年後我哋這套制度可以在世界上去推廣呢？人哋嘅經驗要先行得嘍！而家我哋澳門唔知點解流行一樣嘢：講功夫、做政策。政策係做嘅，功夫擺來講嘅，冇人做嘅。所以，點樣聚焦這些事？真嘅，我哋而家擺嘅度有些嘢，澳門自己困自己。對社會保障基金我真係好感慨，一陣間郁下又好似 1 比 2、2 比 1 個個，罪大惡極咁，點解要郁呢啲嘢啫？政治上來講我哋點解要郁這些石頭引出蛇蟲鼠蟻，自己去玩自己咁鬼老襯？社會保障基金已經在 2007 年拎咗一個方案出來，2008 年收咗意見，點解我哋唔可以在那個基礎上繼續行呢？那個基礎有甚麼毛病呢？雙層社會保障我哋而家行咗一半，最後我哋又好似轉軟。跟住而家我哋嘅長效機制接哪裏呢？我哋參考書好多嘍，2008 一套，跟住社會工作局又一套，我哋好多參考書嘍！我哋花咗好多錢去搞這些長效機制嘅事前研究嘍。咁又點呢？我哋上返去網睇到嘍！而家仲粘在社會工作局嘅網，好多文章，一本本，一個個假設。我哋 2011 年做咗個人口普查，我哋又點樣在這裏去參照返原來一些嘢去更新呢？

另外，我哋而家有些嘢好過癮，雖然我哋未到話好似國內形容一些人叫做三拍官員：拍腦袋出主意、拍心口做大事、拍屁股走人。但係我哋有些嘢一加就 50%。加梗係好啱，50%，由 2,000 加到 3,000，加我有意見，但係，點解會加 50%，唔係加 40%又唔係加 60%呢？數據係點呢？所以，我哋而家咪脫序囉，我哋嘅公共行政開支由 2007 年到 2011 年，我哋脫晒序，平均年增長率 27%幾，世界紀錄呀！司長，我好記得同你講過一句說話嘅：我哋有些東西壓縮 5%，每年做一件事，好好啱！我記得啱！我哋嘅開支壓縮 5%，有些嘢唔使啱。有些可能我哋活動嘅 Backdrop 慳啱，我哋嘅禮物慳啱，我哋嘅牆紙黑白嘅，我哋嘅海報黑白嘅，OK 嘅！我哋一年在這裏，而家我哋有些嘢好過過癮，仲有賣埋廣告！成個好大嘅學術，賣個廣告 1 千 2 百字。點理解呀？唔係想發晦氣嘅問題，而係平靜落來，我哋真係要靜思下，我哋而家澳門缺甚麼？我哋在民生事務上，我哋四項嘅長效機制，我哋缺甚麼？

我哋而家在學校裏面來講，入網學校，我哋叫佢私立學校，但係入網學校，佢向邊度呀？向私立去定係向公立去？你又話給我聽，公立學校一個學生平均一年佢要花費幾多錢。點比較呀？我哋嘅小班教育點解區間要 Set 到咁大，25 到 35？如果我有 4 個班，我 25 就收 100 人，我 35 就收 140 人。我做甚麼事要收多 40 個？我哋有些制度自己本身都要考慮返。相對有些事的彈性係要有喺度，但係相對亦都要去鼓勵一些事情。

另一個來講，現在我哋嘅分佈好唔平衡。有些學校現在受制於班房來講想招到難。佢唔使招生啱，佢每年招生來講，讀緊嘅細佬妹已經爆晒棚。佢啲阿哥、阿姐喺度讀嘅，佢啲細佬妹都希望返返間學校讀，那個校長求到暈，咁點呢？我哋而家就主要係學校分佈嘅問題，但係點動彈呢？我哋嘅學校唔可以好似四川一樣，搭個簡易棚地震嘅時候得呀。係唔係呀？我哋擺喺在北區來講，唔夠地方，擺幾個地方搭咗佢，係唔係可以做這些？唔得啱！嗰個計劃究竟點呢？我哋嘅口就話要扶助晒所有嘅設施，所有嘅嘢，嗰個計劃係點呢？所以，我有某情況來講，我又好驚小班教育會唔會返轉頭。我哋同事做咗一個 70 年代到而家嘅嬰兒潮，一個大嘅登幅啱：70 年代我哋平均 7,000 人；80 年代，80 年代嘅 10 年我哋平均 7,000 人；90 年代我哋平均係 4,000 幾人；2010 年之後我哋又開始爬返去，每一年開始接近 6,000 到 6,500。我哋整個學校有這個趨勢嘅時候，我哋點樣去設計呢？

時候夠了。

多謝。

主席：吳在權議員。

吳在權：多謝主席。

司長、各位同事：

如果一間舖頭裏面好多嘢賣，其實講真一句，實際等於有嘢賣。所以在這裏，我今日就擺著三份稿就圍繞著這個核心。

首先，因為陳司長封我為“打擊非法旅館之父”，所以我冇理由，對於非法旅館因為又未完善，我冇理由唔講了，司長。

因為，到而家非法旅館法律仲未曾完善，仲有必要跟進。在你昨日嘅引介裏面，你有講到話禁止非法住宿嘅法律從 2010 年 8 月生效至到今年 9 月底，當局做咗好多嘢，封印咗 276 間懷疑嘅單位。一系列嘅數字，在這裏我唔列舉了。確實，在 2 年多些嘅時間裏面，平均計一計係 1.5 日就出動 1 次去巡查，而且每次查到 5.4 個住宅裏面，封咗 0.57 個單位。平均每巡查 10 個單位裏面就有 1 個被封。當然，從這些數字同埋老百姓嘅反映，非法旅館確實有所收斂，而且趨向於隱蔽。但無論點都好，這個法律生效之後，聯合行動小組確實係做咗唔少嘢，市民係睇到，大家都睇到。所以，老百姓委託我在這裏代表佢哋對司長你同埋行動小組前線嘅公務人員真係好衷心多謝。但係，係唔係至今仍然係每日，1.5 日就出動一次去打擊非法旅館呢？係唔係好似貓捉老鼠咁呀？這些司長真係值得思考一下。因此，我想問一問張司長，封印咗這 276 個懷疑單位 2 年後到現在，有 140 個解封咗。所以想瞭解下，其實當中裏面有幾個非法經營者係真正被起訴同埋受到處罰呢？有幾個受罰者係已經繳咗罰款呢？這些都好重要。點解咁問呢？因為，根據我所知道，好多時候，這些非法旅館被查封咗之後，表面上，這些經營者，實際係代替嘅，因法律裏面有個真空，令到佢哋逃之夭夭，而真正嘅受害者可以話係一些無辜嘅業主。行政長官都好明確講到，佢話：禁止非法提供住宿法律方面，最近已經完成修法方向，而非法旅館方面顯示經營方式有變，政府將適時檢討。所以，如果唔考慮完善法律，以公法、私法並舉去將這些違法者繩之於法，係冇辦法解決禁止非法提供住宿嘅，司長。在司長你 2013 嘅施政方針裏面講到話要針對非法提供住宿嘅問題，檢討執法嘅成效，適時調整工作嘅部署，但係，好似在修法方面未見到，所以，我都想請問聲司

長，包括個時間。

第二個問題，其實真係想問嘅嘢好多，不如我都係集中著在教育政策層面方面嘅問題。司長，教育嘅政策係相當重要，大家都知，你知我知，所以，我想花多一些時間同司長探討一下。長官在施政報告裏面講到，特區政策堅持教育興澳嘅施政路向，而且順著次序分別以非高等教育、高等教育同埋青年政策。可以睇到教育嘅政策係應該先由非高等教育作為一個基礎，進而確保銜接高等教育。賦予青年政策有效配合，這個可以促進社會長遠持續發展。雖然司長你在昨日嘅引介都有提到教育同埋青年嘅問題，但係，講嘅只係講高等教育，再講就係非高等教育，最後講嘅就係青年事務。而且講高教講咗好多，但係非高教就好少。只在第 14 頁裏面你講到：優先發展、提高品質、育人為本、促進公平。噏，係咁多，個方針係咁多！而且幼兒教育直情就有講到。職業技術教育方面亦都只係得十幾個字，譬如：從政府、從學校兩個方面嘅層面深化，從內地嘅教育合作，尤其係推動職業技術教育嘅發展。噏，係咁多。我唔係要同司長去計字，但係，見微知著，我相信好多都懂嘅。我個人認為，司長你嘅教育政策嘅方向方面係出咗好大嘅問題，司長。事實上按照一般事物嘅發展規律，尤其係長官嘅施政報告裏面都以基礎性嘅非高等教育為基本方向，更何況萬丈高樓從平地起，有好嘅非高等教育基礎。如果冇好嘅非高等教育基礎係點能夠邁向高等教育呢！所以，教育政策銜接連貫性係相當重要嘅。司長，教育同青年政策係好密切嘅。但係，點解本澳嘅非高等教育、高等教育及青年政策係分散在教育暨青年局同埋高等教育輔助辦公室兩個部門去分管呢？我哋不妨睇下內地或者鄰近地方都係教育，對於教育都係由單一嘅部門負責。如果將非高教同埋高教分開兩個部門去主揸，係唔係有造成政策唔連貫性呢？如果由一個部門主揸，係唔係可以使到教育同青年政策更加連接、銜接呢？第二，仲可以精簡部門。以你為首去完善一個行政架構，唔使陳司長整日給人鬧了。有教無類、因材施教嘅教育理念，我係好認同嘅。教育嘅目的就係育人成才，成為君子有用之人。因此，本人認為教育首先應該係著重甚麼呢？品德同修養。所以，應該係從幼兒開始。例如，好似鄰近地方嘅國民教育這個例子一樣，點解會出現咗，發生咗這個局面同情況呢？大家諗諗，試問邊個唔愛國？從人性嘅實質來講邊個唔愛自己嘅子女？但係，到底係愛國定係愛自己嘅子女為先呢？大家無妨諗諗。若果過往唔重視國民教育，冇從淺入深，冇循序漸進，一下子就急速要人接受，咁唔出問題至奇。所以，教育又好、發展又好、起樓都好，係應該從基礎做起至能夠穩固，亦係事物嘅邏輯呀，司長。所以，希望司長制訂教育政策

嘅思維係唔係應該從幼兒、中小學，即係話非高等教育開始？政策係從幼兒教育開始。唔止係智力上嘅發展培訓，係要立足於學童嘅快樂成長、家庭嘅健康結構、社會嘅發展進步、國家嘅可持續發展等。但係，特區政府制訂發佈嘅非高等教育發展十年規劃裏面，在學生發展嘅欄目裏面竟然將品德同公民修養列在最後嘅位置。品德教育應該從三歲就開始培育了！本人多次在議程前發言係相當關注，可惜當局無動於衷。希望司長，你同你嘅同事、官員應該慎重些去思考一下啦。自古有云三歲定 80。三歲開始入幼兒園，因此，幼兒園尤其係老師點樣教這個細佬仔係好關鍵、好重要嘅。雖然，特區大力倡導嘅係教育興澳，但係，非高教嘅長遠規劃嘅師資培育、培養，教育理念嘅宣揚，似乎都係存在著一定嘅差距。雖然，司長在昨日和頭先都有講過一下，但係，我對你剛才回應嘅觀點，尤其是在職教嘅方面回應關議員嘅，我好唔同意，建議你返去再聽聽同埋思考一下。所以，我好想司長你再深入表達一下，對非高教同埋尤其是在你嘅方針裏面講到 7 間學校實施這個幼兒教育嘅先導計劃，同埋點樣試行正規教育課程嘅框架呢？在你 245 頁裏面嘅。而且留級率、輟學等嘅問題，這裏涉及嘅我認為係我哋教育政策嘅方向出問題。教學自主唔係完全唔可以去關注。每間學校嘅留級制度都唔一樣，任何佢自己放縱。點得呀，司長？

我身邊有個個案，有個 15 歲嘅細佬仔仲係讀緊小六，非高教綱要法規定，如果佢 15 歲都唔能夠順利畢業嘅話，根據非高教綱要法，佢 15 歲唔能夠畢業可能就輟學。類似這些個案，其實可謂唔少嘅。所以司長，真係要在政策層面入手制訂措施，否則，社會又多咗唔少這些不良嘅青少年。舊社會裏面就話有童工或者有學徒，我哋都係咁出嘅，而家呢？所以我跟著就要講甚麼呢？職業技術教育銜接嘅問題。

職業技能教育在過往本澳經濟社會發展過程係起到不可忽視嘅作用。但係，隨著社會嘅發展，職業技能教育面對嘅新挑戰，隨著近年基礎教育嘅普及等等，因此，職教係被去邊緣化，產生嘅不良影響就越來越多。有意見認為，本澳現時嘅基礎教育主要係側重在培育知識型嘅人才，整體並未因為學生嘅實情、個人嘅素質或者興趣嘅分流以及社會現實嘅因素。如果這種單一取向，唔單止最終形成澳門缺乏技術型嘅人才，亦都係難以面對社會嘅未來。所以，聽司長講講，你嘅方針第 247 頁裏面提到：研究符合澳門未來需要嘅職教發展模式，完善職業技術教育嘅制度，想聽司長講講。

最後講講旅遊局嘅問題，歸屬嘅因素。在上個禮拜在經濟

財政範疇嘅施政裏面，我同譚司長提出咗旅遊局係唔應該劃歸在經濟財政範疇嘅問題。在這裏，我都再想跟進一下，我提出幾點給司長。

大家都知道，產業係比較單一，雖然係努力多元化，要建設休閒中心，但係，博彩業在一定嘅時間裏面仍然係龍頭產業。這個旅遊係現今嘅第三產業。而且在施政嘅方針裏面亦都有指到增強博彩旅遊競爭力等等。如果有咗旅遊業嘅配合支持嘅話，龍頭產業係唔可以叫做博彩旅遊。所以，特區政府亦都不斷地提出，推動強化非博彩元素，來到突顯經濟適度多元。

其次係政務嘅配合。事實上澳門經濟發展嘅過程，旅遊局同經濟財政範疇嘅少嘅部門都有著交替嘅情況。例如，經濟財政範疇經濟局、貿促局經常到內地同埋其他地方招商引資。但係與此同時，旅遊局又同一樣去宣傳旅遊。況且旅遊局在世界各個地方同埋本澳各個唔少自身地都已經係有相應宣傳點資源。如果這些網絡能夠同經濟範疇嘅經濟局、貿促局有更緊密嘅配合，澳門嘅經貿發展係唔係起到更大嘅作用呢？事實上，各個政府部門之間嘅配合往往已經係有一定嘅不足，已經係成咗話病，更何況跨司嘅政務配合相信係更加難。

最後，社會文化範疇嘅屬性。正如陳明金議員昨日講到：社會文化範疇嘅事務涉及居民嘅生老病死每一個政策。剛才，就算……行咗，阿高天賜議員……走咗喇，高開賢議員……都講到生老病死都關司長嘅事，落實得好唔好同廣大嘅居民生活係息息相關嘅。所以，我在這裏想講，司長，你嘅範疇主要係應該要關注本土居民嘅民生服務，包括剛才林香生議員所講嘅一大堆，司長值得考慮。

時間就到了，所以，旅遊局歸屬財政範疇嘅發言，我亦都到此為止。希望司長認真考慮一下，通過政務上嘅合作可以落實這一個建議。一方面更好地為特區強化非博彩旅遊元素，發展旅遊業，促進經濟發展，另一方面，司長係做好你嘅醫療、衛生、教育、社保等等嘅工作，咁老百姓真係好尊重司長你了。

多謝。

主席：梁安琪議員。

梁安琪：多謝主席。

司長、各位官員、各位同事：

我諗好多同事都覺得係悶咗少少。

我第一個問題都係講返旅遊場所《控煙法》。有關這個問題，昨日同今日我哋有些議員亦都講咗。我本人在經濟同埋保安範疇嘅施政辯論亦都有提過娛樂場全面禁煙這個提議。好可惜兩位司長都未就本人提出嘅問題作了回應。咁我今期這個就係主打了，所以都會繼續咁講。咁亦都借著今日這個議會嘅平台回應一下各方面有關嘅相關的機構，同埋而家社會上好多關注全面禁煙嘅所有人士。可能有好多人都質疑話：喂，梁安琪，你在博企做嘅，亦都係負責人。我哋有些議員都提出過，你提出這個全面禁煙係唔係在這裏做 Show？我今日在這裏再好肯定咁講，我係絕對支持娛樂場全面禁煙。其實我自己本人亦都好憎人食煙，亦都好怕食煙。因此，今日我都就這個娛樂場有關控煙問題就再一次同司長探討一下。

《控煙法》生效到今日都有 11 個月，有關當局一直不遺餘力加強宣傳嘅工作。公共地方嘅禁煙效果係好顯著，成效理想。我係有十分嘅誠意提出這個建議，亦希望當局一樣誠意十足，鼓勵所有娛樂場同時推行。司長、局長，你哋可能會講話娛樂場可以自行決定全面禁煙。但從娛樂場營運嘅角度，我都同好多有關嘅人士佢哋傾過，特別係這幾日。佢哋都認為，如果佢哋個場全面禁煙，而其他場唔係全面禁煙，收入係有一定嘅影響。咁點解要全面禁煙影響自己嘅收入？相信任何企業都會有這個諗法。就算在新加坡咁嚴厲嘅地方都會怕禁煙影響收入，而有在娛樂場做全面禁煙。同時，如果只係一個場去全面禁煙，我相信這個場嘅負責人亦都好難向公司同埋董事局交代同埋解釋：點解在影響營業、營收嘅情況下，仍然要做全面禁煙？想問一問司長，當局會否鼓勵本澳所有，係全部博企嘅娛樂場同時推行場內全面禁煙嘅計劃？我相信如果宣傳係得力，特別而家我哋好多時各個司都有出國內、國外去推介、推廣我哋澳門本身各個方面旅遊，各方面嘅嘢。咁在這個時間，你哋可以亦都大力宣傳下澳門禁煙，我諗相信國內、國外好快都會知道。這個全面禁煙嘅計劃，如果政府係牽頭作用，我諗這個一定做得到。在這個時間做嘅同時，就係娛樂場設立禁煙區同埋非禁煙區這樣嘢，個執法嘅時間亦都牽及到衛生局、司法、博監局三方面跨部門嘅工作。點解呢？衛生局係主導這個執法，而博監一向負責監管娛樂場嘅運作。好似，如果，舉個例：有人客在非吸煙區吸煙，我哋博彩業嘅員工，佢一定在工作嘅時候要作出勸諭，咁個客人萬一真係輸咗錢亦都會借這個勢去發爛渣，唔唔唔呀？甚至對我哋嘅員工做出一些

唔理智嘅行為，咁這個時間先至話司法能夠介入解決。我日前亦都有通過這個保安範疇嘅官員，在這種情況下點樣介入？亦都有答到。所以請問司長，娛樂場控煙嘅協調工作點樣先可以做到呢？同時，控煙嘅督察係唔係經常地長駐在各個娛樂場？

另外就個批示亦都講咗，空氣的基本驗測工作係由娛樂場自己進行檢測並向衛生局提交報告。而衛生局亦會進行檢測。如果檢測結果同衛生局出現差異，係以衛生局嘅檢測為準。咁娛樂場檢測嘅報告咪即係做假？但係，我相信各個娛樂場亦都唔會咁做。只不過而家在嗰個所謂空氣懸浮粒子唔一定係平均分配在各個空間，咁啱娛樂場去量度嗰陣時，那些懸浮粒子分佈少咗啲……不過我諗官那些一定大啲，娛樂場嘅檢測公唔公平亦都有得反駁嘅。

另外就係娛樂場控煙批示出台只係得兩個月時間，咁點做呢？要娛樂場在兩個月時間先申請個設置禁煙區，然後再等批示完善個設置，這裏可能亦都要……我唔知使唔使經工務局，到時候那些甚麼空氣、冷氣走法啲啲，我都唔係……又係一個跨部門。就算申請同埋設置同步進行都得兩個月，係唔係太倉促呢？所以司長，我真係覺得不如考慮娛樂場全面禁煙，免得真係勞民傷財亦勞財傷民。咁樣先至保障所有……咁樣做既可以保障娛樂場收入，宣傳效果，對澳門嘅形象，最緊要有一樣就係保障娛樂場所所有博彩員工嘅健康、身心，同埋可以為我哋來澳門嘅客人提供一個清新、無煙嘅娛樂場所。

第二個問題就係殘疾人士綜合嘅問題。昨日我哋有些同事亦都問過殘障人士嘅問題，但係對於這個群體嘅生活、教育同埋出行各方面，仍然有好多嘢係值得我哋探討。其實我經常都會同這些智障人士嘅家長見面傾下偈。在院舍服務方面，司長頭先都有答到，但係有些家長表示，佢哋智障子女申請院舍輪候服務係超過咗十年。即係頭先都有講到就係面臨雙重老化嘅問題，子女亦都仲未入到院舍。亦都想問一問就係對於這種情況，當局掌握咗幾多？有冇制訂一些前瞻性嘅長遠規劃？會唔會設立中央輪候制度，更好咁能夠解決智障人士輪候院舍服務這個問題？

去年本人曾要求當局關注這個將特殊教育伸延到去高中嘅計劃，但係好遺憾，這個計劃到而家都未能實現。在施政方針中表示，當局會跟進特殊教育專項評鑒嘅結果同埋建議，完善教育特殊系統，促進特殊教育同埋各組成部份嘅協調發展，推動特殊教育嘅修訂。請問特殊教育法規修訂嘅進度係點呢？幾時先至可以完成，使到特殊教育嘅學生能夠同其他學生一

樣，同樣享受 15 年免費教育福利？另外就有些智障人士需要有一套能力相對應嘅配套教材。除咗文化課嘅教學外，仲要配以一些模擬實質生活自理嘅培訓。例如在學校設置一些超市，訓練智障人士嘅基本生活能力。對此，當局會否檢討當前特殊教育政策服務嘅成效，制訂長遠嘅教育計劃，完成適合這類學生嘅課程？仲有一個家長亦都同我反映，過去教育局對出現學習障礙問題嘅學生就會做評估，評定佢哋係智障先可以入特殊學校。但係子女係經過教育局嘅評估後就入讀咗特殊學校，但係舊年殘疾分類評級、評估，對佢哋子女評估後，結果卻表示佢哋子女唔符合殘疾嘅個案，要轉回到一般嘅學校就讀。請問有關當局，在教育局之前嘅評估同而家這個殘疾人士評估兩者中，究竟邊一方面評估先至準確？如何去確保評估中心人員能夠準確作出評估？上述這個案情係對評估者唔公平。當局係點樣處理？邊個需要負責？這些早前被評為需要入讀嘅學生已適應在特殊學校學習，但係一返到一般嘅學校上堂，實在令到佢哋在學習上有障礙同埋困難。對這些這樣的情況，希望當局加強去瞭解。

仲有少少時間。仲要講講就係近年對殘疾人士嘅關懷同埋支援。除咗經濟支援外，仲有打造一個無障礙嘅環境。在本澳無障礙嘅環境仲有好多改善嘅空間。那些坐輪椅嘅殘障人士仍然要面對出門難嘅問題。因為，例如好似行人路、馬路有些高度上落，如果有差距佢哋真係好危險，令到大家佢哋想出來，我哋點樣將社會融入殘疾人士？佢哋在出來社會行街，佢哋真係都有些擔心。這些特別例如交通燈、電子道路那些裝置同埋升降機語音提示，係對導盲磚……嗰個，等，都未曾覆蓋到全澳。亦都有些巴士未曾做到這樣嘢，那些斜板式，坐輪椅嘅人士佢哋自己亦都做唔到。有些巴士司機亦都有打開斜板，是這些這樣的情況。仲有一些公廁都有對視障人士設置國際簡單嘅標記。希望當局亦都對這方面關注。

最後仲有些時間就講講敬師金。昨日司長亦都表示考慮過《私框》在今年 9 月 1 號實施，並認為老師係有高智慧、識大體。為表達對退休教師嘅敬意，當局將推出針對資深退休教師一次性發放嘅敬師金。對此，本人表示贊同。這個措施嘅弘揚係尊師重道嘅精神。但係，同樣，社工在本澳嘅社會中係最能幫到弱勢群體嘅前線服務員，佢哋嘅工作對構建和諧社會、教化社區，幫助有需要嘅人士同發展人際網絡等起著重要作用。特別係資深服務社會咗多年嘅社工，更為推動本澳社會和諧有序發展做咗好大嘅貢獻，留低咗好多寶貴嘅專業經驗。當局今年在推出社會工作者註冊制度這個法律諮詢文本，在文本中亦因為缺乏對社工嘅保障等條文引起唔少嘅爭

議。同時希望當局會檢討社工嘅津助制度。亦都問下司長，同時以同樣嘅條件，向合資格嘅資深社工發放津貼，從而做到尊師重社，以示公平性，認同佢哋對社會作出嘅貢獻。

多謝。

主席：蕭志偉議員。

蕭志偉：多謝主席。

張司長、各位官員、各位同事：

特區政府在 2013 財政年度嘅施政報告非常強調透過一個長效嘅機制去構建施政。在施政當中，包括住屋保障、社會保障，優化醫療同埋教育發展。咁今日司長你所相關嘅範疇上係只有三方面，咁所以，我今日提問嘅問題都主要係圍繞著這三方面去同司長探討。

首先係關於醫療方面。為咗提高醫療服務水平，特區政府透過完善醫療系統建設方案，計劃在 2020 年前去完善醫療建設系統。主要係由三個層面去改善，包括擴建同埋重建嘅工程，亦都包括離島醫療綜合體嘅建設，亦都包括初級衛生保健嘅網絡。相信透過這個方案對於硬件嘅改善亦都適合到社會嘅發展。但係，在昨天嘅探討過程裏面，我哋好多議員同事亦都有提到在醫護人員又或者醫生嘅培育方面係要多作思考。所以，我第一個就先想同司長探討關於一個專科醫生培訓嘅問題。

特區政府在 2010 年開始亦都制定咗一些初步嘅培訓計劃，係由衛生部門加大力度去培訓醫生，當中提到會需要增加大約 200 多名嘅專科醫生。但係，我哋大家都知道，在澳門我哋嘅教育制度裏面係冇醫科，亦都有專門嘅醫科。咁所以，在培育專科醫生方面，其實我想瞭解下，由 2010 年開始之後，究竟嗰個培訓專門醫生制度裏面能唔能夠，正如我哋特區政府制訂個方針裏面，係能夠栽培到這些專業、專門嘅醫生出來呢？因為，專門嘅醫生，其實你去栽培 200 名，我相信以特區政府嘅財政能力有條件做得到。但係所謂專門，其實佢仲有會細分嘅。咁我想在這方面首先瞭解下，究竟特區政府嘅政策出台之後，究竟係唔係按照計劃嘅進展、進度能夠逐步逐步展開？

第二個我想同張司長探討嘅係關於護理人員方面。咁我哋

而家在護理人員培訓上，主要係透過鏡湖護理學院同埋理工高等衛生學校去培訓嘅。咁過往這兩個機構，其實已經一直都係為我哋護士又好，護理人員，都栽培咗好多人才出來。咁護士首先給我一個印象，其實首先就先考慮以女性為主。但係，即係我哋見外國好多醫療機構，其實護士這個職業嘅從業亦都有男性，其實都唔少嘅。我點解會講這個問題呢？因為，我們澳門而家今日經濟發展得太快，其實就業嘅機會太多，所以，令到我哋年青人去選擇就業或者佢自己本身選擇行業嘅時候，這個機會多咗之後，而選擇去做護士這個行業我相信選擇性係越來越大。原因就會引起咗我哋將來雖然會有一些新嘅硬件設施，令到我哋這些栽培嘅機構能夠有機會再去擴充招生，但係，我擔心招生嘅過程裏面，究竟有冇足夠嘅招生人數去參與？所以，我自己覺得未來在司長嘅範疇裏面，你應該更加要結合返一些教育嘅系統裏面，首先係強調護士這個行業嘅專業同埋受人尊重，當然亦都包括醫生。另外就係話，亦都改變咗而家傳統嘅思維就係話讀護士這個行業，做這個行業唔係淨係女性嘅。咁我相信即係多在這方面做一些宣傳嘅工夫，讓社會能夠在這個思維上有所轉變，起碼，即係我唔確保招生係因為咁樣改變，一定會已經好暢順，但係，起碼這種轉變會令到招生嘅難度有所改善。這個係一個建議。

關於醫療事故法，我相信昨天亦都有好多同事提過。我亦都同大家一樣，希望醫療事故法盡快出台。因為，佢而家這個事故法，其實係對於一些，我估計應該是可以保障到醫患雙方在醫療事故中所出現嘅糾紛，透過法律嘅出台可以將這些糾紛得到一個正確嘅訴訟。但係，我覺得就因為隨著社會嘅進步，人嘅維權意識越來越強。所以，這些醫療糾紛好多都係因為用維權嘅意識而令到同醫護人士之間產生了一些矛盾。所以，我更加強調希望點樣能夠在出現咗糾紛之前，能唔能夠做到一些預防嘅工作呢？我相信在醫生，特別係同病人或者患者嘅家屬裏面，嗰種溝通嘅技巧，其實這個都係需要重視嘅。我亦都記得就係在新修訂嘅《實習醫生培訓法律制度》同埋其他一些配套法規制度通過嘅時候，特別係強調制訂一些衛生專業人員嘅職業道德守則，係從事專業活動嘅良好規則，令到這些衛生專業人員嘅培訓指引以及實行醫務人員嘅專業資格有一些評審機制。我相信這些如果能夠落實得好嘅時候，特別係頭先我提到嘅同病者或者病患家屬能夠有一個溝通技巧係做得更加好嘅時候，我相信係能夠將這些糾紛盡量可以降得少一些。

關於離島嘅醫療綜合體，其實我覺得應該要在這個綜合體裏面思考嘅就係話，我哋澳門人口嘅分佈亦都開始出現咗一些變化，特別係離島人口比例等等嘅變化。另外，亦都，如

果，正如政研室所研究，我哋人口規模，將來去到 2036 年，咁亦都有一些數字出咗台。咁究竟我哋而家離島醫療綜合體，但原有嘅設計，究竟係為咗，包括我哋整個醫療系統，頭先所提到這些方案，究竟佢預計，估計大約有幾多年，我哋係能夠透過將我哋這些改善，令到我哋醫療水平能夠提升？我提出這個問題，我想舉一個例給大家參考下。我記得在我哋拱北新嘅口岸完成之後，當其時佢預計可以使用 10 年，但係，因為一個自由行政策，令到我哋嘅口岸而家今日再要思考，再用一些新嘅口岸先至能夠紓緩到我哋要面對嘅轉變。所以，我亦都希望聽多些關於我哋整個醫療系統裏面嘅一些規劃上面。當然如果有，即係我相信人口轉變唔會好似我哋一個自由行政策就令到我哋會產生咁大嘅變化，但係，始終我覺得在規劃嘅過程裏面，究竟在人口嘅規模上，我哋係唔係已經有思考呢？

另外一方面，我想講講醫療嘅一些資源嘅整合，昨天其實有同事亦都問過。我哋澳門嘅醫療衛生系統主要係由公立嘅醫療機構、非牟利嘅醫療機構同埋私人醫療機構三方面共同構成。當中亦都在昨天提到就係關於轉診嘅機制。其實轉診嘅機制我覺得相當好嘅，這個係可以令到社會嘅資源更加合理去使用。咁我覺得可以利用轉診機制嘅思考這種方式，再將一些我哋澳門幾間醫院一些硬件嘅設施，包括醫療設施裏面，係唔係可以用一些特別係特殊嘅醫療設備？其實我哋澳門人口嘅規模，你三間醫院擁有嘅其實可能會過剩，但係，如果共同去使用嘅時候，在這方面係唔係可以將資源使用得更加好？當然，在細節上面亦都包括一些，譬如我哋嘅私隱等等文件上去做好配合，我相信這裏都要再繼續去細化。

跟著我想講一講就係關於社會保障方面。長者，我諗而家特別係特區政府非常強調係，用我哋中國人嘅一種倫理關係推動家居安老，這個我覺得社會都會朝著這個方向走。但係，在走嘅過程裏面，我哋點樣支援好一個家庭能夠讓這些長者，佢哋能夠同屋企人一齊住呢，在這方面，我覺得係要多些支援。當然，而家在特區政府裏面亦都用咗好多自己本身嘅一些部門，甚至結合一些民間嘅力量去做好這些工作。在硬件嘅設施，我亦都覺得我哋在這裏作出咗好大嘅改善。但係，一些細節上面，譬如將來點樣讓這些老人家，特別在佢哋屋企人上班嘅時間裏面，佢哋有一些事，因為佢哋嘅時間就相對來講係空虛些，咁假如政府所提供一些設施，而這些老人家佢哋能夠有一個好好嘅交通工具嘅安排，令到佢哋好方便出行，我相信這些細節上嘅嘢，將來在司長範疇嘅各個部門應該可以多些思考。如果這些設施配套做得好嘅時候，我相信年青嘅一代，佢哋都好樂意同佢哋上一代一齊生活，因為唔單止唔需要添到麻

煩，甚至令到佢哋好多可以，當佢哋返到屋企嘅時候，可以同屋企人一齊吃晚飯等等。咁這些配套做得好，我相信家居安老這方面應該可以落實得到。

另外就關於托兒服務方面，頭先我聽當局講到對於一些殘疾或者智障人士都會用一種新嘅思考模式，特別係提到夜托、臨時托等等。咁我覺得托兒服務其實都需要這種思考方式。因為社會嘅轉變，而家雙職家庭甚至輪更制度等等，這些都係令到好多父母對照顧佢哋自己本身小朋友嘅時候需要這些服務。但係，我想將，張司長你而家所管轄緊嘅範疇上，我聽咗你嘅施政方針裏面，有大部份都係結合，即係當然政府自己本身好努力咁樣去透過政策去處理好這些社會問題，同時，你有好多方面都係結合返民間社團、社會力量去共同推動好你嘅政策落實，咁我絕對係支持。因為，如果能夠透過民間嘅力量，因為，民間嘅機構有好多制度上更加比政府機動性、靈活性係大嘅。咁當然政府有雄厚嘅資源，咁兩者結合其實對社會絕對係好事。所以，我係好支持，在這方面政府能夠，特別在張司長你嘅範疇裏面多些同民間去結合。但係，因為這些係公帑來嘅，好多機構，佢其實，我唔用陰謀論去睇這些問題，機構佢係好願意為社會服務，但係，有好多機構因為佢自己本身嘅專業就係服務好佢嘅對象，對於政府嘅申請或者對於政府所要求嘅文件嘅補足，其實可能佢未必專長。所以，令到有好多時候社會經常會批判，就係話，會唔會這些機構裏面，即係佢存在一些不規則嘅行為？我相信如果有不規則嘅行為，我諗法律已經有好多制裁嘅方式。反而我擔心就係話有一些機構佢好主動希望去協助好部門，但係，如果將來佢在協助嘅過程裏面因為一些制度而令到佢因為佢做得唔健全嘅時候，而引起這些擔憂，我反而擔心係唔係，更加會，即是原本嗰個動機破壞咗？

多謝。

主席：馮志強議員。

馮志強：等到頸都長。

多謝主席。

司長、各位官員、各位同事：

司長所負責嘅工作領域包括醫療、衛生、教育、社會工作、社會保障、文化、體育、旅遊等，可以話涉及嘅都係民

生，各方面應有盡有，與民生息息相關。俗語有話民生就無小事，司長是否能夠全面高度去關注呢？這個問題都值得研究。施政嘅成效能否達致市民嘅訴求呢，咁就睇司長這個能力方面了。

司長管轄嘅領域，明年嘅預算支出高達 367 億，當中未包括公務員嘅薪酬方面。即係換句話講，嗰 367 億就全部直接用在市民身上。但係，這些錢係唔係花得合理，是否花得物有所值、花得其所呢，真係好值得探討。頭先林香生都提，如果能夠壓縮 5%，仲有 10 幾億。10 幾億係可以做好多嘢，係唔係呀？實情這三百幾億真係有資格、有條件壓縮，係唔係呀？

在明年，在昨日施政辯論入面，陳明金同埋好多位議員在發言中對醫療服務方面提出咗唔少嘅批評，特別在醫護水平嘅質量、人手，設置配套，輪候時間這方面都提咗好多批評。即係話好多跟唔上社會發展同埋市民嘅訴求。

近幾年在醫療方面，政府投入咗大約百多億。咁明年都有 50 幾億，點解在醫療衛生方面都有明顯嘅改善呢？原因在哪裏呢？咁我相信係唔係要深入去探討下，搵出根本嘅問題所在？在我哋特區嘅醫療政策規劃方面都睇唔到一些比較長遠嘅政策，係唔係呀？在這方面係唔係有人才去做呢？如果有，可以請些專家去同我哋規劃下澳門嘅醫療政策、規劃方面，係唔係呀？我見到我哋李局長做到頭髮都白晒。真係應該有一個比較長，因為醫療係好重要，係唔係呀？頭先司長話澳門嘅醫療 80% 係免費嘅。實情唔係呀，司長，最多係 60%。好多人過香港睇醫生，有啲經濟的都走去香港睇。你知唔知道理在哪裏？澳門嘅醫療水平真係，我都唔敢批評，我係管呢瓣，我最清楚，有時間先至同你講。但係好奇怪，在生活中，市民常常把看病，我哋有病去睇病，但係佢講成去睇醫生，從這個側面反映咗醫生職業嘅特殊性。有病梗係去睇病，佢話去睇醫生。在這方面嘅側面我睇到甚麼問題？病人能否睇好病，關鍵因素往往唔係藥物或者設備，而係醫生。所以，醫務人員的道德專業操守係好重要，係唔係呀？所以，要培訓醫生應該從這兩方面著手。

要提高醫護水平效率，優化流程，改善就醫服務，應該政府要創造一些有利醫務人員工作同埋發展嘅環境及條件，使其價值地位得到應有嘅體現。而家我哋醫務人員全部都公務員編制，你又唔炒得佢魷魚，佢一個鐘頭睇兩個症，你都吹佢唔漲。因為我有些朋友話，得兩個人在這裏排隊，一個鐘頭先到我。效率非常低，效率非常低！頭先我哋講起，張立群提

啦，三點幾鐘去睇急診，去到八點幾才見到醫生。這些真係事實來嘅。點解在人手方面咁缺少呢？係咪係先啊？頭先好多同事都批評，點解我哋醫務人員，係唔係個個去蛇王啊？所以，醫療這方面係唔係同體制方面要去改革下？因為，你有得炒佢魷魚就好頭痛嘅。私家醫院你哋唔係達標或者唔配合醫院嗰個方向就炒你魷魚。咁你有得炒佢魷魚，佢睇唔睇，你真係吹佢唔漲。所以，可唔可以在這方面去改革？應該就得嘅，係唔係呀？所以，好嘅醫護人員，而家我哋醫護人員做到顧問醫生都係九百點，我算佢七百蚊一點，九七六十三，加上 30% 幾都係八、九萬元，你知唔知而家高級醫生係幾多錢呀？過百萬月薪！老實講，平就無好嘢嘅，越平佢就唔會重視嘅。因為，佢收入同付出唔相稱嘅時候，佢就唔會重視這份工，得過且過、隨隨便便，咁受害係我哋嘅市民，係唔係呀？馬克思都曾經講過，佢話：人嘅奮鬥一切都係同自己自身嘅利益有關。每個人付出都同自己利益有關，係唔係呀？所以，任何一種制度歸根到底都係同收入分配制度嘅合理性有聯繫，係唔係呀？所以，在政府醫生嗰度係唔係要改一改制度？多勞多得，優勞多得，要分成。我哋醫院都係開始搞這科，我頭都大埋，真係好難頂，那些知識份子。

另外，我又講下第二樣。你嘅方針提到搞管理委員會。可唔可以學香港咁搞個醫管局，醫管局？除咗專責執行特區政府嘅公共醫療政策外，也向政府提出好似在醫院收費，所需資源等相關政策嘅建議以及進行對醫院服務等相關嘅研究。搞個醫管局係好嘅，好過而家冇人管。你叫李局長一人管咁龐大嘅事，嗰個醫療事係好辛苦，真係，我都為佢痛苦。點管得咁多，一個人？真係有個醫管局真係做嘢，專業嘅，如果唔夠，咁多錢都係咁使啦，在其他地方請些專家返來去管啦。真係管唔掂嘅！中國人話齋：能管三千兵，唔好管三個丁。兵好管過那些知識份子。所以，司長希望從根本上考慮問題。

第二個關於教育嘅問題。澳門教育水平參差比較大，這些係不爭嘅事實。好嘅學校就變成大熱門，門庭若市，有些就係門堪羅雀。其實都涉及到均衡教育嘅問題。司長在施政方針有提到，證明政府對這樣嘅根本冇足夠嘅重視。澳門教育嘅參差已經係老大難，政府對提升學校教育嘅質量年年都講，但係根本冇去解決到。在現今社會，市民對享有公平教育、均衡教育嘅要求同埋期待都係好高。政府嘅政策只係投入資源的多，只著重表象，忽視咗本質。所以改革唔大，其實教育發展到一定程度就要往心裏走，不能光靠錢，更重要就係動腦筋走內涵式嘅發展之路。不但使學生學有所教，還要學有優教。我認為可以從校長方面做起。校長應該從行政型，向學者型、專家型

角色轉變。由校長帶動老師，由老師教育學生，以此促進學校的教育水平提升，不斷縮小學校嘅差距，以滿足學生家長嘅需要。希望司長能夠從根本上提升學校嘅教育品質入手，改變澳門教育嘅不均衡狀況。

另外關於持續進修發展計劃。呢味嘢審計局已查出咗唔少烏龍嘢。教育局就據理力爭，公說公有理、婆說婆有理。唔知這場官司，司長你點樣去裁判。從司長嘅施政方針來睇，這個計劃還會繼續實施。司長說要完成審批和監察機制，如何完善也不得而知，希望不要再烏龍落去。持續進修發展計劃所推出嘅部門進行課程，好多都係巧立名目、各出奇謀。所謂進修無非係只為收取政府資源費用。申請人基於課程免費，不理會課程嘅程度或是否自己希望進修嘅學科，照報可也。由於課程嘅種類繁多，除咗監管困難外，更難以保證課程嘅質量同埋進修嘅效果。司長，你憑良心講，這樣推行發展計劃到底起到甚麼效益呢？政府嘅錢係唔係多到可以亂花嘅地步呢？這些錢係納稅人嘅，政府當然可以繼續往自己嘅面上貼金，但係，代價係非常沉重。其實，2007年推行嘅持續教育資助計劃僅係資助申請人部分學費，沒有申請嘅限額，學者本身亦須承擔部分學費，這個計劃比現行推行嘅計劃就較為實效。司長，如果還要進行進修發展計劃應結合2007年嘅資助計劃嘅優點，好好地總結教訓，明確計劃嘅方向目標同埋對象，重新制訂一個切實可行嘅計劃。

關於旅遊業發展規劃，司長在施政方針中提到：適時制訂旅遊政策和措施，推動優質旅遊，發展文化旅遊，推展具有本地特色嘅旅遊元素，促進本地旅遊產品更加多元化。

因為都有甚麼時間講，我又唔想再講，好唔好呀？就講到這裏。

主席：陳澤武議員。

陳澤武：多謝主席。

司長、各位官員、各位同事：

我係第一輪最後一位議員，希望簡短些，因為好多題目好多同事都講咗。

回歸後這幾年，做澳門人，即係點講呀？好開心、好自豪，因為大把錢使，其實可以講想做甚麼都做到嘅，係有冇決

心做而已。

今次司長嘅範疇，社會文化方面就好多嘢，好多資源放咗落去教育又好、醫療又好，社會保障，兼顧弱勢社群，利民嘅措施種種都有。咁我就唔想在這裏再討論了，因為好多同事都講咗。但係，我想歸返去個……係唔係成日都咁多錢使呢？我想歸返去源頭嗰度，飲水思源，咁嘅錢邊度來嘅呢？咁當然係除咗我哋本地做生意，仲有廣大嘅遊客。咁我覺得遊客在這裏著墨就少咗。因為，如果係維持經濟再係咁發展，博彩業也好或者係本地做生意也好，遊客係最重要。如果有遊客嘅消費，大家都知道，我哋中小企或者其他，大家傾偈都話：如果澳門有遊客就死梗喇，同香港一樣。咁樣講啦。咁我想講講，因為自己又係做生意，始終稅收都係遊客嚟嘅，唔好理佢來到賭錢或者購物，樣樣都好，購物或者旅遊，點都好。咁頭先司長都講咗賽車嗰個情況，其實，我本人來講當然係十分之贊成，這個賽車有咁長遠嘅歷史，亦都係一個盛事，每一年。明年60屆，司長其實介紹咗好多，但係有一樣嘢我想清楚些，因為在你21頁引介嗰度，你就寫：將此盛事轉化為全年嘅活動。但係這本書嗰度係冇嘅，你頭先係介紹那兩個禮拜當中嘅嘢。咁如果全年嘅，係唔係就開些車展，在廣場給些靚車給人睇睇？這個我想瞭解，如果而家未有構思都唔緊要，因為就係睇到係全年嘅活動，我先好奇想問一問你啫。

另外，大家都掛在口邊，即係國家嘅“十二·五”規劃，將澳門構建成世界旅遊休閒中心嘅定位。個個都咁講，各個部門同埋政府，各個部門我諗都係朝著這個方向行，交通部又好、移民局又好、治安又好、出入境又好，咁我諗都係做佢哋嘅工作。咁司長嗰邊當然係推廣旅遊，睇下點樣客人多些來。第一，引咗佢人來先啦；第二，有甚麼留住佢，消費又好、在這裏住又好，甚至在這裏博彩又好。咁我想問一問，司長在這方面有甚麼諗法？因為，我哋係一次性嘅盛事，所謂見咗好啱啦，譬如係頭先講過音樂節、文化節、煙花、賽車、巡遊，一次性嘅好多。咁當然，這些如果人哋來得到嘅，你有相當宣傳，咁人哋會去睇，這個就會係吸引到佢。咁但係，有甚麼係永久性同埋常設性呢？咁剛才好似個西灣湖計劃一出來，可能政府梗係好心啦，有咁嘅聲音做個夜市，咁就已經乒乒乓乓打到，又縮埋了，唔係你們嗰邊。但係如果咁嘅，譬如頭先高議員，唔係高天賜，係高開賢議員講：十月初五街或者福隆新街，咁點整呢？咁譬如話真係你政府有意思在福隆新街整個步行街，咁好似心齋橋咁樣，大阪，咁做唔做到呢？可能隔離街的人就話：好呀，有人行入來；在嗰條街嘅話：唔好呀，冇車經過門口，我做唔到生意。咁這個問題係點樣諗法

呢？你哋會有幾大嘅決心？用甚麼方法設計，用甚麼諮詢嘅渠道，然後能夠做到這樣嘢認為大家好嘅呢？如果政府唔主導，下面嘅民間團體好難做到，就算係街總都好難做。好似頭先講返個西灣湖，可能一個好事，而家就變咗壞事。咁有甚麼諗法係做到永久性嘅，係遊客，你認為……我想講埋呢樣先，譬如係西灣湖做步行街，而家個個都希望係科學施政，咁有冇真係研究過我哋主要的遊客嘅市場，例如係國內、台灣、香港，有冇做過調查研究，有冇做過 Research？佢哋需要甚麼？佢哋可能唔需要好多嘢，佢哋真係來到 Look for 甚麼先？咁係人都識講啦，除咗賭之外冇嘢做，個個都咁講了。但係佢都係來，咁來之餘有甚麼可以令……你哋真係收到個訊息係真係要做這樣嘢，我有晒科學數據，有晒調研結果，人哋鍾意，譬如，而家講笑咋，鍾意好細型嘅海洋公園，鍾意你在這裏做馬戲，咁你都要有咁嘅數據來支持你哋想做嘅嘢，但係我覺得而家好似這裏又有少少空白。另外，承受力係點樣呢？兩年前在旅遊局做過一個係遊客嘅承受力，但係個係北京學者，一個機構做嘅。而家嘅情況有甚麼改變呢，兩年後？係唔係客人覺得擠迫咗？點樣做到世界旅遊休閒中心呢？我覺得這個真係要值得考慮。另外一樣嘢，要達到這個目標，我覺得政府嘅思維真係要改下先得。司長，你都去過好多地方啦，我有陣時同你閒談，你都話舊陣時後生頂個背囊全世界都去。早幾日譚司長講過，去到夏威夷就覺得要著條短褲、著對拖鞋。咁這個係咁嘅，天氣又熱、又有海灘、又要游水，咁你就有咁嘅思維囉，去到就係陽光與海灘。但係，來到澳門嘅除咗係賭錢、行大三巴、購物之外。另外一樣嘢就係頭先我點解提司長全世界都去過呢？有邊個旅遊城市，旅遊城市裏面著名嘅景點側邊有些 Sidewalk cafe？有冇？有可能冇！我事實上想講。澳門係點嘅情況？民署而家有個部門，有 6 至 8 個人在每晚 8 點鐘去巡，巡你有冇擺張台出街半寸，係去檢控、去告人。咁這些係甚麼思維呢？我唔係話要市容亂，但係，問題係思維一定要……如果司長主導到就更好，同民署佢哋傾傾，同陳司長傾傾，整到旅遊城市，我睇大三巴個度邊個區可以整啲 Sidewalk cafe，啲餐廳可以擺凳出來，唔阻礙交通、唔阻礙人流，冇危險性又有監管嘅情況下，點樣做？劃個位俾佢，照收租，舊陣時公司、銀行門口租幾個位，每年交租都有，而家好似冇了。咁點解唔可以做得呢？人哋外國有些霸出來——唔好講霸嘅，肯定合法嘅，唔好講霸——嘅地方仲大過行人路嘅地方都有。司長你一定見過。咁你點樣做到這一樣嘢來配合旅遊休閒得嘍？咁我行得邊，我都搵個地方坐下。你睇下大三巴有一個位坐，坐地下、坐石級。咁你點會有一個氣氛係叫做旅遊休閒呢？唔係一定要做，但係可以諗，梗係唔係在新馬路個度那些騎樓度擺檔，但係好多區都得，咁點解唔諗下呢？譬如一個好

簡單嘅例子：在威尼斯人裏面，聖馬可廣場個個知，裏面啲餐廳冇人坐，坐晒出來而已。人哋覺得有氣氛，求佢人去坐，唔得，我要坐出邊，寧願唔坐。咁當然，室內同室外可能唔同，但係一個遊客嘅，佢一定鍾意這樣嘢。你都想啦，行行下，去教堂又好、去甚麼都好，坐低飲杯咖啡，夜晚就食埋飯。咁點樣可以做得呢？我覺得這個發展方向係值得探討，亦都十分重要。因為，外國人先呀，唔講國內人，來到一定真係乜都冇，點樣行晒咁多景點而我又舒服，又可以感受到你本地人嘅風土人情呢？可唔可以這樣嘢探討下？

第二想講講文化藝術推廣方面。而家又有個基金，又話有文化產業嘅，希望。覺得一樣嘢，我自己諗法，係要做嘅，係要有一個場地。你唱粵曲又好，你自己門埋房門唱，鍾意租個度、租個度，大家就有交流、冇切磋、冇研究，一定唔能夠凝聚。點解我咁講呢？譬如香港，舊陣時嘅文化藝術都有咁發達嘅，自從有影藝學院，又唔同了，有影藝學院人哋就可以來讀書，你去搵個好嘅先生來教書，如果你畢咗業可以在這裏教埋書，可以有個地方俾佢，講俗啲就係在呢度蒲，在這裏打戲，咁你一定有個氛圍。但係，而家你做親文化又好，藝術又好，個個各有各做，咁點有交流先？即係我覺得，如果你真係做到，噏，我哋而家好多嘢唔水皮，國際音樂節、藝術節，又有交響樂團，又有澳門中樂團，這些都係好出名嘅，但係問題係佢在文化中心表演，可能。咁但係，你想培養新一班對文化藝術有興趣嘅，係唔係可以考慮這樣嘢呢？第一，而家我哋有資源；第二，我覺得地都唔難嘅，你在科學館隔離大把地，你就整幾萬尺囉。如果做咗之後真係你有嘅師資又好，甚麼都好，好似香港一樣，唔使咁大，真係有人去投入這個行業，有人有興趣這樣嘢，自然就整個帶起。好似運動員一樣，黃有力局長都係咁講，你唔搵啲國內嘅運動員，退役又好或者教練又好，你來到點樣帶起整個體育界呢，如果你想擺獎咁講？如果你真係擺咗獎咁就會個個學囉：原來武術可以擺金牌，咁我的細路哥就學囉。咁我覺得這樣嘢係好重要，對這個產業嘅發展，可以咁樣講。

或者諗下啦，仲有少少時間。好似澳門嘅，我由飲食業來計，餐飲業，那些廚師點解永遠都唔會出名呢？因為紅褲仔出身，我哋都有學院，同你嘅藝人一樣，而家你話有一個跳舞好叻嘅，佢自己練出來嘅。唔係嗎，但係我在澳門影藝學院出來的同埋我在澳門廚藝學院出來嘅！點同呀？而家點解我哋成日都抬唔到頭？就因為冇認受性，又有認證，又有咁嘅師資，又有正規嘅培養出來。咁我覺得，如果你真係在文化藝術個度發展，我覺得真係要考慮下可唔可以做到這樣嘢？我覺得資源投

資唔會好大，我覺得推動力反而係好大。

好了，我講完。

多謝。

主席：好，咁剩返 15 分鐘，請司長扼要地對咁多位議員嘅發言，重點些、扼要些回應。

請司長。

社會文化司司長張裕：多謝主席。

多謝各位議員嘅意見、提問。甚至係提及到一些工作不足嘅地方，我哋虛心聆聽，亦都會帶返去，在工作裏面點樣係能夠改善得更好。

今日嘅感覺，我會感覺到議員係為咗履行自己嘅責任，做好政府嘅工作，都係讓我感覺到係好直接地提出咗一些好有啟發性嘅意見，完全係同意嘅。作為我哋政府嘅一個公務員，身負著一個責任就係發揮政府嘅職能，履行好我哋本身嘅責任，做好這些工作。隨時有做得不足、值得改善嘅話，虛心聆聽，係努力去提升。尤其是公帑嘅使用，完全係同意點樣使好公帑，發揮最大嘅效益，把工作做好，把管理工作做好。我哋嘅同事都坐咗喺度聽到大家嘅意見，方方面面值得參考。當然，我都向各位介紹一個經驗。

我哋每年都會開一些工作性會議，都會就一些要求向同事提出。一個方面係善用公帑，第二個方面係廉潔守法，第三方面係回應民意訴求，第四個係發揮我哋團隊嘅合作同埋精神，做好為社會、為市民服務嘅工作。

今次議員各方面嘅意見令我哋再一次想起……當然，我相信我哋嘅團隊已經係好努力，但係，事實上面，真係政府個工作量或者個範圍係比起以前有所增加，增加唔少。

主席，因為時間嘅關係，感謝各位議員，都提出好多各方面嘅問題，恕我真係冇辦法每個議員都可以同大家交流下。好多嘅問題都值得，可以交流。施政嘅辯論可以辯論一下，各有不同意見，辯論出來一個好嘅結論，事實上係對工作有益、對社會有益。

我會有一個諗法，主席，議員頭先提出來嘅一些問題或者要求提供些資料嘅話，我哋記低落來，在這裏係有辦法，唔夠時間去解答到，再提供返給相關嘅議員。但係，這裏有一些問題就幾位議員都有提及到，或者我哋精簡些係就兩、三條係再同各位議員交流一下。

關於《控煙法》方面，賭場控煙嘅度，我想請李展潤局長介紹一些情況。

主席：好，李局長。

衛生局局長李展潤：多謝主席。

各位議員：

我簡單講一講賭場禁煙。

其實大家都好清楚，立法會在 2011 年 4 月 18 號細則性通過《預防及控制吸煙制度》。而在第四條第十三款裏規定：娛樂場所屬嘅，係屬於禁止吸煙嘅地方。咁娛樂場係要有，依照 2013 年之前，依照行政長官嘅批示提出申請，先至可以得到批准，可以設立不超過公眾使用區域 50% 的吸煙區。即係換言之，如果係新控煙法規定，假如娛樂場在 2012 年 12 月 31 號之前未獲得設立吸煙區嘅批准，咁在 1 月 1 號開始，娛樂場就等同於一般嘅公眾室內地方一樣係全面禁煙嘅，咁特區政府係會依照這個法律去執行場所禁煙嘅措施。

咁幾位議員，或者係梁議員曾經提出要求所有嘅娛樂場實施全面禁煙嘅措施。但係，這個建議其實係唔合乎而家新控煙法嘅規定。咁在現階段，我哋特區政府係必須要依法去審批相關設立吸煙區嘅申請。咁至於梁議員又提議，由政府牽頭主導所有嘅娛樂場全面禁煙這個措施，咁因為，又係講返禁煙法，新控煙法係已經規定，政府係一定要依法執行，而家係唔可以接納梁議員嘅建議。

咁另外，在新控煙法係又有規定咗，在這個法例實施三年之後，即係 2015 年，我哋特區政府係會進行一個檢討，到時係會根據這個實際情況再作出適當嘅修改。其實，如果邊一個娛樂場，邊一個博企，佢屬下嘅娛樂場係帶頭禁煙嘅，我哋係表示歡迎同埋會給予配合同埋嚴格執法。好簡單，即係邊個博企係唔想，即係話設吸煙區，又唔需要申請、又唔需要裝修，淨係按照返普通《控煙法》嘅規定，只係粘一些禁煙嘅標貼，咁

我哋執法人員就會進行嚴格嘅執法。咁但係，到今日為止，六間博企都已經向行政長官申請咗吸煙區，咁我哋衛生局會依法進行審批，跟住由行政長官決定博企係唔係需要可以設立吸煙區。咁但係，如果邊一間博企都好，而家可以真係決定取消這個申請，咁可以，我哋係會配合嘅。值得提出嘅就係《控煙法》在 1 月 1 號開始實行，其實效果係有目共睹嘅。這個係全賴全澳市民嘅配合，我哋嘅控煙辦嘅同事，警察同埋民署嘅配合先至有咁樣嘅效果。

至於有議員講到話在娛樂場執法，咁這個在新控煙法第二十八條就已經好明確規定：衛生局、民政總署、博彩暨監察局同埋治安警察局在所在嘅職責範圍內具職權監察對本法律嘅執行情況。即係法例已經規定，咁其實經過一年嘅合作，我哋同民署同警察嘅合作都非常好。我哋有聯合行動，又有一些各自單獨嘅行動。咁我哋好多罰單應該而家已經超過咗七千，好多罰單，有警察嘅罰單都有好多，民署都一樣，我相信我哋同博監局嘅合作都會好似今年嘅合作一樣，會通力合作嘅。

主席：好。

社會文化司司長張裕：主席：

我簡單再回應多幾點嘅情況。

就住今次兩天嘅答問裏面，議員比較多嘅係關注到澳門一些醫療工作方面嘅情況。我諗這個係一個好好嘅機會，當然，在我同各位嘅交流裏面，我都再著重係提出一些唔同嘅角度，去分析一些情況。這個並不意味著要偏幫甚麼地方，或者係唔認同議員提出嘅意見，而係就唔同角度進行一些探討。各位提出來各方面一些意見，我諗係一個好好嘅機會讓我哋相關嘅同事再去檢視一下。在維持我哋人員嘅士氣，尤其是係盡職盡責、努力工作，服務好市民嘅這個士氣同責任之餘，但係有值得改善嘅地方，都係我哋嘅責任係進行檢視。係力求不能夠一步到位，都可以逐步有所改善同埋提升，我相信我哋嘅同事都會有這個意願。

本來會就一些議員提出嘅問題同各位交流一下，譬如大家提到嘅文物保護，文化旅遊，高議員提及嘅帶旺舊城區，盤活中小企，留班率，人才嘅培養等等，這些好多都係好好嘅意見，值得我哋不斷去思考、不斷去探討，點樣能夠做得更好一些。譬如話以打造一個世界旅遊休閒中心嘅話，陳澤武議員提及到一些嘅意見都係非常之好嘅。都向各位介紹一個情況。就著打造世界旅遊休閒中心一個重要嘅政策定位，所以未來嘅時間，政府嘅跨部門，旅遊局、文化局、民署有需要到嘅時候，工務局，更多嘅部門都會係跨部門出更大嘅力氣去溝通，係用來合作好，以利有更好嘅推動。一如能唔能夠有多些嘅地方有露天茶座呢？你講得啱嘅，去到威尼斯、去到巴黎，我都係坐露邊唔坐咖啡室裏面，這個都係另有一番嘅風味。能夠做多些嘅話，當然都努力，譬如話在唔少世遺嘅景點，而家周六、周日都係安排咗各式各樣嘅舞醉龍、土風舞或者係中國嘅武術，唔同種類嘅表演，總結經驗，以後在這些方面。當然，頭先林香生議員、吳在權議員提出這些意見都非常好嘅，但係，從一個短時間，事實上係有辦法有一個更深入嘅探討。未來嘅時間，希望各位議員到時亦都安排啲時間，我哋需要到邀請各位開開會，聽下各位嘅經驗同埋意見。尤其是林香生議員在社保都工作咗好長嘅時間，係吸收更多嘅意見同埋大家嘅智慧同埋經驗，我會相信未來嘅工作亦都透過我哋嘅努力同埋良好意願，希望越來越有所進步。

再次多謝主席、多謝各位議員。

希望我哋嘅同事聽到我哋議員嘅鼓勵，未來嘅時間一齊發揮團隊精神，把工作做得更好。

多謝。

主席：好，我哋完結咗社會文化領域嘅施政方針辯論。

我哋星期一下午三點繼續會議。

散會。

翻譯：翻譯辦公室

文牘：紀錄及編輯辦公室